

Evangelio según SAN MATEO

*Jesús rįjoro ñamasiriarã ĩna vãme cutimasire queti
(Lc 3.23-38)*

¹ Jesús ñacami “Rotimũorũgõrucuja mũ” yigu, Dios ĩ cõar'i, Abraham ñamasir'i, to yicõari, Ʋju David ñamasir'i jãnami. Tire mũa masisere bojagu ñari, ĩ ñicua vãmere mũare gotiguagu yaja yũ. Ado bajiro vãme cutimasiñujarã ĩna:

² Abraham ñamasir'i macũ ñamasiñuju Isaac.

Isaac macũ ñamasiñuju Jacob.

Jacob macũ ñamasiñuju Judá. To yicõari, gãjerã ĩ bederã quẽne ñamasiñujarã.

³ Judá rĩa Fares, to yicõari, Zara ñamasiñujarã. ĩna jaco ñamasiñuju Tamar.

Fares macũ ñamasiñuju Esrom.

Esrom macũ ñamasiñuju Aram.

⁴ Aram macũ ñamasiñuju Aminadab.

Aminadab macũ ñamasiñuju Naasón.

Naasón macũ ñamasiñuju Salmón.

⁵ Salmón macũ ñamasiñuju Booz. ĩ jaco ñamasiñuju Rahab.

Booz macũ ñamasiñuju Obed. ĩ jaco ñamasiñuju Rut.

Obed macũ ñamasiñuju Isa'i.

⁶ Isa'i macũ ñamasiñuju Ʋju David vãme cutigu.

David macũ ñamasiñuju Salomón.

ĩ jaco ñamasiñuju Ur'ias ñamasir'i manajo.

⁷ Salomón macũ ñamasiñuju Roboam.

Roboam macũ ñamasiñuju Ab'ias.

Ab'ias macu ñamasiñuju Asa.

⁸ Asa macu ñamasiñuju Josafat.

Josafat macu ñamasiñuju Joram.

Joram macu ñamasiñuju Uz'ias.

⁹ Uz'ias macu ñamasiñuju Jotam.

Jotam macu ñamasiñuju Acaz.

Acaz macu ñamasiñuju Ezequ'ias.

¹⁰ Ezequ'ias macu ñamasiñuju Manasés.

Manasés macu ñamasiñuju Amón.

Amón macu ñamasiñuju Jos'ias.

¹¹ Jos'ias macu ñamasiñuju Jecon'ias. To yicōari, ï bederã quēne ñamasiñujarã. To bajiro ñna bajiar-ijũ, Israel sitanare ñejecōari, Babiloniana ñnare juamasiñujarã, ñnare rotiajeruarã.

¹² Quēna Jecon'ias macu ñamasiñuju Salatiel.

Salatiel macu ñamasiñuju Zorobabel.

¹³ Zorobabel macu ñamasiñuju Abiud.

Abiud macu ñamasiñuju Eliaquim.

Eliaquim macu ñamasiñuju Azor.

¹⁴ Azor macu ñamasiñuju Sadoc.

Sadoc macu ñamasiñuju Aquim.

Aquim macu ñamasiñuju Eliud.

¹⁵ Eliud macu ñamasiñuju Eleazar.

Eleazar macu ñamasiñuju Matán.

Matán macu ñamasiñuju Jacob.

¹⁶ Jacob macu ñañuju José. Ï ñañuju Mar'ia man-ajũ. So ñañuju “Rotim̄or̄ũḡõr̄nc̄m̄i” yigũ, Dios ï cōar'i, Jesús jaco.

¹⁷ Abraham r̄ia jānerabatia, David ï ñamasiariajũne juaãmo cōro, gũbo babari r̄ãca jēnituarir̄ãcũ ñasũo-masiñujarã. Abraham macu ñamasiñuju Isaac. Isaac

macu ñamasiñuju Jacob. To bajiro mani cõiaruji vajama, David ï ñamasirijaune juaãmo cõro, gũbo babari rãca jënituarirãcu ñamasiñujarã ñna. Tijũ bero, quëna David macu ñamasiñuju Salomón. Salomón macu ñamasiñuju Roboam. To bajiro mani cõiaruji vajama, Babilonia macaju Israel sitanare ñna jua vamasirijaune quëna juaãmo cõro, gũbo babari rãca jënituarirãcu ñamasiñujarã ñna. Jecon'ias macu ñañuju Salatiel. Salatiel macu ñañuju Zorobabel. To bajiro mani cõiaruji vajama, “Rotimũorũgõrũcũmi” yigũ, Dios ï cõar'i ï ruyuarirodo juaãmo cõro, gũbo babari rãca jënituarirãcu ñamasiñujarã quëna.

Jesús ï ruyuare queti

(Lc 2.1-7)

¹⁸ “Rotimũorũgõrũcũmi” yigũ, Dios ï cõar'i, Jesús ï ruyuare ado bajiro bajiyuju: Ï jaco ñaroco, Mar'ia vãme cutigo ñañuju so. So manaju ñarocu ñañuju José. Ï rãca so ñaroto rĩjoro, Esp'iritu Santo sore ejacõari, sore macu yiyuju ï. Sore ï macu yijare, macu sãñagõ ñañuju so. ¹⁹ José, so manaju ñarocu quënegũ ñañuju. To bajiro bajigu ñari, masa ñaro rĩjorojua bojoneoro so tãmũorotire bojabesuju. To bajiri, masa ñna ajibeto, “Mũre bojabeaja yũ”, sore yirũaboayuju. ²⁰ To bajiro tũoĩa ï cãniatone, ï cãjiriarojua Diore moabosagu ángel, ñre ruyuaĩoñuju. Ruyuaĩocõari, ado bajiro ñre gotiyuju:

—Ajiya José, David ñamasir'i jãnam. Mar'iare manajo cutirua güibesa. Esp'iritu Santo sore ï macu yijare, macu sãñagõ ñaamo so. ²¹ Macu cũorũcũmo so. Ñre, Jesús ñre vãme yirũcũja mũ. Masa rojose ñna yise ñajare, Dios ï masiriose vaja, vaja yirẽtobosarocu ñarũcũmi ï. To bajiro yirocu ï ñajare, Jesús ñre vãme yirũcũja mũ —Josere ñre yiyuju ángel.

²² “Ado bajiro bajiruaroja” Diore gotirētosamasir'i ĩ yimasire ñajare, to bajiro yiyuju ángel. Ado bajiro yimasiñuju:

²³ “Rōmio, ũmua rāca ñabeco, macu sãñagō ñarucocomo so. To bajiri macu curococomo so. ‘Emanuel’ ĩre yiruarāma masa”, yimasiñuju Diore gotirēto-bosarimasu.

(“Mani rāca ñaami Dios” yire ũni ñaja “Emanuel” yirema.)

²⁴⁻²⁵ “Esp'iritu Santo suorine macu sãñaamo” ángel ĩ yire ñajare, Mar'iare ĩ ya vijũ amicoasuju José. Macu sãñagō so ñajare, so rāca ñabetirũgũñuju. So curo bero, Jesús ĩre vāme yiyuju.

2

Ñocoa ĩna bajisere buerimasa Jesúre ĩna ĩarã ejare queti

¹ Judea sita ñarimaca, Belén vāme cuti macaju ruyuyuju ĩ. ĩ ruyuarirodore ti sita uju, Herodes vāme cutigu ñañuju. Jesús ĩ ruyuario bero, Jerusalén macaju ejayujarã, muiju ĩ jiadojua vadiriarã, ñocoa ĩna bajisere buerimasa. ² Ti maca ejacōari, sēniñañujarã ĩna:

—¿Nore ñati jud'io masa uju ñarocu ruyuar'ima? Muiju ĩ jiadojua ñocore ĩabujacōari, “Toju ruyuagumi” yirã ñari, ĩre rucuburooana vadiaja yua —yiyujarã ĩna.

³ To bajiro ĩna sēniñacudisere ajicōari, toagu uju, Herodes buto tuoĩagũiyuju, “Ījua, uju yu ñasere yure ĩmarucumi” yituoĩagũ ñari. ĩre bajiro rĩne tuoĩañujarã ti macana Jerusalén macana quēne. ⁴ To bajiro tuoĩagũ ñari, paia ujarãre, Dios ĩ rotimasire gotimasiorimasare quēne ĩnare jirēoñuju Herodes. ĩna ejaro ĩacōari, ado bajiro ĩnare sēniñañuju ĩ:

—“Rotimurũgōrucumi” yigu, Dios ĩ cōarocuma, ¿noju, “Ruyuarucumi” yiyujari Dios ocare masa ĩna ucamasire? —ĩnare yiyuju ĩ.

⁵ To bajiro ĩ yisēniīarone, ado bajiro ĩre yicūdiyujarã ĩna: —“Judea sita Belén vāme cūti macajū ruyuarūcūmi” yicamasīñumi sīgū Diore gotirētobosarimasū. Ado bajiro yaja ĩ ucamasire:

⁶ “Judea sita ñarimaca Belén vāme cūti maca, jairimaca me ñaboarine, ñamasuri maca ñarūaroja ti maca. Ti macagū ũjū ñamasugū ruyuarūcūmi. ĩ ñarūcūmi yū yarã Israel sitana ũjū. ĩnare quēnaro ĩatirūñarūcūmi ĩ, yiyuju Dios”, yicare ñaja —ĩre yigotiyujarã Dios ĩ rotimasire gotimasiorimasa.

⁷ To ĩna yisere ajicōari, quēna ñocoa ĩna bajisere buerimasare masa ĩna ajibeto ĩnare jiyuju Herodes. To yicōari, ado bajiro ĩnare sēniīañuju ĩ:

—¿Divato masu ñoco ruyuasūori? —ĩnare yisēniīañuju.

⁸ To yigajano, Belénjū ĩnare varotiyuju ĩ:

—Vasa. Sūcare, quēnaro ĩre macama. ĩre ĩabujacōari, yure gotirã vaba. Yū quēne ĩre rūcūbūogū varū yaja —yiyuju, ĩnare yitogū.

⁹ To bajiro ĩ yirotsere ajicōari, ĩ yirore bajirone vasujarã ĩna. To ĩna vatone, muiju jiadojūa ñoco, ĩna ĩar'i, ĩnare rījoro cūti vasuju. To bajiva, tujarūgūñuju, sūca ĩ ñaro veca. ¹⁰ Ñoco ĩ tujarūgūšere ĩacōari, buto variquēna vasujarã ĩna, ñocoa ĩna bajisere buerimasa. ¹¹ Ñoco ĩ ñaro ēñeroca ñarivi sājacōari, ĩna ĩajama, to ñañuju sūca, ĩ jaco rāca. ĩre ĩacōari, ĩ rījorojūa gūsomuniari tuetuejayujarã ĩna, ĩre rūcūbūoquēnariorã. To bajiro yigajano, ĩna juavarere jānacōari, oro, quēnase sūtise to yicōari, mirra vāme cūtsere quēne ĩre ĩsiñujarã ĩna. ¹² To ĩna yiro bero, ĩna cājiriarojū, “Herodes tū tudiabesa. ‘To ñagūmi sūca’ yimasibeticōato ĩ”, ĩnare yiyuju Dios. To bajiri tire masicōari, Jerusalénjū vamenane gaje maajū tudicoasujarã ĩna yuja, ĩna ya macajū.

Egipto sitajū Jesúre ĩna ũmato rudiare queti

¹³ Ñocoa ñna bajisere buerimasa ñna tudiato bero, José ñ cãjiriariojũ ñre ruyuyaju ángel quẽna. Ruyuacõari, ado bajiro ñre yiyuju:

—Yujiya. Sũcare, ñ jacore quẽne Egiptoju ñnare ùmato rudiasa mũ. Tone ñnacõama maji. Mũre yũ gotiroju tudiaba. Herodes, Jesúre sãaru ñre macarucumi —Josére ñre yiyuju ángel.

¹⁴ To ñ yijare, yujicõari, Jesúre, ñ jacore quẽne ñnamine Egiptoju ñnare ùmato rudicoasuju. ¹⁵ Toju ñna ñnatoyene bajirocacoasuju Uju Herodes. “Egipto sitaju yũ macũ ñ ñaro ñre jicõarucuja yũ”, ñre gotirẽtobosarimasũ suorine Dios ñ yimasire ñajare, to bajirone bajiyuju.

Uju Herodes rãamasare ñ sãarotire queti

¹⁶ Bajirocabecuju, ñocoa ñna bajisere buerimasa ñre gotimenane, gaje maaju ñna tudiarere ajicõari, bũto jũnisiniñuju Herodes. To bajiri jũnisinigũ ñnari, Belén ñnarãre, ti maca tuanare rãamasa juã cũma tusanare ãmũare, to yicõari, ñna bero ruyuararãre quẽne sãaroti-jeocõañuju. Ñocoa ñna bajisere buerimasa, “Juã cũma tũsaju” ñna yirere ajigu ñnari, ñnare sãarotiyuju Herodes.

¹⁷ Raquel ñamasirio so rãare maigõ, so otimasiriarore bajiro Belén macana ñna rãare mairã, ñna otirotire tũoãcõari, ado bajiro ucamasiñumi Diore gotirẽtobosarimasũ Jerem'ias vãme cutigu:

¹⁸ “Ramá vãme cuti macago so rãare so tũoĩa otise ruyurũaroja. Oticõa ñnarũocomo so, Raquel vãme cutigo, so rãare otigo. Gãjerã, ‘Otibesa’ sore ñna yiboajuquẽne, ajibetirũocomo, so rãa ñnamasiboari-ãrãre godocutigo ñnari”, yucamasiñumi Jerem'ias.

¹⁹ Egiptoju José ñ ñnaro rijacoasuju Herodes. Ñ rijato bero, José ñ cãjiriariojũre sãgũ ángel ñre ruyuaõñuju quẽna. To bajicõari, ado bajiro ñre yiyuju:

²⁰ —¡Yujiya! Jesúre, ï jacore quêne Israel sitajũ ïnare ũmato tudiasa. Ñre sïarũaboacana rijajedicoajama ïna — Josére ïre yiyuju ángel.

²¹ To ï yijare, yujicõari, Jesúre, ï jacore quêne Israel sitajũ ïnare ũmato vasuju José. ²² Maa vacũjũ, ajiyuju José: “Herodes ñaboar'i macũ, Arquelao vãme cõtigu, ï jacure vasoagu Judea sitajũ ñañuju”, yire quetire ajiyuju. Ti quetire ajicõari, güigu ñari, tojũ varũabesuju. To bajiro bajigũne, quẽna tojũ cãjiriañuju ï. Cãjiriacõari, “Tojũ yũ vajama, quẽnabetoja. Galilea sitajũa varũcũja yũ”, yitũoĩañuju. ^a ²³ Galilea sitajũ ejacõari, Nazaret vãme cõtĩ macajũ ñagũ vasuju. Diore gotirẽtobosarimasa, “Nazaret macagu ñarũcũmi ‘Rotimũorũgõrũcũmi’ yigu, Dios ï cõarocũ”, Jesúre ïna yuicamasire ñajare, to bajirone bajiyuju.

3

Juan Bautista vãme cõtigu, yucá manojũ masare ï gotimasiore queti

(Mr 1.1-8; Lc 3.1-9, 15-17; Jn 1.19-28)

¹ Tirodori bero, Juan Bautista vãme cõtigu, Judea sitajũ yucá manojũ ejayuju. ² Tojũ ejacõari, ado bajiro ïre ajirã ejarãre gotimasiõrũgũñuju ï:

—Yoaro mene ejarũcũmi “Rotimũorũgõrũcũmi” yigu, Dios ï cõarocũ. To bajiri rojose mũa yisere yitũjacõari, Dios ï bojasejuare yi yuya mũa —ïnare yirũgũñuju ï.

³ Ñne ñañuju, “Ado bajiro yirũcũmi” Diore gotirẽtobosarimasũ Isa'ias vãme cõtimasir'i ï yuicamasir'i. Ado bajiro ïre yuicamasiñuju Isa'ias:

^a **2:22** Arquelao vãme cõtigu ñaboarine, ï jacũ vãmere bajiro Herodes vãme cõtiyuju. Ñ ñañuju Jesúre sēniĩabusaboacũ, Pilato tũjũre Jesúre cõarĩ.

“Yucá manojũ sîgũ masũ ado bajiro goticudirũgũrucumi:
 ‘Mani ɯjũ ejarucumi. To bajiri, rojose mũa yisere
 yitũjacõari, quẽnasejuare tũoĩaña mũa, ãre yurã’
 yirucumi sîgũ”, yuicamasifũju Isa'ias, Juan ã ba-
 jiro tire goti rĩjoro yigũ.

⁴ Camello joane suariaro sãñagũ ñañuju ã. To yicõari,
 vecũ gaserone vẽnãricũñuju, ã sãñasere. Ñimia ba, to
 yicõari, beroa ocore idi, yirũgũñuju. ⁵ ãre ajirã, jãjarã masa
 ejayujarã. Jerusalén macana, Judea sitana, to yicõari,
 Jordán vãme cutiya tuana quẽne ejayujarã, ãre ajirã. ⁶ To
 bajiro ã gotisere ajirã ñari, “Rojose mani yisere Dios
 manire masirioato” yirã, “Rojose yirã ñaja yũa” Diore
 ãna yigotiro bero, Jordán vãme cutirisaju oco rãca ãnare
 bautiza ñañuju Juan.

⁷ To bajiro ã yĩñarone, fariseo masa, to yicõari saduceo
 masa quẽne Juan oco rãca ã bautizasere bojarã ejayujarã.
 ãna ejasere ãcõari, ado bajiro ãnare yiyuju Juan:

—Oco rãca mũare yũ bautizasere bojaboaja mũa. Vãtia
 ɯjũ rojose ã yirore bajirone rojose yijairã ñaja mũa. To
 bajiro bajirã ñari, “Rojose yũa yise vaja rojose yũare
 yibetirucumi Dios” yitũoĩa vadiboaja mũa. ¿To bajiro
 mũa bajise suorine rojose mũa tãmuorotire masibeatique
 mũa? ⁸ Rojasere yitũjacõari, “Quẽnarã ñaama” masa
 mũare ãna yĩãmasirotire yirã, quẽnasejuare yirũgũrona
 ñaja mũa. ⁹ Ado bajiro yitũoĩabesa mũa: “Abraham
 ñãmasir'i jãnerabatia ñãmasurã mani ñajare, rojose mani
 yise vaja rojose manire yibetirucumi Dios” yitũoĩabesa.
 Adiari gũtari rãca Abraham jãnerabatiare ã godoveorũa-
 jama, godoveomasigũmi Dios —ãnare yiyuju Juan. ¹⁰ —
 Oteriayucãri, rica mani yucãrire bajiro bajijaja mũa. Rica
 manijare, quẽareacõari, soereariarore bajiro yirucumi
 Dios. Tire bajirone yiecorũarãja mũa quẽne, mũa tũoĩava-

soabetijama. ¡Quēnase m̄ua yibetire ĩacōari, jeame yatibetimej̄u m̄uare rear̄uc̄umi Dios! —ĩnare yiyuju Juan.

¹¹ Gaje v̄ame ado bajiro gotiyuju Juan:

—Ȳu berore ȳu r̄etoro masiḡũ ejar̄uc̄umi. Ñamasurã r̄ĩne ĩre yibosamasiama, ñamasuḡũ masu ĩ ñajare. Rojose ĩna yisere yit̄ajacōari, Dios ĩ bojasej̄uare yirãre oco rãca bautizarũḡũaja ȳu. To bajiro ȳu yirũḡũse ti quēnaboajaquēne, ȳu bero ejağ̄u ĩ moasej̄ua quēnamasucōar̄aroja. ĩma, Esp'iritu Santore cōamasir̄uc̄umi, masare. ĩ suorine “Dios ĩ bojabetire yaja ȳua” yimasicōari, t̄uõıavasoar̄arãma —ĩnare yiyuju Juan.

¹² Gaje v̄ame ado bajiro masare gotiyuju Juan:

—Ȳu bero ejağ̄uj̄uama, trigo ajere beseḡure bajiro yir̄uc̄umi, masare. To bajiri ti gasere yireacōari, soereari-
arore bajiro yir̄uc̄umi, jeame yatibetimej̄u masare cōaḡũ, to yicōari, quēnase cōrone juaḡure bajiro yir̄uc̄umi, ĩre ajitir̄ũnr̄are juavac̄u —ĩnare yiyuju Juan.

Oco rãca Juanre Jesús ĩ bautizarotire queti

(Mr 1.9-11; Lc 3.21-22)

¹³ Cojor̄ũm̄u Galilea sitaj̄u ñar'i, Jordán v̄ame c̄utirisaj̄u vasuju Jesús. Juan t̄uj̄u ejacōari, oco rãca ĩre bautizarotiyuju. ¹⁴ To bajiro ĩre ĩ yiboajaquēne, oco rãca ĩre bautizar̄abesuju Juan:

—Bajibeaja. No yiḡu m̄ure bautizamasibec̄uja ȳu. M̄uj̄ua, ȳu r̄etoro masiḡũ ñari, oco rãca ȳure bautizaroc̄u ñaja m̄u —Jesúre ĩre yiyuju Juan.

¹⁵ To ĩ yisere ajicōari, ado bajiro ĩre yic̄udiyuju Jesús:

—Ȳure oco rãca m̄u bautizasere bojaami Dios. Ñajediro Dios ĩ rotirore bajiro c̄udiroti ñaja manire —Juanre ĩre yiyuju Jesús.

To bajiro ĩ yijare,

—Baꝯ. To bajirone bojaroja —ïre yicudicõari, Jesúre oco rãca ïre bautizayuju Juan. ¹⁶ Jesús ï majarügürirïmarone ãmãagasero soje jãnacuasuju ti. Ti jãnarone, õ vecajũ Jesús ï ãmãorone, bujare bajigũ rujiadicõari, Jesús joere rocajeoyuju Esp'iritu Santo. ¹⁷ Jesús joere ï rocaejaronne, ado bajiro yi ocaruyuyuju õ vecajũ:

—Yũ macũ, yũ maigũ masu ñaja mũ. Mũ rãca buto variquẽnaja yũ —ïre yi ocaruyuyuju.

4

Dios ï bojabetire vãtia ẽjũ, Satanás, Jesúre ï yirotiãre queti

(*Mr 1.12-13; Lc 4.1-13*)

¹ Jesús, oco rãca Juanre ï bautizarotiro bero, yucú manojũ ïre ãmato vasuju Esp'iritu Santo, “Satanás ï bojarore bajiro rojose Jesúre ïre yirotiãto” yigũ.

² To bajiri tojũ, yucú manojũ jũarã masa cõro ñarirũmũri, ñamiri quẽne tocãrãca ñamirine babecũne ñacõarũgũñuju Jesús. To bajigũ ñari, buto ñiorijayuju ï yuja. ³ To ï bajiro ïacõari, ado bajiro rojose ïre yirotiãboayuju vãtia ẽjũ, Satanás:

—Dios macũne mũ ñajama, adiarĩ gũtarine pan godoveoya mũ —ïre yirotiãboayuju, Jesúre.

⁴ To bajiro Satanás ïre ï yiboajaquẽne,

—Yibeaja yũ. Dios oca masa ñna ucamasire ado bajiro gotiaja: “Bare rĩne ñamasuse me ñaja. Dios ocare manĩ cudisejũa ñaja ñamasusema. ‘Bare ti manijare, rijarearũarãja’ yire ti ñaboajaquẽne, Dios rijarere ï bojabetijama, rijabetirũarãja. ‘Caticõa ñato’ yigũ yimasigũ ñaami ï”, yigotiaja Dios oca masa ñna ucamasire —ïre yiyuju Jesús.

⁵ To ï yiro bero, Jerusalénjũ, Dios ï beseria maca ñamasuri macajũ Jesúre ïre ãmato vasuju Satanás. To ejacõari,

Diore yirũcũbuoriavi joeju ĩre ũmato mũjasuju. ⁶ To ĩre ũmato mũjajecõari, ado bajiro yiyuju Satanás:

—Dios oca masa ĩna ucamasire ado bajiro gotiaja:

“Īre moabosarimasa ángel mesare mũre coderotirũcumi Dios. Mũ quedajama, ‘Gũta joeju rocajeocõari, ĩ gũbo jearomi’ yirã, mũre boca ñiarũarãma ĩna”, yigotiaja Dios oca.

To bajiri Dios macũne mũ ñajama, adojũne jatiquedi rujiaĩasaque mũ —Jesũre yirotoiboayuju Satanás.

⁷ To bajiro ĩ yiboajaquẽne, Jesũjũama, ado bajiro ĩre yiyuju:

—To bajiro mũ yisere cũdibeaja yũ. “Dios ĩ yiriarore bajiro yũre boca ñiarũarãma ángel mesa” yigũ, yũ jatiquediĩajama, Dios ĩ bojabetire yigũ yigũja yũ. Gajeye ado bajiro gotiaja Dios oca masa ĩna ucamasire: “‘Dios, ‘Yirũcũja’ yiyumi’ yitũoĩacõari, ‘To bajiro masu yirũ yiyujari’ yimasirũarã, mũa tũoĩarore bajiro mũa yiajajama, quẽnabeaja”, yigotiaja Dios oca masa ĩna ucamasire —ĩre yiyuju Jesús, Satanáre.

⁸ To bajiro ĩ yiro bero, gũtau mũmaricũ joeju Jesũre ũmato vasuju Satanás quẽna. Toju ũmato ejacõari, adi macarũcũro ñarimacari jediro ĩre ĩojeocõañuju. ⁹ ĩre ĩogajanocõari, ado bajiro ĩre yiyuju Satanás:

—Yũ rĩjorojũa gũsomuniari tuetucõari, “Yũ mũju ñamasugũ ñaja mũ” yũre mũ yirũcũbuojama, adi sita ñajedirore mũre ĩsirũcũja yũ —Jesũre ĩre yiyuju Satanás.

¹⁰ To bajiro ĩ yise ñajare, ado bajiro ĩre cũdiyuju Jesús:

—Vasa mũ. Ado bajiro gotiaja Dios oca masa ĩna ucamasire: “Mani mũju Dios sigũrene, ‘Yũ mũju ñamasugũ ñaja mũ’ ĩre yirũcũbuocõari, cũdiroti ñaja”, yigotiaja Dios oca masa ĩna ucamasire —Satanáre yiyuju Jesús.

¹¹ To bajiro Jesús ĩ yisere ajicõari, vacoasuju Satanás yuja. ĩ vato bero, Jesũre ejarẽmorã ejayujarã ángel mesa.

Galilea sitaj Jesús ĩ gotimasiosuore queti

(*Mr 1.14-15; Lc 4.14-15*)

¹² “Tubiberiavij^u tubibe ecocoajami Juan” yise quetire ajicōari, Galilea sitaj^u tudicoasuju Jesús. ¹³ To va, ĩ ya maca Nazaret vāme cūti macaj^u eja, no cōro mene ñaboa, Capernaum vāme cūti macaj^u ñag^u vasuju. Ti maca ñañuju ũtabucura Galilea vāme cūтира tuj^u, Zabolón sita, to yicōari, Neftal'i sita t^u ñarimaca. ¹⁴ Ti macaj^u Jesús ĩ ñajama, Diore gotirētosarimasu Isa'ias vāme cūtimasir'i, ado bajiro ĩ yuicamasire ñari, bajiyuju:

¹⁵⁻¹⁶ “Jordán vāme cūtirisa jodej^u Galilea vāme cūтира ñaja. Tira ture ñaja Zabolón sita, to yicōari Neftal'i sita. Ti sitajure jud'io masa me ñaama, Diore masimena.

Īnare gotimasiočari, rojose ĩna tāmuborotire ĩnare yirētosarocure cōarucumi Dios, ĩ bojarore bajiro ‘Quēnaro yirã ñato’ yig^u”, yuicamasiñumi Isa'ias. To bajiro ĩ yuicamasiriarore bajirone, ti sitaj^u ejayuju Jesús.

¹⁷ Ti sitaj^u ejacōari, Dios ocare, ado bajise masare gotimasiočudisuooyuju Jesús:

—Diore rotibosarocu, ĩ rotisuroti mojoroaca ruyaja. Uj^u Dios yarã quēnaro ĩ yirona m^u ñarujajama, rojose m^u yisere yitujacōari, yure ajitirūñña —masare yigotimasiocudisuooyuju ĩ.

Vai sīarimasa babaricārãc ñaräre Jesús ĩ jire queti

(*Mr 1.16-20; Lc 5.1-11*)

¹⁸ Cojorūm^u, ũtabucura Galilea vāme cūтира tuj^u vacudig^u vasuju Jesús. To vacuj^u, ñañuju, Simón vāme cūtigure, bero Pedro vāme cūtirocure, ĩ bedi Andrére quēne. Vai sīarimasa ñañujarã ĩna. Bajiyucurire rearoderuu yĩñañujarã ĩna. ¹⁹ ĩna t^u ejacōari, ado bajiro yiyuju Jesús:

—Yũ rãca vayá. Yucurema mua vai vejese ùnirene masa yure ñna ajitirũnurotore gotimasiobosarimasa ñaruarãja mua —ñnare yiyuju Jesús.

²⁰ To ï yirirĩmarone, ñna bajiyucũre cũ, ñre suyacoasujarã.

²¹ To yi varũtu vacũne, gãjerã juarã ñnarãre ñnare jiyuju Jesús. Ñna ñañujarã Santiago, ï bedi Juan rãca. Ñna jacũ Zebedeo rãca cũmuajũ ñna bajiyucũre siaquẽno sãñañujarã. ²² To ï yisere ajicõarãjũma, ñna jacure, to yicõari ñna cũmuare quẽne vaveocoasujarã, Jesũre suyana.

Masa jãjarãre gotimasiocõari, rijaye cutirãre Jesús ï catiore queti

(Lc 6.17-19)

²³ Galilea sitajũ gotimasiocudiyuju Jesús. Tocãrãca macarirene Dios ocare ñna buerivirijũ sãjaejacõari, oca quẽnasere masare ñnare gotimasioñuju. “Ujũ Dios yarã quẽnaro ï yirona mua ñarũajama, rojose mua yisere yitũjacõari, yure ajitirũnũña”, ñnare yigotimasioñuju. To yicõari, rijaye cutirãre ñnare catioyuju. ²⁴ To bajiri Jesús rijarãre ï catiosere masa ñna gotibatojare, Siria sitana quẽne tire ajicõari, rijaye cutirãre juajayujarã, “Jesũ ñnare catiato” yirã. Ñna usũrijũ vãtia sãñarãre quẽne juajayujarã, “Vãtiare bureato Jesús” yirã. Rijaquedirãre, to yicõari, micarãre quẽne juajayujarã, Jesũre catorotirã. Ñna ñnaro cõrone ñnare catioyuju.

²⁵ Jesús ï vacudiro cõrone, jãjarã masa ñre suyajojicõañujarã. Galilea sitana, Decápolis macana, Jerusalén macana, Judea sitana, to yicõari, Jordán vãme cutirisa gajejacatuana quẽne ñre suyarũgũñujarã ñna.

5

Buro joejũ ñnacõari, Jesús masare ï gotimasiore queti

¹⁻³ Jājarā masa ĩna ñasere ĩacōari, burojũ majaejayuju. To ĩ bajirone, ĩ buerā ĩ tũ rējañujarā. ĩna ejaro ĩacōari, ado bajiro ĩnare gotimasiosũoyuju Jesús:

—“Masimena ñari, mũ ejarēmose buto bojaja yũ”, Diore ĩre yisēnirũgũrāma, ĩ yarā ñarāma. To bajiri, rojose tāmũoboarine, Dios tũjũ variquēnarona ñarāma.

⁴ Yucũrire Dios ĩ bojabetire yicōari, tũoĩasũtiritiñarā quēne, variquēnarona ñarāma, berojũ ĩna tũoĩasũtiritisere Dios ĩnare ĩ yirētosaroti ti ñajare.

⁵ “Masimena ñaja yũ” yirā, Dios ĩ ejarēmosere sēnirũgũrā ñari, Dios ĩ goticatore bajirone variquēnarũarāma, adi macarũcũroana mũjarā ĩna ñarotire Dios ĩnare ĩ yirētosaroti ñajare.

⁶ Gajeye rētoro Dios ĩ bojasere yirũa tũoĩarā quēne, variquēnarona ñarāma, “Yũ bojasere yivariquēnato” yigũ, Dios, ĩnare ĩ ejarēmose ti ñajare.

⁷ Gājerāre ĩamaicōari, quēnaro yirā quēne, variquēnarũarāma, Dios quēne, ĩnare ĩamaicōari, quēnaro ĩ yiroti ti ñajare.

⁸ Dios ĩ bojarore bajiro rĩne quēnase tũoĩarā variquēnarāma ĩna quēne, berojũ Diore ĩarona ñari.

⁹ Quēnaro ñarotire oca quēnorā quēne, variquēnarũarāma, “Yũ rĩa ñaama” Dios ĩ yĩarona ñari.

¹⁰ Dios ĩ rotirore bajirone ĩna yise sũorine gājerājũa rojose ĩnare ĩna yiboajaquēne, variquēnarũarāma, Mũjũ Dios yarā quēnaro ĩ yirā ñari.

¹¹ Yũre mũa ajitirũnũse sũorine gājerā mũare ajatud'icōari, “Rojorā ñaama” mũare ĩna yisocaboajaquēne, variquēnarũarāja mũa. ¹² To bajiro mũare ĩna yiboajaquēne, buto variquēnaña mũa, “Berojũ Dios tũjũ ejarā, quēnase bũjarũarāja” yimasirā ñari. Mũa rĩjoroana, Diore gotirētosamasiriarāre quēne,

rojose mũare ãna yirore bajirone ãnare quẽne rojose yimasiñujarã masa — ãnare yiyuju Jesús.

“Adi macarucurojũre moa ocasere bajiro, to yicõari, busubatosere bajiro bajiroti ñaja mũare”, ã buerãre Jesús ã yigotimasiore queti

(Mr 9.50; Lc 14.34-35)

¹³ Quẽna ado bajiro ã buerãre ãnare gotiyuju Jesús:

—Moa ñaja bare sãre. Mũa barotire vaibucu rii catisere cũrãma, moa turãja mũa, “Boarobe” yirã. Moa ti ocaboase ti ocabeticoajama, “Quẽna tudiocato” yirã, no bajiro yimasimenaja mũa. To bajiri, tire reacõarãja, “Tire masa cudavũoreacõato” yirã. Moa ocatujabetire bajiro mũa bajijama, quẽnaja. Yũre mũa ajitirũnu tujabetijama, moa ocatujabetire bajiro bajirã ñarũarãja mũa. To bajiboarine, yũre mũa ajitirũnu tujajama, quẽna yũre tudiajitirũnũbetirũarãja. Mũa suorine quẽnaro yimenama gãjerã. To bajiri mũare bojabetirucuja — ãnare yiyuju Jesús.

¹⁴ Quẽna ado bajiro ãnare gotiyuju:

—Rõtiarojũre busubatosere bajiro bajiroti ñaja mũare. To bajiro mũa bajijare, busubatose quẽnaro ti ruyurore bajirone mũare ãarũarãma masa. Jairimaca buro joejũ ñarimaca quẽnaro ti ruyurore bajirone mũare ãajedicõarũarãma. ¹⁵ Sĩabusuoriare jẽocõari, sotũne tiare mũbũamenaja mũa. Tiare jẽocõari, “Ñajediro ti vianare busuato” yirã, vecajũ jeorãja mũa. ¹⁶ Tire bajirone quẽnaro yiya mũa, “ ‘Quẽnaro yirã ñaama, Diore ajitirũnũrã ñari’ yimasiato masa jediro” yirã, to yicõari, “Mani jacũ õ vecagũre quẽnase ãre yirũcũbũoato ãna” yirã — ãnare yiyuju Jesús.

Moisės ñamasir'ire Dios ã roticũmasirere Jesús ã gotimasiore queti

¹⁷ Quẽna ado bajiro ã buerãre ãnare yiyuju Jesús:

—“Moisés ñamasir'ire Dios ï roticũmasirere, to yicõari, Diore gotirẽtobosarimasa ñna gotimasiomasirere reagu vayumi Jesús”, yituoĩabesa mua. Tire reaguagu me vadicaju yu. “Tire quẽnaro riojo ajimasiato” yigu, vadicaju yu. ¹⁸ Riojo muare gotiaja yu. Moisére Dios ï roticũmasire, to yicõari, Diore gotirẽtobosarimasa ñna gotimasiore ñajediro ñacõarũgũruaroja. Adi macarucuro jediroto rĩjoro, cojo vãme godocutibetiruaroja. Ñajediro Dios ï gotiriarore bajirone bajiruaroja. ¹⁹ No bojagu, Moisére Dios ï roticũmasire ñamasuse me ti ñaboajaquẽne, tire cudibecu, “No yibeaja, mani cudibetijaquẽne” yigotimasioğũ ñagũmi quẽnabecu. Uju Dios yarã quẽnaro ï yirã rãcagu ñamasugũ me ñarucumi ï uğũma. No bojagu Moisére Dios roticũmasirere cudicõari, “Tire mani cudijama, quẽnaja” yigotimasioğũ ñagũmi quẽnagũ. To bajiri Uju Dios yarã quẽnaro ï yirã rãcagu ñamasugũ ñarucumi ijuama. ²⁰ Riojo muare gotiaja yu. Moisére Dios ï roticũmasire gotimasioremasa, fariseo masa quẽne, quẽnaro ñna yiboase rẽtoro quẽnaro mua yibetijama, Uju Dios yarã me ñaruarãja mua quẽne.

²¹ Dios ï rotimasire gotimasioremasa suorine ado bajise ajirũgũaja mua: “Sĩabesa. ï sĩajama, ï sĩase vaja ïre sĩaroti ñaja”, yimasirere ajirũgũaja mua. ²² Yuma, ado bajiro muare gotirẽmoaja: Jũnisinire quẽne rojose ñaja. No bojagu gãjire jũnisinigũ ï jũnisinise vaja rojose ïre yiroti ñaja. No bojagure gãjire jũnisinicõari, rujajine, “Vaja magũ ñaja mu” ïre yiguma, rujajine ï yise vaja, “Rojose tãmuorucumi”, ïre yiruãrãma ujarã. No bojagure, gãjire jũnisinicõari, ïre tud'igurema, ï tud'ise vaja, jeame yatibetimeju ïre cõacõarucumi Dios, muare yaja yu.

²³ Tire masirã ñari, gajeyere quẽne tuoĩaña mua. Diore rucubũorã soemuoriaju vacune, “Rojose ïre yibu yu” mua yituoĩabujajama, Diore rucubũorã ïre mua

soemuoĩsirotire soemuoƚeja maji. ²⁴ Tire cũcõari, rojose m̄a yir'i tũjũre vasa, ĩre oca quẽnorõana. ĩre oca quẽnogajanocõari, Diore soemuoĩsiroana tudivaja yuja, m̄are yaja yũ. “Rojose m̄a yir'ire oca quẽnocõari rĩne, Diore oca quẽnomasiruarãja”, m̄are yigũ yaja.

²⁵ Gajeye ado bajiro bajijaja: Gãjire rojose m̄a yijama, oca quẽnorimasũ tũjũ m̄a ejaroto rĩjoro, ĩ rãca oca quẽnoroti ñaja m̄a juarãjũne. Oca quẽnorimasũ tũ ejamenane, m̄a oca quẽnobetijama, masare coderimasure juarotirũcũmi, m̄are. ĩjũa, m̄are tubiberũcũmi.

²⁶ Riojo m̄are gotijaja yũ. Rojose m̄a yire vaja m̄a vaja yibetijama, budimenaja m̄a. Tire bajirone bajiruarõja Dios ĩ vaja sãnirirũmũ ejaroto rĩjorojũa, rojose m̄a yir'ire ĩre oca quẽnoña. M̄a gãmerã oca quẽnobetijama, Dios ĩ vaja sãnirirũmũ rojose tãmũotũjabetiriarõjũ m̄are cõarũcũmi, tudibudire manõjũ —ĩnare yiyuju Jesús.

“*Gãji manajore rũcũbuõya*”, Jesús ĩ yigotimasiore queti

²⁷ Quẽna gajeye ado bajiro yiyuju Jesús:

—Dios ĩ rotimasire gotimasierimasa suorine ado bajisere ajirũgũaja m̄a: “Gãji manajo rãca ajerio cũtibesa”, yirere ajirũgũaja. ²⁸ Yũma, ado bajiro m̄are gotirẽmoaja: Rõmio, no bojagore yirũa tũõĩare quẽne rojose ñaja. No bojagũ, rõmiore yirũa tũõĩagũ, ĩ tũõĩasene sore ajerio cũtigũ yigũmi ĩ ũgũma, m̄are yaja yũ —yiyuju Jesús.

“*Bũto m̄a maise ti ñaboajaquẽne, ti suorine Dios ĩ bojabeti ñaja*’ m̄a yijama, tire reacõaña”, Jesús ĩ yigotimasiore queti

²⁹ Quẽna ado bajiro gotimasioñuju Jesús:

—“Yũ cajea riojojacatuaga suorine ĩabõjacõari, rojose yibũ yũ” m̄a yitũõĩajama, tiare ãmirocacõaña. Coja cajea m̄are ti manijama, quẽnabetõja. To bajiboarine, juarũjũne caje cũticõari, m̄a bajireajama, jeame yatibetimejũ m̄a

vajama, rētoḅsaro quēnabetiruaroja. ³⁰“Yḅ āmo suorine rojose yibḅ yḅ” mḅa yitḅoĭajama, ti āmore jatarocacōña. Mḅare cojo āmo ti manijama, quēnabetoja. To bajiboarine jḅaāmo rāca mḅa bajireajama, jeame yatibetimejḅ mḅa vajama, rētoḅsaro quēnabetiruaroja —ī buerāre ĩnare yiyuju Jesús.

“Mḅa manajoare reabesa”, Jesús ĩ yigotimasiore queti
(Mt 19.9; Mr 10.11-12; Lc 16.18)

³¹ Quēna ado bajiro ĩnare gotimasioñuju Jesús:

—Gajeye ado bajiro gotiaja Moisére Dios ĩ roticūmasire: “No bojagḅ ĩ manajore ĩ rocarḅajama, ‘Mḅre rocagḅ yaja’ yise papera ucacōari, sore ĩsiroti ñaja”, yigotiaja Dios ĩ rotimasire. ³² Yḅma, ado bajiro mḅare gotiaja: ĩ manajo gāji rāca so ajeri cḅtibetiboajaquēne, sore ĩ rocajama, ḅto rojose sore yigḅ yigḅmi ĩ ũgḅma. To bajiro ĩ yise suorine, gāji rāca so manajḅ cḅtijama, Diojḅama, “So manajḅ me rāca ajeri cḅtiamo”, yīĭagḅmi. Ūmḅre quēne, gāji ĩ rocario rāca ĩ manajo cḅtijama, “ĩ manajo me rāca ajerio cḅtiami”, yīĭagḅmi Dios. To bajiri mḅa manajoa gājerā rāca ĩna ajeriarā cḅtibetijama, ĩnare reabetiroti ñaja —ī buerāre yigotimasioñuju Jesús.

“Riojo mḅa gotijama, quēnaja”, Jesús ĩ yigotimasiore queti

³³ Quēna gajeye ado bajise ĩnare gotiyuju Jesús:

—Dios ĩ rotimasire gotimasiorimasa ado bajiro mḅare ĩna gotimasirere ajirḅgḅaja mḅa: “No bojase mḅa yirotere mḅa yirḅajama, ‘Yimasucōarḅarāja yḅ. Tire yḅa yibeti-jama, Dios, rojose yḅare yibogḅmi’ yirā, ‘Yirḅarāja’ mḅa yirore bajirone yiba”, yirere ajirḅgḅaja mḅa. ³⁴⁻³⁶ To bajiri cojojirema mḅa gotirore bajiro yiterā ñari, ado bajiro tḅoĭavasoaboaja mḅa: “ ‘Dios vāme rāca riojo yaja’ mani yijama, rojose manire yibogḅmi” yirā ñari, “Dios

vāmere gotivasoarã yaja уа” yirã, gaje vāmere õ ve-
cayere gotiboaja мѡа. To bajiro yimena quēne, gaje vāme
rāca, macarꝛꝛꝛoayere yiboarāja. Tire yiterã, Jerusalén
vāme cūti macayere yiboarāja. To bajiro мѡа yibeti-
jama, gaje vāme rāca, мѡа рꝛꝛꝛoare quēne, to yicōari,
мѡа joare quēne yiboarāja мѡа, ñise, botise мѡа joare
godoveomasimena ñaboarine. Ti ũnire yibetiroti ñaja.
³⁷ “Yiruarāja” yirã quēne, “Yiruarāja” yi, “Yibetiruarāja”
yirã quēne, “Yibetiruarāja” yicōa tujasa. “Socarã me yaja
уа” yirã, gajeye мѡа gotirēmojama, vātia ꝛꝛꝛ ejarēnose
rāca gotirēmorã yirāja мѡа —ĩnare yigotiyuju Jesús.

“*Rojose мѡа*re yirãre gãmebeja”, Jesús ĩ yigotimasiore
queti

(Lc 6.29-30)

³⁸ Quēna gajeye ado bajiro ĩ buerãre ĩnare gotiyuju
Jesús:

—Dios ĩ rotimasire gotimasiorimasa ado bajiro мѡаre
ĩna gotimasirere ajirũgũaja мѡа: “Mѡ cajeare ĩ jajama,
мꝛꝛꝛ quēne, ĩ cajeare jaroti ñaja. Mѡ gujiare ĩ jajea-
jama, мꝛꝛꝛ quēne, ĩ gujiare jajeeroti ñaja”, yimasirere
ajirũgũaja. ³⁹ Yꝛꝛꝛama, ado bajiro мѡаre gotiaja: Rojose
мѡre yigure gãmebesa. Ado bajiroꝛꝛa yiya: Cojojacatuã,
мѡ vayujuare ĩ jajama, gajejacatuare quēne ĩre jarotiya.
⁴⁰ Gãji, мѡre ocasãrꝛ, “Rojose yure yibu мѡ. To bajiri,
rojose мѡ yise vaja мѡ sudirore yure ĩsiña. Mѡ ĩsi-
betijama, мѡre ocasãrꝛꝛꝛa yꝛꝛ” ĩ yijama, ĩre ĩsiña. To
yicōari, gajease quēnabusariase ĩre ĩsirēmocōaña. ⁴¹ Sīgũ
ĩ gajeyeũnire мѡre ũmaroticōari, “Adone cūcōaña мѡ”
мѡre ĩ yiboajaquēne, мѡ vadiriacūcōrone gãme varē-
mocōariju ĩre cūbosaya. ⁴² No bojarã мѡre gajeyeũni
sēnirãre ĩsiña. Sīgũ, gajeyeũni magũ ñari, “Yure vasoaya”
мѡre ĩ yijama, ĩre vasoaya —ĩ buerãre ĩnare yiyuju Jesús.

“*Manire ãaterãre quẽne*, mani ãamaijama, quẽnaja”,
Jesús ã yigotimasiore queti

(Lc 6.27-28, 32-36)

⁴³ Quẽna ado bajiro ãnare yiyuju Jesús:

—Dios ã rotimasire gotimasiorimasa ado bajiro mware ãna gotimasirere ajirũgũaja mua: “Mua babarãre quẽnaro ãamaiña. To yicõari, mware ãaterãre ãateya”, yimasirere ajirũgũaja. ⁴⁴ Yũjuama, ado bajiro mware rotiaja: Mware ãaterãre quẽne ãamaiña. Mware rojose yirãre quẽne quẽnaro ãna bajirotire yirã, Diore ãnare sãnibosaya mua. ⁴⁵ To bajiro mua yijama, “Mani jacũ õ vecagũ rã ãaja yua” yĩorã yirãja mua, ã bojarore bajiro yirã ãari. Masa jedirore quẽnaro yirũgũgũmi Dios. ãre cudimenare quẽne quẽnaro yirũgũgũmi. ã ãagũmi quẽnarãre, rojorãre quẽne, “Busuato” yigũ, muijure busurotigũ, to yicõari, ocore quẽne quedirotigũ. ⁴⁶ Mware ãamairã rĩne mua ãamaijama, ¿“Quẽnaro yaja mua” mware yi, vaja yigũjari Dios? Yibecũmi. Rojorã, ãjũre gãjoa sãnibosarimasa, ãnare ãamairã rĩrene ãamairũgũama ãna quẽne. ⁴⁷ Mua tu ejarãre mware bajiro bajirã rĩrene mua sãnijama, ¿“Quẽnaro yaja” mware yi, vaja yigũjari Dios? Yibecũmi. Diore ajimena quẽne, ãnare ãamairã rĩrene ãamairũgũama ãna quẽne. ⁴⁸ To bajiri mwarũama, mani jacũ õ veca ãagũ quẽnase rĩne ã yirore bajiro yirã ãaña mua. Mware rojose yirãre quẽne, mware bajiro bajirã mere quẽne ãamaicõari, quẽnaro yiroti ãaja —ãnare yiyuju Jesús.

6

“*Gãjerã mware ãacõari*, ‘ “Quẽnaro yirã ãaama” mware yĩarũcũbũoato’ yirã me, quẽnaro yiya”, Jesús ã yigotimasiore

¹ Quẽna ado bajiro ã buerãre ãnare yiyuju Jesús:

—Quēnaro m̄ua yijama, “ ‘Quēnaro yama ĩna’ yato gã-
jerã” yirã me, quēnaro yiya m̄ua. Masa ĩna ĩaro rĭjorojua
rĭne, “ ‘Quēnaro Diore c̄udirã ñaama’ yuare yĩato ĩna”
yirã, m̄ua yĩoboajama, ñie vaja b̄ujamenaja m̄ua, õ vecaju
mani jac̄u Dios t̄uju ejarã. ² Sĭgũri, “Quēnarã ñaja yua”
yiboarine, ĩna yirore bajiro yirã me ñarãma ĩna. Ado
bajirojua yirã ñarãma: Maioro bajirãre ejarẽmorã, ĩnare
ĩna ĩsijama, masa jedirore gotibatorãma. Dios ocare ĩna
buerivijure rẽjarãre quēne, jãjarã masa ĩna vati maarijure
quēne ñacõari, ĩnare gotibatorãma, “ ‘Quēnarã ñañuma’
yuare yĩarũc̄ubuoato” yirã. To bajiro ĩna yirore bajiro
yibesa m̄ua. Riojo m̄uare gotiaja yu. To bajiro ĩna yise vaja
masa ĩnare ĩna r̄uc̄ubuosene jẽre vaja b̄ujacõama ĩnama.
Ñie gajeye b̄ujarẽmobetiruarãma, Dios t̄ujure. ĩnare
masa ĩna r̄uc̄ubuoobajaquēne, Diojua, ĩnare r̄uc̄ubuo-
betiruc̄umi. ³ M̄uajuama, maioro bajirãre m̄ua ejarẽ-
mojama, “ ‘Quēnaro yirã ñaama ĩna’ yuare yĩato” yirã
me, ĩnare ejarẽmoña. To yicõari, m̄ua baba ñamasugũre
quēne, “To bajiro yib̄u yua” yigotimenane, ĩnare ejarẽ-
moña. ⁴ To bajiro maioro bajirãre quēnaro m̄ua yijama,
masa ĩabetore bajiro yirã yiruarãja m̄ua. To bajiro m̄ua
yijama, mani jac̄u, masa ĩabetoju ĩamasigũ ñari, quēnaro
m̄ua yise vaja, quēnaro m̄uare yiruc̄umi —ĩ buerãre ĩnare
yiyuju Jesús.

Diore mani sēnirotire Jesús ĩ gotimasiore queti
(Lc 11.2-4)

⁵ Quēna ado bajiro ĩnare gotimasioñuju Jesús:

—Sĭgũri, “Quēnarã ñaja yua” yiboarine, ĩna yirore
bajiro yirã me ñarãma ĩna. Ado bajiro yirã ñarãma:
Diore ĩna sēnijama, Dios ocare ĩna buerivirij̄u r̄ugõcõari,
sēnirãma. To yicõari, jãjarã masa ĩna vati maarijure
quēne ñacõari, Diore ñagõrãma. To bajiro yirãma,
masa ĩna ĩarũc̄ubuosere bojarã ñari. To bajiro ĩna yise

vaja masa ñna ñarũcũbuosere jẽre bujacõarãma ñna. Ñie gajeye bujarẽmobetiruarãma, Dios tujure. Ñnare masa ñna ñarũcũbuoboajaquẽne, Diojuama, ñnare ñarũcũbobe-tirucumi. To bajiri, mũama, Diore mũa ñagõjama, ñna yirore bajiro Diore ñagõbesa mũa. ⁶ Mũama, Diore mũa sãnijama, gãjerã mũare ñna ñabeto sãniruarã ñnari, mũa ya sõaju tubibesãjacõari, ñre sãnina. To bajiro yicõari, mani jacũ ruyubecũre ñre sãnina. Masa ñna masibeto Diore mũa sãnijama, to bajiro mũa yise vaja, mũare vaja yirucumi mani jacũ, masa ñna ñabetiboajaquẽne mani tuoĩasere masigũ ñnari —ñnare yiyuju Jesús.

⁷ Quẽna ado bajiro ñnare gotimasioñuju Jesús:

—Dios yarã me ñnarã, ñna rũcũbuogũre sãnirã, cojoji me sãnijajerãma ñna, “Cojoji me tire mani sãnijama, manire ajigũmi” yituoĩarã ñnari. ⁸ Ñnare bajiro yibesa mũama. Mũa bojase mũa sãniroto rĩjorojũne jẽre masicõagũmi Dios. ⁹ To bajiri Diore mũa sãnijama, ado bajiro sãnina:

“Yua jacũ, masa ñnadediro, ‘Quẽnarẽtogũ ñaja mũ’ mũre yirũcũbuoato ñna.

¹⁰ Adi macarucuroana, mũ bojase rĩne yua yiotire tuoĩa yurũgũaja yua. Jẽre õ vecaju mũ ñaroju mũ yarã mũ rotirore bajirone yiñarãma. To bajiri adi macarucurojũre quẽne mũ rotirore bajiro rĩne yirere bojaja yua.

¹¹ Adirũmũ yua barotire cõañna mũ.

¹² “Rojose yua yisere masirioya” mũre yisãnijaja yua, yũare rojose yirãre quẽne masiriorã ñnari.

¹³ Rojose yua yiotire masigũ ñnari, “Tire yibeticõato ñna” yigũ, yũare matabosaya”. To bajiro Diore mũa sãnijama, quẽnaja —ñnare yiyuju Jesús, ñ buerãre.

¹⁴ Quẽna ado bajiro ñnare gotimasioñuju Jesús:

—Mũare rojose yirãre mũa masiriojama, mani jacũ õ vecagũ rojose mũa yisere masiriorucumi ñ quẽne.

¹⁵ Gãjerãre rojose ìna yisere mua masiriobetijama, mani jacu quêne rojose mua yisere masiriobeticumi —ìnare yiyuju Jesús, ì buerãre.

Diore rucuborã, bare bamenane mani sēniroti queti

¹⁶ Quēna ado bajiro ìnare gotimasioñuju Jesús:

—Sīgūri, “Quēnarã ñaja yua” yiboarine, ìna yirore bajiro yirã me ñarãma. Bare bamenane Diore ìna sēnijama, “‘Sutiritiama’ yĩato ìna” yirã, sutiritirãre bajarã ñaĩorãma ìna. To bajiro yirãma, “‘Ìna, Diore rucuborã, bare bamena bajarãma’ masa yuare yĩato” yirã. To bajiro ìna yirore bajiro yibesa muama. Riojo muare gotiaja yu. To bajiro ìna yise vaja masa ìnare ìna rucubosene jere vaja bujacõama ìnama. Ñie gajeye bujarēmobeticuarãma, Dios tujere. Ìnare masa ìna rucuboboajaquēne, Diomuama, ìnare rucubobeticumi. ¹⁷⁻¹⁸ Muajuama, Diore rucuborã, bare bamenane ìre mua sēnijama, sutiritirãre bajiro bajibesa. Mua yirũgũrore bajiro mua joare quēne quēnaro siroa, riogare quēne quēnaro coe, yiya, “Masa yuare ñacõari, bare yua babetire masibeticõato” yirã. To bajiro mua yijama, mani jacu gãjerã ìna ñamasibetiboajaquēne, ñamasigũ ñari, muare vaja yirucumi —ìnare yiyuju Jesús.

Õ vecaju Dios tujũ quēnase mani bujaroti queti

(Lc 12.33-34)

¹⁹ Quēna ado bajiro ìnare gotimasioñuju Jesús:

—Adi macarucuroju, “Gajeyeũni jairo juarēocũuarãja” yirã me moaña mua. Gajeyeũni mua juarēocũboasere bareuarãma gajeyeũni barimasa. Gajeyema, boaruroja ti. To yicõari, gajeyerema juarudicuarãma juarudirimasa. ²⁰ Ado bajirojua yirã ñaña mua: “Õ vecaju mani jacu tujũ ì bojarore bajiro quēnaro mani yise vaja, quēnaro manire yirucumi” yituoĩacõari, quēnaro yirã ñaña. Õ

vecayejũarema, quẽnaro mũare Dios ã yisere barearã manama. Boabetirũaroja tima. To yicõari juarudirimasa quẽne, ejabetirũarãma. Dios manire quẽnaro ã yise jedibetirũaroja. ²¹Mũa vaja tarere mũa quẽnocũ vajama, ti rione tũoĩarejaicõa ñarãja mũa. Tire yimenane, “Quẽnaro yũa yise vaja õ vecaju vaja tacũrã yaja” yitũoĩacõari, quẽnaro yirũgũña mũa.

²²⁻²³ Mũa caje quẽnaro ti ruyujama, “Tine ñaja quẽnamasuse”, yĩamasijaja mũa. To bajiboarine, mũa caje quẽnaro ti ruyubetijama, quẽnabetire ãcõari, mũa masune, “Ti ñaja quẽnamasuse”, yisocarũarãja mũa. Tire bajiro bajijaja mũa tũoĩase quẽne. Dios ã bojarore bajiro quẽnaro mũa tũoĩajama, ñajediro quẽnaro riojo tũoĩamasirũarãja mũa. ã bojabetire mũa tũoĩajama, “Riojo tũoĩarã ñaja” yisocañarã rĩne, butobusa tũoĩamasimena ñacoarũarãja mũa. To bajiri, quẽnabetire ãcõari, “Mani masune, ‘Ti ñaja quẽnamasuse’ yisocarobe” yirã, Dios ã bojarore bajiro quẽnaro tũoĩaña mũa —ĩ buerãre ñnare yiyuju Jesús.

“*Diore mani rũcubũojama, gãjoare buto bojatũoĩaña manoja*”, Jesús ã yigotimasiore queti

(Lc 16.13)

²⁴ Quẽna ado bajiro ñnare gotiyuju Jesús:

—Diore yirũcubũorãma, adi macarũcuroayere buto bojatũoĩamenama, “Diojũa ñaami ñamasugũ” yitũoĩarã ñari.

²⁵ To bajiri, “Dios ñaami ñamasugũ” yitũoĩarã ñari, ñre cudirãma, adi macarũcurojũre mũa bajiro tire tũoĩarejaibesa mũa. “¿No bajiro bujacõari, bare ba, idi, sudi sãña, yicatiñarãti yũa?”, yitũoĩarejaibesa. Quẽnamasuse mani mũsũre, to yicõari, mani rujũre manire ãsiñumi Dios. To bajiri mani baroti, mani idiroti, to yicõari sudi mani sãñarotire quẽne cõarũgũrũcumi ã. ²⁶ Minia ñna bajisere tũoĩaña mũa. Ñna otebetiboajaquẽne, to yicõari, bare ñna juarẽocũbetiboajaquẽne, Dios, ñnare

bare cōarũgũami. “Miniare quēne ĩamaigũ ñari, manire roque rētoro maigũmi”, ¿yimasibea ti m̃a? ²⁷ “Adi macarucurojũre ñarã yoaro catiruarãja” m̃a yituoĩarejai-boase, “Yoarobusa catiato” yiro, m̃are ejarēmomasibeaja ti.

²⁸ Sudi sãñarũa tũoĩarejaibesa. Go bucũasere tũoĩaĩasaque m̃a: Moabeti, to yicōari, sudi sãñarũa tũoĩarejaibeaja ti. ²⁹ To bajiboarine, Ujũ Salomón ñamasir'i gajeyeũni jaigũ ĩ ñaboajaquēne, quēnase ĩ sudi sãñamasire rētoro quēnase ñaja ti. ³⁰ Gore buto quēnase ñarotirũgũami Dios. Quēnase ñaboarine, yoaro mene s̃nicoatoja. Ti s̃niro ĩacōari, tire tĩarãma masa, bare roariajaujũre. To bajiri yoaro catise me ti ñaboajaquēne, tire quēnorũgũgũmi Dios. Go rētoro manire maigũmi Dios. To bajiri, “Manire sudi cōarucumi”, yimasiroti ñaja. “To bajirone yigumi Dios”, yiajiritirũnubetibusarã ñaja m̃a. ³¹ To bajiri, “¿No bajiro bujacōari, bare ba, idi, sudi sãña, yicatiñarãti yũa?”, yituoĩarejaibetiroti ñaja. ³² Dios yarã me ñarãma, tire buto tũoĩarejairãma. Manijũarema, mani jacũ õ vecagũ ñagũmi, “Ti ruyaja, ñare” yimasigũ. ³³ To bajiri, “Ujũ Dios yarã, quēnaro ĩ yirã ñaja mani. ĩ bojarore bajiro quēnase rĩne yiruarãja”, yituoĩarũgũña m̃a. To bajiro m̃a yijama, adi macarucuroaye m̃a cũobetire bujaruarãja m̃a. ³⁴ To bajiro ti bajijare, adirũmũ m̃a bajise rĩne tũoĩaroti ñaja. Busiyũ m̃a bajiro tire tũoĩarejai rĩjoro cutibesa m̃a. Tocãrãcarũmurine ricati bajirũgũaja –ĩ buerãre ñare yiyuju Jesús.

7

“*Rojose yirã ñaama. Ti suorine rojose tãmũoruarãma*’ yiruarã, ñare ĩabesebesa”, Jesús ĩ yigotimasiore queti
(Lc 6.37-38, 41-42)

¹ Quēna ado bajiro ñnare yiyuju Jesús:

—“Rojose yirã ñaama. To bajiro yirã ñari, rojose tãmuoruarãma”, gãjerãre ñnare yĩabesebesa. To bajiro mua yijama, “Rojose yirã ñaama”, muare yĩaromi Dios. ² To bajiri, gãjerãre rojose ñna yise suorine “Rojose tãmuoruarãja” mua yĩacõĩajama, muare ñ be-serirũmuju, “Rojose yirã ñaama”, muare yĩacõĩarucumi Dios. ³⁻⁵ Gajeyerema, ado bajiro yirãre bajiro yaja mua: Gãji buto rojose ñ yibetiboajaquēne, “Mu cajeare sũjuriroaca sãñaja. Tijũacare ãmirocatu” yirãre bajiro yaja mua. Tire buto ñatirũnurã ñaboarine, mua cajeajure jairisũjuro sãñarijãure tijãure, “Ãmirocaya” yimasibeaja mua, “Buto rojorã ñaja yua” yitũoĩamasimena ñari. Mua rãcagũ ñ yisejuare ñacõari, “Riojo tũoĩabeaja mu. ‘Quē-nasejuare tũoĩavasoaya’ yirã, riojo mũre gotiruarãja” yig-otirã ñaboarine, “Adi ñaja quēnase. Tijua ñaja rojose”, yimasimenaja, ñ rētoro rojose yirã ñari. “Quēnaro yirã ñaja yua” yitũoĩaboarine, rojorã ñaja mua. “Buto rojorã ñaja yua” mua yitũoĩamasiro beroju, mua rãcagũre ejarē-momasirãja mua, “Quēnaro riojo ñnato ñ” yirã —ñ buerãre ñnare yimasioñuju Jesús.

⁶ Quēna ado bajiro ñnare yiyuju Jesús:

—Buto quēnase ñaja Dios oca. ñ yere ajiterãre goti-masiobetiruarãja mua. “Bare quēnase ti ñaboajaquēne, yaia ñna batese ti ñajama, manire jũnisinicõari, cũnisur-erearuarãma ñna” yirã, ñnare ecabeaja mua. To yicõari, mua ye jairo vaja cutise, perla vãme cutisere yesea vatoaju reacũbeaja mua. To bajiro mua yijama, mua reacũsere bojamenã ñari, tire cudavũoreacõaruarãma ñna. To bajirone bajiaja Dios oca quēnasere ajiterãrene mua goti-masioruajaquēne. To bajiri, ñna ajiruabetire ñamasicõari, ñnare gotimasiomasibetiruarãja mua —ñnare yiyuju Jesús.

“*Diore mua sēnijama, m̄are c̄diruc̄mi*”, Jesús ĩ yigotimasiore queti

(Lc 11.9-13; 6.31)

⁷ Quēna ado bajiro ĩnare yiyuju Jesús:

—Diore mua sēnijama, c̄aruc̄mi. ĩre sēnic̄ari, mua macajama, b̄jaruar̄aja mua. Sīgũ no bojase ĩre ti r̄yaja, ḡaji ya vijũ ejac̄ari s̄jarũ, sēniĩagũmi. ĩ sēniĩajare, ĩre s̄jarotic̄ari, ĩre ejarēmogũmi. To bajirone bajiaja Diore sēnir̄are quēne. ĩre mua sēnisere ajic̄ari, quēnaro m̄are yiejarēmoḡuc̄mi. ⁸ “Dios manire ejarēmoḡuc̄mi” yituoĩar̄a ñari, ĩre ĩna sēnisere ĩnare c̄aruc̄mi. ĩna macajaquēne, b̄jaruar̄ama.

⁹ “Bare bojaja yũ” mua macũ ĩ yisēnijama, ĳgũtane ĩsir̄atique mua? ĩsimenaja mua. ¹⁰ “Vai bojaja yũ” mua macũ ĩ yisēnijama, ĳãña bar'i merene ĩsir̄atique mua? ĩsimenaja mua. ¹¹ Diore bajiro quēnase yir̄a me ñaboarine, mua r̄iare quēnaro yaja mua. “To bajiro yir̄a ñaja” yimasir̄a ñari, “Mani jacũ õ vecagure mani sēnijama, quēnaro masu manire yiruc̄mi”, yimasiaja mani —ĩnare yiyuju Jesús.

¹² Quēna ado bajiro ĩnare yiyuju Jesús:

—Ḡajer̄a quēnaro m̄are ĩna yisere bojaja mua. Tire bojar̄a ñari, quēnaro ĩnare yiya muaũa quēne. To bajirone Moisés ñamasir'ire rotic̄umasiñuju Dios. To yic̄ari Diore gotir̄etobosarimasa ĩna ucamasire quēne, to bajirone yaja —ĩ buer̄are ĩnare yiyuju Jesús.

“*Eyabeti maa ñaja Dios t̄ju varia maa*”, Jesús ĩ yigotimasiore queti

(Lc 13.24)

¹³ Quēna ado bajiro ĩnare yiyuju Jesús:

—Ujũ Dios yar̄a quēnaro ĩ yir̄a mua ñaruajama, eyabeti-soje, to yic̄ari, eyabeti maare vanare bajiro josaruar̄aja mua. Ti josaboajaquēne, ĩ yar̄a ñaña mua. ĩ yar̄a mejuama, j̄jar̄a ñar̄ama. Gaje soje eyarisojere s̄jac̄ari, to yic̄ari,

eyari maa vanare bajiro josabetiruarāma ĩnama. Ti josabetiboajaquēne, rojose tām̄otujabetiriaroju varona ñarāma. ¹⁴ Eyabetisoje, to yicōari, eyabeti maare vanare bajiro josaruarāma, Ɔju Dios yarā quēnaro ĩ yirāma. Ti josaboajaquēne, Dios tuj̄u ejacōari, ĩ rāca quēnaro ñacōarūgūr̄uarāma. Jājarā me ñaruarāma ĩnama —ĩ buerāre ĩnare yiyuju Jesús.

“*Ti rica cūtise suorine yucūre ĩamasijaja mani*”, Jesús ĩ yigotimasiore queti

(Lc 6.43-44)

¹⁵ Quēna ado bajiro ĩnare yiyuju Jesús:

—“Ɔju Dios yarā quēnaro ĩ yirā ñari, ĩre gotirētosarimasa ñaja yua quēne”, yitorimasa ñarāma sīgūri. To bajiro ĩna yitosere quēnaro ajimasiña m̄ua. Tire m̄ua ajimasibetijama, to bajiro m̄uare ĩna yitose ñajare, Dios yere m̄ua ajirūgūboasere masiriticoaruarāja. ¹⁶ ĩna gotimasiore suorine, “Quēnarā ñaama” yimenane, ĩna bajire cūtisejuare ĩasuoya m̄ua. Ti rica cūtise suorine yucūre ĩamasijaja mani. Ɔye juaroana, vātijota yucūrijure macamenaja mani. Quēnase bare higos vāme cūtire juaroana, vidiroju ñaric̄u savajotajure macamenaja mani. ¹⁷ To bajiri, yucū vānuquēnaric̄uma, quēnase rica cūtiroja. Vānubetijuama, quēnabetiarine rica cūticōaroja. ¹⁸ To bajiri, yucū vān̄uric̄u, “Quēnase rica cūtiric̄u ñaja” mani yiboaric̄une, quēnabeti rica cūtibetoja. To yicōari, vānubeti, “Quēnabeti rica cūtiric̄u ñaja” mani yiboaric̄une, quēnase rica cūtibetoja. ¹⁹ Tocārāca yucūrire, vānubeticōari, rica quēnabeti yucūrire quēacōari, jeameju soereacōare ñaroja. ²⁰ To bajiri yucū ricare ĩacōari, “Quēnaric̄u ñaja ti. Quēnabeti ñaja adima” mani yimasirore bajirone, “Diore gotirētosarimasa ñaja yua” yirā, ĩna yisere ĩacōari, “Quēnarā ñaama ĩna. Quēnamena ñaama ānoa”, yimasiruarāja m̄ua —ĩnare yiyuju Jesús.

“*Uj* Dios *ĩ* bojarore bajiro yirã rĩne ñarãma *ĩ* yarã quẽnaro *ĩ* yirona”, Jesús *ĩ* yigotimasiore queti

(Lc 13.25-27)

²¹ Quẽna ado bajiro ñnare yiyuju Jesús:

—Ñajediro, “Yna *uj* ñaja m μ ” y μ re yirã me ñaruarãma y μ jac μ yarã, quẽnaro *ĩ* yironama. Y μ jac μ *ĩ* bojarore bajiro yirã rĩne ñaruarãma *õ* vecaj μ varonama. ²² Masare Dios *ĩ* beserir μ ti ti ejaro, jãjarã ado bajiro yiboaruarãma: “Yna *uj*, y μ are m μ rotijare, m μ re gotirẽtobosacaj μ yna. Y μ are m μ rotijare, masa μ suri μ sãñarãre vãtiare bureacaj μ yna. To yicõari, y μ are m μ rotijare, jairo ñaãnamani yĩocaj μ yna”, y μ re yiboaruarãma ñna, socarãne. ²³ To bajiro ñna yiboajaquẽne, ado bajiro ñnare yir μ cuj μ y μ : “Tire m μ are yirotibeticaj μ y μ . M μ are masibeaja. ¡Vasa! Rojose yirã ñaja m μ ”, ñnare yir μ cuj μ y μ —ñnare yiyuju Jesús.

“Quẽnaro ñre ajitir μ n μ rã, to yicõari, ñre ajiboarine, ñre c μ dimenama, ado bajiro bajirãma”, Jesús *ĩ* yigotimasiore queti

(Mr 1.22; Lc 6.47-49)

²⁴ Quẽna ado bajiro ñnare yiyuju Jesús:

—M μ are y μ gotimasiosere ajicõari, y μ rotirore bajiro yig μ , quẽnaro tuoĩag μ ñag μ mi *ĩ* ug μ ma. *Ĩ* ñag μ mi g μ -tajãij μ gojeri coaejocõari, botari r μ gõcõari, vi buag μ re bajiro bajig μ . ²⁵ Vi *ĩ* buaro bero, buto oco quediroya. Buto mino vatoja. To bajicõari, riaga jaicoatoja. Ti vij μ ti jaiejacoaboajaquẽne, juriaquedibetoja ti vi. ²⁶ Y μ re ajiboarine, y μ rotirore bajiro yibecuj μ ñag μ mi sita vajaroj μ vi buag μ re bajiro bajig μ . ²⁷ Ti vi *ĩ* buaro bero, buto oco quediroya. Buto mino vatoja. To bajicõari, riaga jaicoatoja. Ti vij μ re ti jaiejarone, yoaro mene juriaquedicoatoja —*ĩ* buerãre ñnare yiyuju Jesús.

28-29 To bajiro Jesús ñnare ï yigotimasioro bero, Dios ï rotimasire gotimasiorimasare bajiro me, ʘjũre bajiro bojonebecũne quẽnaro ï gotimasiojare, ajĩñañamani ï gotise ti ñajare, no yimasibesujarã ñna.

8

Gase boagũre Jesús ï catiore queti

(Mr 1.40-45; Lc 5.12-16)

¹ Burojũ ñnar'i, Jesús ï rojaejarone, jãjarã masa ïre sũyayujarã. ² To ñna bajirone, sĩgũ gase boagũ Jesũre vacãnamuacõari, ï rĩjorojũa gũsomuniari tuetuejayuju, ïre rũcũbũogũ. To yicõari, ado bajiro Jesũre ïre yiyuju:

—Yũ ʘjũ, yũ cãmire mũ yarũajama, yaya —yiyuju. ³ To bajiro ïre ï yisere ajicõari,

—Mũ cãmire yarũcũja yũ —ïre yigũne, ïre moañañuju Jesús.

To bajiro ï yirirĩmarone, ï cãmĩ ïre yaticoasuju yuja. ⁴ To ïre yigajanocõari, gãjerãre ïre gotirotibesuju Jesús. To bajiro ïre yicõari, ado bajiro ïre yiyuju:

—Yucũacane paire mũ rujũre ïoaya. To yigũne, Moisére Dios ï roticũmasiriarore bajirone vaibũcũrã ecariarãre sĩacõari, paire ïsima, Diore rũcũbũogũ. To mũ yisere ïacõari, “Caticoasumi”, yirũarãma masa —ïre yiyuju Jesús, gase boaboar'ire.

Surara ʘjũre moabosarimasũre Jesús ï catiore queti

(Lc 7.1-10)

⁵ Capernaum vãme cũti macajũre Jesús ï ejaro ïacõari, ï tũjũ vayuju surara ʘjũ. Romano masũ ñañuju ï. Jesús tũ ejacõari, rũcũbũose rãca ado bajiro ïre sẽnĩñuju:

⁶ —Yũ ʘjũ, yũre moabosarimasũ ï bajisere ajimaiña. Yũ ya vijũ rijajesami. Micacõari, bũto visiomi —Jesũre ïre yiyuju surara ʘjũ.

⁷ —ïre catiogũ yarũcũja yũ —ïre yicũdiyuju Jesús.

⁸ To ĩ yiboajaquẽne, ado bajiro ĩre cadiyuju surara ɥɥ, Jesúre:

—Yɥ ɥɥ, quẽnagũ masu ñaja mɥ. Yɥma, rojose yɥ yisere tuoĩa bojonegũ ñari, yɥ ya vire mure sãjarotimasibecɥja yɥ. Tojɥ sãjabetiboarine, mɥ ñagõtuoĩasene catiomasigũja mɥ. ⁹ Gãjerã surara ɥjarã beroagu ñaja yɥ. To bajiri, yɥ quẽne, gãjerã surarare rotigu ñaja yɥ. Sígũre, “¡Vasa!” yɥ yijama, vajami. Gãjire, “Vayá” yɥ yijama, vadiami. To yicõari, yure moabosarimasure, “Tire yiya” yɥ yijama, yirũgũami. To bajiri, mɥ roque rotigu masu ñari, tojɥ vabetiboarine, mɥ ñagõtuoĩasene caticoarɥcumi —Jesúre yiyuju.

¹⁰ To bajiro ĩ yisere ajiyamanire bajiro ajituoĩañuju Jesús. To bajiri ado bajiro ĩnare yiyuju, ĩre sɥyarãre:

—Riojo mɥare gotiaja yɥ. Israel ñamasir'i jānerabatia yɥ yarã ñaboarine, “Masigũ, to yicõari, quẽnagũ ñari, yure yirẽmorɥcumi” yure ĩ yituoĩarore bajiro tuoĩagũre, ĩabetirũgũaja yɥ. ¹¹ Quẽnaro yure ajiya. ĩre bajiro bajirã Israel masa me, jājarã ejarɥarãma õ vecajɥ Dios tɥjɥ. Muiju ĩ jiadojɥa vadiriarã quẽne, ĩ rocasãtojɥa vadiriarã quẽne ejarɥarãma. Tojɥre, rojorãre Dios ĩ rearo bero, ĩ rãca barujiɥarãma ĩna. ĩna rãca ñarɥarãma Abraham, Isaac, to yicõari, Jacob ñamasir'i quẽne. ¹² Israel ñamasir'i jānerabatia Diorãca barujiɥrona ñaboariarã, rojose ĩna yire sɥorine rẽtiarojɥ ĩnare reacõarɥcumi. Tojɥre ñacõari, bato rojose tãmɥorã ñari, guji põguẽ, oti, yirɥarãma ĩna —ĩnare yiyuju Jesús.

¹³ To yigajano, surara ɥjɥjɥare ado bajiro yiyuju:

—Mɥ ya vijɥ tudiasa. “Ñamasugũ ñari, yure catiobosacõarɥcumi” yure mɥ yituoĩarore bajirone bajirɥaroja —ĩre yiyuju Jesús.

To ĩ yirirĩmarone, surara ɥjɥre moabosarimasu, vijɥ rijañaboar'i caticoasuju ĩ yuja.

Pedro ũmañicore Jesús ĩ catiore queti

(Mr 1.29-31; Lc 4.38-39)

¹⁴ Pedro ya vijũ vasuju Jesús. Ti vi ejacõari, Pedro ũmañicore ĩañuju. Cãnijesariaro joeju jesayuju so. So rujũ bũto asicõari, bũbũribũjayuju. ¹⁵ Sore ĩacõari, so ãmore ĩ moañarone, rujũ asicõari, so bũbũribũjaboase tũjacoasuju. To bajiri vũmũrũgũcõari, bare ĩre ecauju so.

Jãjarã, rijaye cõtirãre Jesús ĩ catiore queti

(Mr 1.32-34; Lc 4.40-41)

¹⁶ Tirũmu rãiorijũne juaejoyujarã, ĩna ũsuriju vãtia sãñarãre Jesús tũju, “Vãtiare ĩnare bureato” yirã. To ĩna yiro ĩacõari, cojoji ñagõgũne, vãtiare bureayuju Jesús. Jãjarã ñañujarã ĩna ũsuriju vãtia sãñarã, masa ĩna juaejoriarã. To yicõari, rijaye cõtirãre quẽne catioyuju. ¹⁷ To bajiro bajiyuju, Isa'ias, Diore gotirẽtobosarimasũ ñamasir'i, “To bajiro bajirũaroja” ĩ yucamasire ti ñajare. Ado bajiro ucamasiñumi Isa'ias: “Mani rijaye cõtire catiorũcumi. To yicõari, josari mani tãmũoñasere yirẽtobosarũcumi” yucamasiñumi Isa'ias, Jesús ĩ catiorotire yigũ.

“Yũre mũa ajisũyarũajama, josarũaroja ti”, Jesús ĩ yigotimasiore queti

(Lc 9.57-62)

¹⁸ Cojorũmu jãjarã masa ĩ tũju ĩna ñagãnibiaro ĩacõari, —Gajejacatuaju jẽacoajaro mani —ĩ buerãre ĩnare yiyuju Jesús. ¹⁹ To ĩ yise rãcane, sĩgũ, Dios ĩ rotimasire gotimasiõarimasũ, Jesús tũ ejayuju.

—Gotimasiõarimasũ, no bojaro mũ vato cõrone mũre sũyarũaja yũ —Jesũre ĩre yiyuju ĩ.

²⁰ To ĩ yirone, ado bajiro ĩre cũdiyuju Jesús:

—Buyairoarema, ĩna gojeri ñacaju. Miniare quẽne, ĩna jibũri ñacaju. To ĩna bajiboajaquẽne, yũ, Dios ĩ cacũma, cãnirijaju magũre bajiro bajijaja yũ. To bajiri yũre mũ

suyajama, buto mure josaruroja —ire yiyuju Jesús, Dios ï rotimasire gotimasiorimasure.

²¹ To ï yiro bero, gãji Jesús buerimasu ado bajiro ïre yiyuju:

—Yũ ɯjũ, yũre yuya mũ maji. Yũ jacũ ï bajirocacoajare, ïre yujegũacu yaja yũ. ïre yujecõari bero, mure suyaruçuja yũ —Jesũre ïre yiboayuju.

²² To bajiro ïre ï yiboajaquẽne, ado bajiro ïre cudiuyuju Jesús:

—Yucũne yũre suyaya mũ. Yũre ajitirũnumena, rijari-arãre bajiro bajirã ñarãma. ïnajua rijariarãre yujeato ïna —ïre yicudiuyuju Jesús.

Mino vatone, oco sabesere Jesús ï tujore queti

(Mr 4.35-41; Lc 8.22-25)

²³ Jesús ï buerã rãca cũmuaju vasãjañuju, jẽacu. ²⁴ ïna jẽatone, buto mino vasuju. To bajicõari, buto sabeyuju. Ti saberone, cũmuaagueca yiro, rujacoarũayuju. To ti bajiboajaquẽne, cãnigũ yiyuju Jesús. ²⁵ ï cãniro ïacõari, ïre yujioyujarã ïna:

—Yũa ɯjũ, ¡rujareana yaja mani! To bajiri mani ru-jaborotire yirẽtoña mũ —ïre yiyujarã.

²⁶ To bajiro ïna yirone,

—¿No yirã buto güiati mũa? “Rojose mani tãmũboajaquẽne, manire yirẽtobosaruçumi”, yũre yitũoiarã me ñaja mũa —ïnare yiyuju.

To yi, vãmũrũgũcõari,

—¡Mino tujaya! ¡Sabese quẽne tujaya mũa! —yiyuju Jesús.

To ï yirone, tujacoasuju mino. Sabese quẽne, sabebe-suju yuja. ²⁷ Tire ïacõari, no yimasibesujarã ïna.

—¿Ñimũ ũgũ masũ ñati ãni? Minore to yicõari, sabesere quẽne ï tujarotijama, ïre ajaia —gãmerã yiyujarã ïna.

Gadara vāme cūti maca tuanare ĩna usurijū sãñarãre vãtiare Jesús ĩ bureare queti

(Mr 5.1-20; Lc 8.26-39)

²⁸ Utabucura gajejacatujū Gadara vāme cūti maca tujū ejayujarã. To ĩna ejarone, masa rijariarãre ĩna yujereari-avijure juarã ũma budiayujarã. To bajicõari, Jesús ture ejarũgũ ejayujarã. Juarãjune vãtia sãñarã ñari, bũto guayujarã. To bajiro ĩna bajijare, rõtomasĩa mañuju.

²⁹ Jesúre ĩarãne, ado bajiro yiavasãñujarã ĩna usurijure sãñarã, vãtia:

—¿No yigu yua tu vadiati Dios macu? ¡Yũare gõ-janabiobesa! Rojose yua yise vaja, rojose yũare mũ yirotirũmu ti ejabetiboajaquẽne, ¿rojose yũare yigu vadiati mũ? —Jesúre yiyujarã vãtia.

³⁰ To ĩna yiñaro sojua jãjarã ecariarã yesea macabañañujarã. ³¹ ĩnare ĩacõari, rũcũbuose rãca Jesúre yisẽniñujarã vãtia:

—Yũare mũ bureajama, õa yeseajũare yũare sãjarotiya —yiyujarã vãtia.

³² To bajiro ĩre ĩna yijare,

—Mũare varotiaja yu —vãtiare ĩnare yiyuju Jesús.

To ĩ yirone, juarãjũrene ĩna usurijure sãñaboariarã budicoasujarã yuja, yeseajũare sãjaroana. ĩna sãjarone, buro ũmaroja vacõari, utabucurajū ĩna ñaro cõrone rear-oderujacõa tujasujarã, vãtia ĩnare ĩna sãjajare.

³³ Yeseare coderimasa, to bajiro ĩna bajisere ĩacõari, ũmacoasujarã, ĩna ya macajū vana. To bajicõari, vãtia sãñaboariarã ĩna yiecose ñaro cõrone ti macanare gotijeocõañujarã ĩna. ³⁴ Tire ajicõari, Jesúre ĩarã vasujarã ĩna, ti macana jediro. ĩ tu ejacõari, ĩre güirã, rũcũbuose rãca ĩre varotiyujarã.

9

*Micagũre Jesús ĩ catiore queti
(Mr 2.1-12; Lc 5.17-26)*

¹ To bajiro ĩre ĩna yijare, ʉtabʉcʉra gajejacatʉajʉ tudi-jẽa ejacoasuju Jesús, ĩ ya macajʉ. ² Ti macajʉ ĩ ñaro, micagũre rijarã ʉmivarajʉ joejʉ ĩre ʉmiejayujarã. “ĩre ĩamaicõari, ĩre catiorʉcʉmi” ĩna yitʉoĩasere ĩamasicõari, micagũjʉare ado bajiro ĩre yiyuju Jesús:

—Yʉ maigũ, tʉoĩatutuaya. Rojose mʉ yirere mʉre masiriocõaja yʉ —ĩre yiyuju Jesús.

³ To ĩ yisere ajicõari, ti macana sĩgũri Dios ĩ rotimasire gotimasiorimasa ado bajiro tʉoĩañujarã: “To bajise ĩ ñagõ-jama, Diore ĩre rʉcʉbʉobecʉ yami”, yitʉoĩañujarã ĩna. ⁴ To bajiro ĩna yitʉoĩasere ĩamasicõari, ado bajiro ĩnare yiyuju Jesús:

—“ ‘Diore bajiro masa rojose ĩna yisere masiriomasiaja’ yisocaami”, yʉre yitʉoĩaboaja mʉa. ⁵ “Rojose mʉ yisere masiriocõaja” yʉ yicõa tʉjajama, “Socʉ yami. Socʉ me yami”, yʉre yĩamasigũ magũmi. To bajiboarine, micagũre, “Vũmurũgũcõari, vasa” ĩre yʉ yijama, “Socʉ me yami. Rojose ĩ yirere masiriocõami”, yʉre yĩamasirãja mʉa. ⁶ To bajiri, “ ‘Dios ĩ roticõacacʉ ñari, Diore bajirone masare rojose ĩna yisere masiriomasigũ ñaami’ yʉre yĩamasiatu” yigʉ, ʉni micagũre ado bajiro yaja yʉ: Vũmurũgũña mʉ. Mʉ jesarijʉre ʉmiña. To yicõari, mʉ ya vijʉ tudiasa, ĩre yaja yʉ —ĩre yiyuju Jesús.

⁷ To ĩre ĩ yirone, micagũ ñaboar'i, vũmurũgũcõari, ĩ jesarijʉre ʉmi, ĩ ya vijʉ vacoasuju ĩ yuja. ⁸ To bajiro Jesús ĩ yisere ĩʉcacoasujarã masa. “Ti ũnire ĩabetirũgũcajʉ

mani. Āni, Dios ĩ masise rāca yigu yami” yituoĩacōari,
 “Quēnaro yaja mū”, Diore ĩre yivariquēnañujarā ĩna.^b

Mateore Jesús ĩ jire queti

(Mr 2.13-17; Lc 5.27-32)

⁹ Micagũre catiogajano vagune, Mateo vāme cutigure
 yure ĩabujacami Jesús. Ujũre gājoa sēnibosarimasu ñacaju
 yu. Gājoa sēnirā ĩna rujirijũre gājoa sēnirujicaju. To yu
 yiñaro ĩacōari,

—Yure ajisuyaya —yure yicami Jesús. To bajiro ĩ yisere
 ajicōari, ĩre suyacoacaju yu yuja.

¹⁰ Yu ya vijũ ejacaju yua. To ejacōari, bacaju yua.
 Yu rāca barā ejacana, jājarā ñacama. Yu yicatore bajiro
 rojose yirā, ujũre gājoa sēnibosarimasa, to yicōari, gājerā,
 “Rojose yirā ñaama” masare yĩarā quēne ñacama. Jesús
 buerimasa quēne ñacama. ¹¹ To yua bajirone, ejacama
 fariseo masa. ĩna ñacama, Moisére Dios ĩ roticūmasirere
 buto ajirũcubũorā, rojose yirā rāca ñaruamena. Ejacōari,
 yua bañasere ĩacōari, yu rācanare Jesús buerimasare ĩnare
 sēniñacama:

—¿No yigu mũare bueguma, ānoa rojose yirā rāca bati?
 —yicama ĩna.

¹² To bajiro ĩna yisere ajicōari, ado bajiro ĩnare cudicami
 Jesús, fariseo masare:

—Catiquēnarāma, uco yigũre bojamenama. Rijaye
 cutirā rĩne ĩre bojarāma ĩna. To bajiro bajiaja yure quēne.
 “Rojosere yirā me ñaja yua”, yirāma, yure bojamenama.
 “Rojose yirā ñaja yua” yirā rĩne yure bojarāma. ¹³ Dios
 oca masa ĩna ucamasirere ado bajiro quēnaro tuoĩaña
 mũa. Ado bajiro gotiaja ti: “Gājerāre mũa ĩamaisere bojaja

^b **9:8** Rĩjorojũrema Mateo “Yiyuju Jesús” yiucayumi, capítu-
 lo 1, to yicōari, capítulo 9 versículo 8, ĩ rāca ñabetirĩ
 ñari. Capítulo 9 versículo 9, to yicōari, tusari capítulo 28,
 ĩ rāca ñarĩ ñari, “Yicami”, yiucayumi yuja.

yū. Gājerāre mūa ĩamaibetijama, vaibucurā ecariarāre sīacōari, yure mūa soemūoboajaquēne, ñie vaja manoja ti”, yigotiaja Dios oca, masa ĩna ucamasire. Quēnaro yirāre jigū me, adi macarucurojure vadicaju yū. Rojose yirāre, “Rojose ĩna yisere yitujato” yigū, vadicaju yū. To bajiri to bajiro yitūoĩagū ñari, ānoa rāca bagū yaja yū — ĩnare yicami Jesús.

“*Mani* sutiritisere ĩacōari, quēnaro manire ejarēmorucūmi Dios” yirā, bare babetire queti

(*Mr 2.18-22; Lc 5.33-39*)

¹⁴ Juan vāme cutigū, masare oco rāca bautizarimasū buerā, Jesús tujū ejacama ĩna. To bajicōari, ado bajise ĩre sēnīacama:

—Yūa quēne, fariseo masa quēne, mani ñicūa ĩna yimasiriarore bajiro Diore yūa sēnirirūmūrirema bare babetirūgūaja yūa. ¿No yirā tire yibeati mū buerāma? — ĩre yicama Juan buerimasa.

¹⁵ To ĩna yisere ajicōari, ado bajiro ĩnare gotimasiocami Jesús:

—Sīgū ĩ āmosiarirūmure ĩre variquēnaejarēmorā ñarāma. To ĩ ūmato yīnaro cōro ĩre variquēnaejarēmorāma. ĩnare bajiro bajiamā yū buerā. Yū rāca ñari, variquēnacōa ñaama. “Sutiritimena ñari, no yirā bare babeticōa yimenama”, yimasire ñaja. To bajiboarine, cojorūmū yure ĩna ñiavato ĩacōari, bare bamenane Diore sēniruarāma, “Mani sutiritisere ĩacōari, quēnaro manire ejarēmoato Dios” yirā.

¹⁶ Mame oca yū gotimasiose ricati ti ñajare, yū ye rāca mani ñicūa ĩna yimasirere mūa tūoĩavūojama, quēnabeaja. Sudiro bucūase ti vojama, mamagaserō rāca seretumasimenaja mani. Mamagaserone mani seretujama, mani coero bero carato tūatutu vatone bucūasejua vocoatoja. Bucūase, mamase rāca mani seretumasibetore

bajirone, mame oca yu gotimasiosere, mani ñicua oca rãca tuoïavuoobesa mua.

¹⁷ To bajirone bajaiaja uye oco quëne. Mame uye ocore, vaibucugaserone quënorajoa bucujøjare jiom-enaja mani. Bucujøjare mani jiojama, jãmsĩnituca yiro, yivocõaroja tijoajare. To bajiro mani yijama, uye ocore, vaibucugaserone quënorajoa quëne, to bajirone yireacõa tajana yirãja mani. “To bajirobe” yirãma, mame uye ocore vaibucugaserone quënorajoa, mamajøjare jiore ñaroja. To yicõari, uye oco, vaibucugaserone quënorajoa quëne, cojoro cõro quënarõ ñaruarõja. To bajiri mame uye ocore, bucujøjare mani jibetore bajiro mame oca yu gotimasiosere, mani ñicua oca rãca tuoïavuoobesa mua —ĩnare yicami Jesús.

Jud'io masa ujũ macore Jesús ĩ catiore queti

(Mr 5.21-43; Lc 8.40-56)

¹⁸ To bajise Jesús ĩ gotiñarone, sĭgũ jud'io masa ujũ ejacami. Ejacõari, Jesús rĩjorojua gusomuniari tuetucami, ĩre rũcũbuogũ. To yigũne, ado bajiro Jesũre yicami:

—Yucnacane yu maco bajirocacoamo. So tu ejacõari, sore mu moaĩajama, tudicaticoarũocomo so —Jesũre yicami.

¹⁹ To ĩ yisere ajicõari, ĩre sũyacoacami Jesús. To bajiri yua, ĩ buerimasa quëne vacajũ. ²⁰⁻²¹ To yua vatone, sĭgõ rõmio rijago Jesús sũyarojua ejarũgũriomo. Gãmorõmi cutigo ñaũumo so. Juaãmo cõro, gũbo jua jënituari cũmari rijañañuju. “Jesús sudiro gaja moaĩarũaja yu. Ti rĩne bojaja yu. To bajiro yu yijama, quënaejacoarũocoja yu”, yiriomo so. To bajiro yirio ñari, Jesús sũyarojua ejarũgũcõari, ĩ sudiro gajare moaĩariomo. ²² So moaĩasere masicõari, jũdarũgũcami Jesús. To yicõari, ado bajiro sore goticami:

—Variquēnaña yu maigō. “Ī sudiro gajare yu moaīa-jama, quēnaejacoaruocoja yu” yure mu yituoīase ñajare, “Quēnaejato” mare yibu yu —sore yicami Jesús.

To bajiro ĩ yirirīmarone, quēnaejacoacamo so yuja.

²³ To yi vanane, ujū ya vijū ejacoacajū yua, Jesúrāca. Ī macore yujeroana, tōroari juti, yioti avasāñacama^c ²⁴ To bajiro ĩna yiñajare, ado bajiro ĩnare yicami:

—Budiasa mūa. “Bajirocacoajamo” mūa yi boago, bajirocabetesumo. Cānigō yigomo —ĩnare yicami Jesús. To ĩ yijare, ĩre ajacama ĩna, “Bajirocacoamo” yimasirā ñari.

²⁵ Masa ĩna budiato bero, bajirocario tujū jājacōari, so āmore ñiacami Jesús. To ĩ yirone, quēna tudicaticōari, vūmūrūgūcoacamo so. ²⁶ Jesús sore ĩ catiosere ti sitana masa ñaro cōrone gotibatocōañuma ĩna.

Juarā caje ĩamenare Jesús ĩ ĩarotire queti

²⁷⁻²⁸ Tojū ñariarā yua cānirivi yua tudiatone, caje ĩa-mena juarā Jesúre avasā sūyadicama:

—Ujū David ñamasir'i jānami, “Rotimūorūgōrūcuja mu” yigu, Dios ĩ cōar'i ñaja mu. Yūare ĩamaiña —Jesúre yisūyacama ĩna. Vijū yua sājaejarone, ĩna quēne sūyasājaejacoacama.

To ĩna bajirone, ado bajiro ĩnare sēnīiacami Jesús:

—“Yua caje ĩabetire ‘Īato’ yigu, yūare ejarēmo-masigūmi”, ¿yure yituoīati mūa? —ĩnare yicami Jesús.

—Yua ujū, to bajirone mare yituoīaja yua —ĩre yicūdicama.

²⁹ To ĩna yijare, ĩna cajere moaīagūne ado bajiro yicami Jesús:

—“Manire catiorūcūmi” yure mūa yituoīase sūorine mūare ĩarotiaja yu —ĩnare yicami.

^c 9:23 To bajiro ĩna yijama, ĩna yirūgūriarore bajiro yirā yiyujarā.

SAN MATEO 9:30 40 SAN MATEO 9:38

³⁰ To ï yirone, ïacõacama. To yicõari, ado bajiro ïnare goticami Jesús:

—Gãjerãre gotibetimasucõama mua —ïnare yiboacami.

³¹ To bajiro ï yiboajaquêne, ti sitana jedirore gotibacõañujarã ïna.

Ñagõbecure Jesús ï ñagõrotire queti

³² Ìamena ñaboariarã ïna budirirĩmarone, ejacama gãjerã, ñagõbecure ãmiejarã, vãti ï usujure sãjacõari, ïre ñagõrotibetir'ire. ³³ Jesús, vãtire ï burocarone, ñagõbecu ñaboar'i, ñagõcoacami yuja. Tire ïacõari, no yimasibeticama masa:

—Adojure, Israel sitajure, ado bajise yigure ïaña manirũgũmũ maji —yicama ïna.

³⁴ Fariseo masajũama, ado bajiro yicama:

—Ãni, vãtia uju ï masise rãca vãtiare bureaami —yicama ïna.

Jesús masare ï ïamaire queti

³⁵ Ti sitaju gotimasiocudijeocami Jesús. Tocãrãca maca masa Dios ocare ïna buerivirijure sãjacõari, oca quēnasere masare ïnare gotimasiocami. “Uju Dios yarã quēnaro ï yirona mua ñarũajama, rojose mua yisere yitujacõari, yure ajitirũnũña”, ïnare yigotimasiocami. To yicõari, rijaye cutirãre jediro catiocami. ³⁶ Oveja, uju manare bajiro bajirã ñacama ïna masa. No yimasibetiboana tũõãgõjanabidirã ñacama. To bajiro ïna bajisere ïacõari, ïnare ïamaicami Jesús. ³⁷ To bajiro ïna bajisere ïagũ ñari, ado bajiro yũare yicami:

—Ote jairo bucuaroja. To bajiboarine, mojoroaca ñarãma tire juarimasa. ³⁸ To bajiro ti bajijare, ote ujure

sēniña, ĩre moabosarimasa cōato ĩ yirã —yũare yicami Jesús. ^d

10

Ī ocare goticudis uoronare Jesús ĩ besere queti

(*Mr 3.13-19; 6.7-13; Lc 6.12-16; 9.1-6*)

¹ Cojorũmũ ĩ buerimasare yũare juaãmo cõro, gũbo jua jẽnituarirãcũ ñarãre jirẽocami Jesús. Yũare jirẽocõari, ado bajiro yicami:

—Masa usũrijũ sãñarãre vãtiare, “Budiya” mũa yijama, budiruarãma. Rijaye cutirãre quẽne, “Catiya” mũa yijama, caticoaruarãma —yũare yicami Jesús.

²⁻⁴ Juaãmo cõro, gũbo jua jẽnituarirãcũ ñacajũ yua, “Yũ ocare gotimasiocudiba” Jesús ĩ yicana. Ado bajiro vãme cutirã ñacajũ yua: Simón vãme cutiboacacũ, Pedro vãme cutigũ, ĩ bedi Andrés ñacama. To yicõari, Zebedeo rĩa ñacama Santiago, ĩ bedi Juan. Gãjerã, Felipe, Bartolomé, Tomás, yũ Mateo vãme cutigũ, ujure gãjoa sēnibosarimasũ ñaboacacũ ñacajũ. Alfeo macũ Santiago, to yicõari, Tadeo vãme cutigũ, gãji ñacami Simón vãme cutigũ, celote yere tuoĩaboar'i. Tusagu Judas Iscariote vãme cuticami. ĩ ñañumi Jesúre ĩsirocarocũ.

⁵ To bajiri yua, juaãmo cõro, gũbo jua jẽnituarirãcũre ado bajiro yũare gotimasiocudiroiticami Jesús:

—Jud'io masa me ĩna ñarimacari gotimasiocudibeja mũa. Samaria sita ñarimacarire quẽne vabeja mũa —yũare yicami. ⁶ —Israel sitana tũjũare vasa. ĩna ñarãma

^d **9:38** “To bajiro ĩ yijama, ado bajiro yigũ yiyuju: ‘Jãjarã ñarãma yũ ocare ajicõari, yũre ajitirũnũrona. To bajiboarine, mojoroaca ñarãma yũ ocare gotirãjua. To bajiro ti bajijare, Diore sēniña, “Jãjarãbusa yũ ocare gotirimasare cõato ĩ” yirã’ yiyuju Jesús”, yiyujarã Dios oca masa ĩna ucamasire buerimasa.

Dios yarã ñaboariarã, oveja yayirãre bajiro bajirã — yicami. ⁷ —“Diore rotibosarocũ ï rotisuroti mojoroaca ruyaja. Uju Dios yarã quẽnaro ï yirona mua ñarujama, rojose mua yisere yitujacõari, Jesúre ajitirũña” yigotimasiocudiba mua. ⁸ Gase boarãre mua ïajama, ñare catioba mua. Gãjerã no bojase rijaye cutirãre quẽne ñare catioba. Rijariarãre tudicatioba. Masa usuriju sãñarãre vãtiare quẽne ñare bureaba. Vaja manone to yirotiare muare ujoaja yu. To bajiri, vaja sãnimenane, mua quẽne gotimasiocudi, rijaye cutirãre catio, ña usuriju sãñarãre vãtiare ñare burea, yicudiruarãja mua —yuare yicami Jesús. ⁹ —Mua vaja yiroti gãjoa juaábeja. ¹⁰ To yicõari, bare sãriajoari juaábeja mua. Sudi mua sãñasene sãñacõari, vaja. Gajeye gũbo sudi mua vasoaroti juaábeja. Tueriayucúrire quẽne juaábeja. No bojarã gãjerãre moabosarimasa, vaja bujarãma. To bajirone bajiruaroja muare quẽne. Ñare mua gotimasiose vajane ñiescoruarãja mua quẽne —yuare yicami Jesús. ¹¹ —Jairimaca, mojorimacare ejarã, quẽnaro yigure macama mua. Ñre bujacõari, ï tu cãnima. Ti macanare mua gotimasiojama, ï tu rĩne ñama maji, gajeroju mua varoto rĩjoro. ¹² Viju ejarã, “¿Ñati mua?” yisẽniãcõari, “Quẽnaro ñaña mua”, yiba. ¹³ To mua yirone, ti viana quẽnaro muare ña bocaãmijama, mua yirore bajiro quẽnaro ñaruarãma. Quẽnaro muare ña bocaãmibetijama, “ ‘Quẽnaro ñaña’ yua yibetiriarãre bajirone ñacõaña mua” ñare yí, vacoaja mua. ¹⁴ Muare quẽnaro ña bocaãmibetijama, to yicõari mua gotisere ña ajiruabetijaquẽne, ti vire ñabeja. Ti vire budicõari, sitare gũbo sudi tuyasere varereaba. “Quẽnaro yuare bocaãmibeticõari, yuare mua ajiruabetijare, rojose muare yirucumi Dios” yirã, to bajiro yiruãrãja mua. ¹⁵ Riojo muare gotiaja yu. Ti macana muare ña ajiruabeti vaja Diojama, rojose ñare yirucumi masare ï beserirũmu ti

ejaro. Sodoma macana ñamasiriarã rětobusaro rojose tãmtuoguarãma ñna, muare quënaro bocaãmimenama — yuare yicami Jesús.

“*Dios oca* mua gotise suori, ajijünisinicõari, rojose muare yiruãrãma”, Jesús ñ yire queti

¹⁶ Quëna ado bajiro ñ buerãre yuare yicami Jesús:

—Ovejare, buyairoa vatoaju güioroju ñnare cõagüre bajiro muare gotimasiodirotiaja yu. To bajiri mua ñagõroto rïjoro, quënaro tuoïama. To yicõari, muare rojose ñna yiboajaquëne, muajuama quënasejuare yirã rïne ñacõama. ¹⁷ Ado bajiro bajiroti ñajare, quënaro tuoïama mua: Muare ñejecõari, Dios ocare ñna bueriviriju çjarã rïjoroju muare juaãruãrãma ñna. Toju muare bajaruãrãma. ¹⁸ To yicõari, yu ocare mua gotimasiojare, macari çjarã rïjoroju muare juaãruãrãma ñna. To yi vanane, çjarã ñamasurã rïjoroju muare juaãruãrãma. To bajiro muare ñna yijare, çjarãre, to yicõari, jud'io masa mere yu ocare gotiruãrãja mua. ¹⁹⁻²⁰ Çjarã rïjoroju muare ñna juajaro, “¿No bajiro ñagõrãti yu?”, yituoïare-jaibeja mua. “Ñagõña” muare ñna yirirïmarone, mani jacu Dios ñ cõagü, Esp'iritu Santo ñ ejarëmose rãca “Ado bajiro gotiruãrãja yu” yimasiruãrãja mua —yuare yicami Jesús.

²¹ Quëna ado bajiro yuare yicami Jesús:

—Yu yere ajiterãre güiose ñna yisere ñaruãrãja mua. Sïgü rïa ñaboarine, “Ñnare sïato” yirã, ñejerotiruãrãma ñna. To yicõari, jacua quëne, “Yu rïare sïato” yirã, ñna rïare ñejerotiruãrãma. ñna rïaju quëne, ñna jacuare ajijünisinicõari, gãjerãre sïarotiruãrãma ñna. ²² Yu ocare mua goticudijare, jediro masa muare ñateruãrãma. To bajiro ñna yiboajaquëne, no bojarã yuare ajitirũnu tujamenarema, rojose tãmtuotujabetiriaroju ñna varoti ñaboarere ñnare yirëtobosaruçumi Dios. ²³ Cojo maca muare rojose ñna yijama, gaje macaju rudiaja mua. Riojo

mũare gotiaja yũ. Jediro Israel sitajure ñarimacarire mũa goticudijeoroto rĩjoro, yũ, Dios ĩ roticõacasũ, adi macarũcurojũre tudiejarũcũja yũ.

²⁴ ĩnare buegũ rẽtobũsaro masirã me ñaama ĩ buerã. To bajiboarine, quẽnaro ĩna buejeocõajama, ĩnare buerimasũre bajirone masirãma ĩna quẽne. ²⁵ “Yũare buegũre bajiro yũa bajijama, quẽnaja”, yitũoĩaroti ñaja. To bajicõari, ĩre moabosarimasare quẽne, “Yũa Ʃjũre bajiro yũa bajijama, quẽnaja”, yitũoĩaroti ñaja. To bajiro ti bajijare, yũre mũa Ʃjũre Beelzebũ yũre ĩna vãme yitud'ijama, yũ yarã mũa ñajare, rẽtoro rojose mũare yitud'irũarãma ĩna —yũare yicami Jesũs.

“Masa rojose yirãre gũimenane, Diojũare gũiroti ñaja mũare”, Jesũs ĩ yire queti

(Lc 12.2-7)

²⁶ Quẽna ado bajiro ĩ buerãre yũare yicami Jesũs:

—Rojose mũare ĩna yitud'iboajaquẽne, ĩnare gũibeja mũa. “Masa ĩna ĩabeto yitud'irã yaja” mũare ĩna yiboajaquẽne, Diojũama, ĩacõarũcumĩ. Ñiejũa masa ĩna yirudise maja, Diorema. Adirũmũri masa ĩna masibeti jediro, Dios ĩ beserirũmũ ti ejaro, “Quẽnaro tire masiato” yigũ, gotirũcumĩ. ²⁷ Masa ĩna ajibeto yayioroaca mũare yũ gotisere “Jediro ajiato” yirã, gotibatorũarãja mũa. ²⁸ Mũare sũarũarãre gũibeja mũa. Mũa usũrijũrema sũamasimenama ĩna. Diojũare mũa gũijama, quẽnaja. ĩ ñaami mani catisere rotigũ. ĩ masu masiami. To bajiri rojose tãmũotũjabetiriaroju mũare reamasicõami.

²⁹ Juarã miniare mani vaja yijama, cojotii gãjoatii rãca vaja yire ñaroja ti, mojoroaca vaja cutirã ĩna ñajare. To cõoroaca vaja cutiboarine, Dios ĩ rotibetone rijagũ magũmi. ³⁰⁻³¹ Masajũare, Dios ĩ ĩajama, jairo vaja cutirãre bajiro manire ĩaami. Manire bũto maiami ĩ. To bajiro bajigũ ñari,

mani rųjoajoare, cojojoara rųyabeto cōıajeogu ņaami. To bajiri rojose mųare yiräre güibeja —ı bueräre yųare yicami Jesús.

“*Masa ına ıaro rıjorojۇa*, ‘Jesúre ajitirůnųgů ņaja yų’ mۇa yijama, quēnaja”, Jesús ı yire queti

(Lc 12.8-9)

³² Quēna ado bajiro yųare yicami Jesús:

—Masa ına ıaro rıjorojۇa, “Jesúre ajitirůnųrã ņaja yųa” yirãrema, yų quēne õ vecajۇ yų jacۇ ı ıaro rıjorojۇa, “Ānoa ņaama yų yarã”, yııorۇcۇja yų. ³³ To bajiboarine masa ıaro rıjorojۇa, “Jesúre ajitirůnųrã me ņaja yųa” ına yijama, yų quēne, õ vecajۇ yų jacۇ ı ıaro rıjorojۇa, “Yų yarã me ņaama ına”, yırۇcۇja yų —yųare yicami Jesús.

“Yųre mۇa ajitirůnųsere ıacđari, mۇare ıajůnisinirۇarãma”, Jesús ı yire queti

(Lc 12.51-53; 14.26-27)

³⁴ Quēna ado bajiro yųare yicami Jesús:

—“‘Quēnaro ņato masa’ yıgۇ, vayumi Jesús”, yųre yitۇoıabesa mۇa. Dios ı bojabeti yirã, yų ocare ajıjůnisinicđari, yųre ajitirůnųrãre ıaterۇarãma ına. To bajiri ado bajirojۇa yųre yitۇoıaņa: “ı ţurine ricatiri tۇoıarۇarãma’ yıgۇ, vayumi Jesús”, yųre yitۇoıaņa. ³⁵ ı macۇ, yųre ı ajitirůnۇjama, ı jacۇjۇa ıre ıaterۇcumı. Jacۇjۇa, yųre ı ajitirůnۇjama, ı macۇjۇa, ıre ıaterۇcumı. So macojۇa, yųre so ajitirůnۇjama, so jacojۇa, sore ıaterۇocomo. Jacojۇa, yųre so ajitirůnۇjama, so macojۇa, sore ıaterۇocomo. So ũmańıcojۇa yųre so ajitirůnۇjama, so jęjojۇa, sore ıaterۇocomo. ³⁶ To bajiri sıgۇ yųre ajitirůnųgů ı ņajare, ı yarã ņaboarine, ıre ıaterۇarãma.

³⁷ No bojagu ı jacore, ı jacure yųre ı mairo rętobusaro maigۇma, yų yų ņamasibecumi ı ũgۇma. No bojagu ı macore, ı macure yųre ı mairo rętobusaro maigۇma, yų yų ņamasibecumi ı ũgۇma. ³⁸ No bojagu, “Jesúre

bajiro rojose tãm̄os̄yar̄c̄uja ȳu” yit̄oĩabec̄uma, ȳu ȳu ñamasibec̄umi ĩ ũḡũma. ³⁹ No bojarã, no ñna bojarone ñare c̄utirãma adĩ macar̄c̄uro ñasere ĩavariquẽnac̄õari, Diore t̄oĩamenama, Dios ĩ catisere yayibetire c̄uomena ñaruarãma ñna. To bajiboarine, ȳure ajitir̄ũnrã, ȳu oca ñna gotisere ajjũnisinic̄õari, ñna s̄iarãma, Dios t̄u quẽnaro ñarona ñarãma —ȳure yicami Jesús.

“*Ado bajiro yirã ñarãma Dios t̄uj̄u quẽnase b̄ujarona*”, yire queti

(*Mr 9.41*)

⁴⁰ Quẽna ado bajiro ȳure yicami Jesús:

—M̄uare c̄õagũ ȳu ñajare, gãjerã t̄u m̄ua ejaro, quẽnaro m̄uare ñna yijama, ȳurene quẽnaro yirã yirãma. Ȳure quẽnaro yirãma, ȳure c̄õacac̄ure quẽnaro yirã yirãma.

⁴¹ “Diore gotir̄ẽtobosarimas̄u ñaḡũmi” yimasic̄õari, quẽnaro ĩre yirã, ĩre gotir̄ẽtobosarimas̄u Dios t̄u quẽnase ĩ b̄ujaroto c̄õrone b̄ujaruarãma ñna quẽne. “Quẽnaro yiḡu ñaami” yimasic̄õari, quẽnaro ĩre yirã, quẽnaro yiḡu Dios t̄u quẽnase ĩ b̄ujaroto c̄õrone b̄ujaruarãma ñna quẽne.

⁴² Riojo m̄uare gotiaja ȳu. Ȳure ajis̄yarã ñamasurã me ñna ñaboajaquẽne, ȳure ajitir̄ũnrã ñna ñajare, quẽnaro ñnare yirã, to bajiro ñna yise vaja, vaja b̄ujaruarãma ñna. Oc̄one ñnare ñna ioboajaquẽne, vaja b̄ujaruarãma —ȳure yicami Jesús.

11

Juan vãme c̄utiḡu, masare oco rãca bautizarimas̄u ĩ c̄õariarã, Jesúre ñna s̄eniĩare queti

(*Lc 7.18-35*)

¹ Ȳure, ĩ buerãre juaãmo c̄õro, ḡũbo jua j̄enituarirãc̄u ñarãre ȳure ĩ gotimasioro bero, ti sita ñarimacarianare ñnare gotimasiodirã vacaj̄u yua, Jesúrãca.

² Tirodo Juan vāme cūtigū, masare oco rāca bautizarimasū, tubiberiavijū ņaŋuju ī. Tojū ī ņarone, Jesús masare ī gotimasiocudicati, to yicōari, ĩaĭaŋamani ī yīocati queti ĩre ejayuju. Tire ajicōari, juarā ī buerimasare cōaŋumi, “Jesúre sēniāaya” yigū. ³ Yua tū ejacōari, ado bajiro Jesúre sēniāacama ĩna:

—¿Mune ņati “Rotimūorūgōrūcūmi” yigū, Dios ī cōar’i, “Yū bero ejarūcūmi” Juan ī yigotimasiocacu? ¿Gājire yuroti ņatique maji? —ĩre yisēniāacama ĩna.

⁴ To ĩna yisēniāarone, ado bajiro ĩnare yicūdicami Jesús:

—Vasa mūa. Juan tūjū tudiasa. ĩ tū ejacōari, mūa ĩasere, mūa ajisere quēne ĩre gotiba. ⁵ Ado bajiro ĩre gotiba mūa: “Jesús ī masise rāca ī yijare, ĩabetiboariarā quēne ĩama. Rujasagueri vaboariarā quēne, quēnaro vama. Gase boariarāre quēne, ĩna cāmi yatibū. Ajimena ņaboariarā quēne, ajima. Bajireariarā quēne, tudicatima. To yicōari, maioro bajirā quēne, Dios oca quēnasere gotimasio ecoama ĩna”, yigotiba, Juan tūjū ejacōari. ⁶ To bajiri, “ ‘Quēnase bujaruarāma yūre ajitirūnūrā, “Socū me yami” yūre yitūoīarāma’ yimi”, ĩre yigotiba —ĩnare yicami Jesús, Juan buerimasare.

⁷ To bajiro ī yisere ajicōari, ĩna vase rācane, Juan vāme cūtigū, masare oco rāca bautizarimasū ī ņare quetire goticami Jesús, jājarā ĩre ajisūyarāre:

—Yucú manoju vana, ¿ñimū ūgūre tūoīa vacati mūa? ¿Masa ĩna bojasere bajiro yirūa tūoīagūre ĩarā vacati mūa? “To bajiro tūoīagū me ņacami”, yimasiaja mūa. ⁸ ¿Ñimū ūgūre tūoīarā vacati mūa? ¿Quēnase sudi sāñagūre tūoīa vacati? To bajiro me tūoīariarāja mūa. “Quēnase sudi sāñarāma, quēnarivirijū, ūjarā ya virijū ņarāma”, yimasi-aja mani. ⁹ ¿Ñimū ūgūre tūoīa vacati mūa? ¿Diore gotirē-tobosarimasūre tūoīa vacatique mūa? Riojo mūare gotiaja

yũ. Gãjerã Diore gotirêtosarimasa rêtoro ñagũre ñari-arãja mũa. ¹⁰ Juan ã bajiro tire gotiro, ado bajise gotiaja Dios oca masa ñna ucamasire:

“ “Rotimũorũgõrũcũmi” yigũ, mũre yũ cõaroto rĩjoro, mũre gotiyurocũre cõasũorũcũja yũ maji’ yami Dios. Í ñarũcũmi ado bajise gotirocũ: “Yoaro mene ejarũcũmi ‘Rotimũorũgõrũcũmi’ yigũ, Dios ã cõarocũ. To bajiri rojose Dios ã bojabetire yitũ-jacõari, ã bojasejũare yi yuya mũa” yigotirocũ ñarũcũmi’, yami Dios”, yigotiaja Dios oca masa ñna ucamasire.

¹¹ Diore gotirêtosarimasa ñna gotimasire rêtoro ñamasuse ñaja, Juan, Diore ã gotirêtosasejũa. To bajiro ti bajiboajaquẽne, Juan ã gotise rêtoro ñamasuse ñaja yũ gotiroticõarã ñna gotise. “Ëjũ Dios yarã quẽnaro ã yirona mũa ñarũajama, Jesũre ajitirũnũña” ñna yigotisere yaja yũ. Ñamasurã ñaama, “Ñamasurã me ñaama Jesús ã gotiroticõarã” mũa yĩaboajaquẽne —yicami Jesús, ãre ajisũyarãre.

¹² Quẽna ado bajiro yicami Jesús:

—Juan ã gotimasũorijũne, “Ëjũ Dios yarã quẽnaro ã yirã mũa ñarũajama, rojose mũa yisere yitũjacõari, Jesũre ajitirũnũña” yirere ajicõari, ti josaboajaquẽne, yũre ajisũya variquẽnasũoadicama masa. ¹³ Juan ã gotimasũoroto rĩjorojũne, “Rotimũorũgõrũcũmi” yigũ Dios ã cõarocũre goticoayuma ñna, Diore gotirêtosarimasa. Moisere Dios ã roticũmasire quẽne, tire gotiaja ti. ¹⁴ “Diore gotirêtosarimasũ Ell’ias vãme cõtimasir’ãre bajiro bajigũ ejarũcũmi”, yigotiyujarã ñna, Diore gotirêtosarimasa. To bajiro ñna yimasirere, “Riojo ucamasĩnũma ñna” mũa yitũoĩajama, “Juan ã ejarotire gotirã yimasĩnũma”, yimasiaja mũa. ¹⁵ Mũa ajimasirũajama, quẽnaro yũre ajitirũnũña mũa —ãre ajisũyarãre yicami Jesús.

¹⁶⁻¹⁷ Quẽna ado bajiro ãre ajisũyarãre goticami Jesús:

—Ado bajiro yiräre bajiro yirã ñarāja mña, adirodoriana: Daquerã, gãjerã rãca ajerñamenare bajiro yirã ñarāja. Ñna ajeritũcurojũ rujicõari, gãjerãjũare, ado bajiro ñnare gotirujirãma: “ ‘Basavariquẽnato mani’ yirã, mñare jutibosaboabũ yña. To bajiro yña yiboajaquêne, basabejũ mña. To bajiri, ‘Rijariarãre bũcũrã ñna oticatore bajiro sũtiriose boca otirũarãja mña, yña basañarone’ yiboabũ yña. To yña yiboajaquêne, otibejũ mña”, ñnare yigotirãma, ñna rãca ajerñamenare. ¹⁸ Ñna rãca ajerñamenare bajiro yirã ñarāja mña, adirodoriana. Juan, quẽnase bare babeti, quẽnase idire idibeti bajiñañuju ñ. To bajiro bajigu ñ ñajare, “Vãti sãñagũ ñagũmi”, ñre yitũoĩacajũ mña, ñre ajiterã ñari. ¹⁹ Ñ bero gotimasiosũocajũ yñ, Dios ñ roticõacacũ. Yũjũama, quẽnase bare ba, quẽnase idire idi bajiñaja yñ. To bajiro yigu yñ ñajare, “Jairo bagũ ñaami. Idimecũgũ ñaami. Ujũre gãjoa sãnibosarimasa, gãjerã rojose yiräre quêne ñnare baba cõtiami”, yũre yĩajũnisiniaja mña, yũre quêne ajiterã ñari. To bajiro Juanre quêne, yũre quêne mña yise ti ñaboajaquêne, Dios ñ masise rãca yña yise ti ñajare, berojũ, “Quẽnaro yirã yiboayuma” yũare yimasirũarãja mña —yicami Jesús, ñre ajisũyarãre.

Ñre ajitirũnũbeti macariana ñna bajisere to yicõari, ñna bajirotire tũoĩacõari, Jesús ñ gotire queti

(Lc 10.13-15)

²⁰ Tijũ bero, ñaĩañamani ñ yĩĩoboacana ya macarire tũoĩacõari, Dios ñ bojabetire ñna yisere tũoĩasũtiriticõari, ñna yitũjabetijare, rojose ñna tãmũorotire yigu, ado bajiro goticami Jesús:

²¹ —Coraz'in macana, to bajicõari, Betsaida macana quêne, bũto rojose tãmũorũarãma. Ti macarianare ñaĩañamani yñ yĩocatore bajiro, Tiro vãme cõtĩ macanare,

Sidón vāme cūti macanare quēne ĩaĭñañamani yu ĩojama, tirūmujū rojose ĩna yisere tuoĭasūtiriticōari, yitujacoaboriarāma ĩnama. “Rojose yua yisere yiruabeaja” yisutiritirā ĩnari, sūtiritirā ĩna sãñasejua sudi vasoacōari, to yicōari, ĩna rujoariju ōja majeoboriarāma. ²² Riojo m̄are gotiaja yu. Sidón macana, to bajicōari, Tiro macana ñamasiriarā rētoḅusaro rojose tām̄oruarāma ĩna, Dios, masare ĩ beserirūm̄u ti ejaro. ²³ Capernaum macanajua, “Quēnarā ĩnari, ō vecaju Dios ĩ ĩaroju ĩarona ĩaja mani”, yituoĭaboarāma ĩna. To bajiro ĩna yituoĭaboajaquēne, Dios tujū ñabetiruarāma. Rojose tām̄uotujabetiriaroju ĩaja ĩna cōaecorotoma. Toanare ĩaĭñañamani yu yĭocatore bajiro, Sodoma macanare quēne yu yĭojama, rojose ĩna yisere yitujaboriarāma ĩnama. To bajiri adirūm̄urire quēne ñacōaboriaroja ti maca maji. ²⁴ Riojo m̄are gotiaja yu. Ti macana yure ĩna ajirūabeti vaja, Diojua, rojose ĩnare yirucumi masare ĩ beserirūm̄u ti ejaro. Sodoma macana ñamasiriarā rētoḅusaro rojose tām̄oruarāma ĩna —yituoĭa goticami Jesús.

“Quēnaja” Diore Jesús ĩ yivariquēnare queti

(Lc 10.21-22)

²⁵⁻²⁶ ĩre ajitirūnurāre, “M̄u suorine ajitirūnuama” yigu, “Quēnaja” Diore yivariquēnagũ, ado bajiro yicami Jesús:

—Cacu, ō vecagu ɥju ĩaja m̄u. Adi macarucurore quēne, ñajediro ɥju ĩaja m̄u. “Jēre masiaja yua” yituoĭaboarāre, “Yu ocare ajimasibeticōato ĩna” yigu, ĩnare masirioaja m̄u. To yicōari, “Masimena ĩaja yua” yirājua, “Ajimasiato” yigu, ĩna ajimasirotire yirēm̄orūgūaja m̄u. To bajiro m̄u yijama, m̄u bojarore bajiro yigu yaja m̄u —Diore yicami Jesús.

²⁷ To yicōari, ĩre ajisuyarājua, ado bajiro goticami Jesús:

—Yũ jacũ ã ejarẽmose suorine jediro yimasijeogu ñaja yũ. “Tire yimasiato” yigu, adì macarucurojũre yũre cõacami yũ jacũ. To bajiro yicacũ ñari, yũ yisere masijeocõami yũ jacũ. Yũ quẽne, ã yisere masijeocõaja. “Ïre masiato” yigu, yũ beserã rĩne yũ jacũre masiama —ĩnare yicami Jesús.

²⁸⁻²⁹ Quẽna ado bajiro yicami Jesús:

—Cojo vãme me ãna rotise ti ñajare, jairo gajacõari, ñarãre bajiro bajiaja mũa. “Tire cudijeomasimenaja mani” yisutiritirã ñari, yũjũare ajirã vayá mũa. Yũre ajitirũncõari, rũcũse gajacõari, ñamenare bajiro variquẽnarã ñaruarãja mũa. Masare maituoĩagũ ñaja yũ. “Ñamasugũ ñari, ãnare ajirũcũbuobeaja yũ” yigu me ñaja yũ. No bojarãre yũre ajitirũnrãre ejarẽmogũ ñaja. ³⁰ Mũare yũ rotise josari me ñaja. To bajiri yũ rotisere mũa cudijama, variquẽnaruarãja mũa —yicami Jesús.

12

Ususãjariarũmu ñaboajaquẽne, Jesús buerimasa trigo ajere tũnejuacõari ãna bare queti

(Mr 2.23-28; Lc 6.1-5)

¹ Ususãjariarũmu ti ejaro, trigo ãna oteriavese cutore vacajũ, Jesúrãca. To bajivanane ñiorijacajũ yũa. To bajirã ñari, trigo ricare tũnejuacõari, yũa ãmorine ti gasere sũguẽreacõari, bacajũ yũa. ² Tire yũa basere ãacõari, fariseo masa ado bajiro Jesũre ãre yicama ãna:

—¿Ïãña mũ! Mũ buerimasa, ususãjariarũmu yire mere yama ãna —Jesũre ãre yicama.

³ To bajiro ãna yisere ajicõari, ado bajiro ãnare cudicami Jesús:

—¿David ñamasir'i ã babarã rãca ñiorijacõari, ãnare ã ãmato bamasirere masibeaati mũa? ⁴ Ñiorijarã ñari, “Mani rãca ñagũmi Dios” masa ãna yirivijũre sãjacõari,

Diore ñre rñcũbuorã gãjerã pan ñna cũboarerene juacõari, ñ babarã rãca bamasĩñuju ñ. To bajiri Moisés ñamasir'i ñ gotimasirema, “Paia rñe baruarãma” ñ yimasiboarerene bamasĩñujarã ñna. To bajiro ñna yiboajaquẽne, ti vaja rojose ñnare yibetimasĩñumi Dios. ⁵ ¿“Ûsusãjariarũmu ti ñaboajaquẽne, Diore yirũcũbuoriaviju paia ñna moatujabetiboajaquẽne, rojose yirã me yirãma ñna”, Moisés ñamasir'i ñ yucamasirere masiritiatique mũa? ⁶ Riojo mũare gotiaja yũ. Moisére ñ roticũmasire, Diore yirũcũbuoriaviaye ñnase rětobũsaro ñamasuse ñaja mame yũ rotise. ⁷ Dios oca masa ñna ucamasire ajimasibetibũsaja mũa. Ado bajiro gotiaja ti: “Vaibũcurã ecariarãre sñacõari, yũre ñna soemũosere bojabetibũsaja yũ. Masa gãjerãre quẽnaro ñna ñamaisejũare bojamasucõaja yũ”. To bajiro yigotiaja Dios oca masa ñna ucamasire. Tire, “Ado bajiro yirũaro yaja” yĩajimasirã masu mũa ñajama, Dios ñ bojabeti rojose ñna yibetiboajaquẽne, “Rojose yama” yũ buerimasare ñnare yĩabetiboriarãja mũa. ⁸ Yũ, Dios ñ roticõacacu, “Ûsusãjariarũmũre ado bajiro mũa yijama, quẽnaja. To bajirojũa mũa yijama, quẽnabeaja”, yirotigũ ñaja yũ — ñnare yicũdicami Jesús, fariseo masare.

*Ãmo ñujobecũre Jesús ñ ñujorotire queti
(Mr 3.1-6; Lc 6.6-11)*

⁹ To yi vacũne, Dios ocare ñna bueriviju yũare ãmato sãjacami Jesús. ¹⁰ Ti vijũ ñacami sñgũ, cojojacatuã ãmo ñujobecũ. Fariseo masa quẽne ñacama. “Jesús, rojose yimi” ãjarãre yi ocasãrũarã, ado bajiro Jesũre sẽnĩiatocama ñna:

—Dios, Moisére ñ roticũmasirere mũa tũoĩajama, “Adirũmu ãsusãjariarũmũre rijaye cutirãre mani catiojama, quẽnacõaroja”, ¿yitũoĩati mũa? —Jesũre ñre yisẽnĩiatocama ñna.

¹¹ To ñna yisere ajicõari, ado bajiro yicami:

—Oveja mña ecar'i, gojeju ĩ quedirosasãjama, “Ŭsusã-jariarũmũ ñaja” yirã, ¿ãmira vamenada mña? ¹² ¿Masũ rětobusaro maiĩogũ ñatique, ovejajma? To bajiri, ¿usũsã-jariarũmũ quẽne, no bojagu masũre quẽnaro mani yijama, quẽnabetojarique? —ĩnare yicũdicami Jesús.

¹³ To yicũari, ãmo ñujobecũjmare:

—Mũ ãmore ñujoya —ĩre yicami.

To ĩ yirone, ĩ ãmore ĩ ñujorone, quẽnaejacoacaju yuja, gaje ãmore bajirone. ¹⁴ To ĩ yisere ĩacũari, budicoacama fariseo masa. Budiacũari, “¿No bajiro yicũari, Jesũre sãrotirãti mani?” gãmerã yĩnagõñujarã ĩna.

Diore gotirětobosarimasa Jesús ĩ bajirotire yirã, ĩna ucamasire queti

¹⁵ To bajiro ĩre ĩna tuoĩa ñagõjaisere masicũari, gajeroju vacami Jesús quẽna. Jesús ĩ vato ĩacũari, ĩre suyacaju yma, jãjarã masa. Toju ñajediro masa rijaye cutirãre catiocami.

¹⁶ To yicũari, ĩnare ĩ catiosere gotirotibeticami ĩ. ¹⁷ To bajiro ĩ yijama, “Isa'ias ñamasir'i Diore gotirětobosarimasũ, ‘To bajiro bajirũaroja’ ĩ yucamasiriarore bajiro bajiato” yigũ, yicami, ado bajiro yise ti ñajare:

¹⁸ “Ãni ñaami, yũre moabosarimasũ yũ besecacũ, yũ ĩavariquẽnagũ. Esp'iritu Santore ĩre cõarucũja yũ, ĩ ejarẽmose rãca yũ bojasere yimasiato ĩ’ yigũ. To bajiri, ‘Ado bajiro riojo yiroti ñaja’ yigotibatõrucũmi, masa ñajedirore.

¹⁹ Masa rãca oca josabecũ ñarucũmi ĩ. To yicũari, masa ĩna ĩaro rĩjorojma rũgõcũari, ‘Yũre ajiya mña. Masigũ ñaja yũ’ yiavasã gotibecũ ñarucũmi.

²⁰ Yũre quẽnaro ajitirũnũmenare, yũ bojarore bajiro yimasibeticũari, tuoĩasũtiritirãre quẽne mairucũmi. ĩnare ĩamaicũari, ‘Quẽnaro yũre ajitirũnũato ĩna’ yigũ, ĩnare ejarẽmõrucũmi.

²¹ Jud'io masa me ñarã rojose ñna yise vaja rojose ñna tãmuoborotire, ‘Manire yirëtobosarũcumi. To bajiri rojose tãmuobetiruarãja’ yivariquẽna yuñaruarãma”, yucamasiñumi Isa'ias, Diore gotirëtobosarimasu.

“Vãtia uju ñ masise rãca yigu yami Jesús” ñna yire queti
(Mr 3.20-30; Lc 11.14-23; 12.10)

²² Sīgũ ñacami vãti sãñagũ. “Ïabeticõato; ñagõbet-icõato” yigu, ñ usũjũre sãjacõari, ñañumi. To bajiri Jesús tũju ñre ãmiejacama masa. To ñna yirone, ñ usũjũre sãñagũre vãtire burocacami Jesús. To bajiri vãtire ñ burocajare, ñamasi, ñagõmasi, bajicoacami yuja. ²³ Tire ñacõari, no yimasibeticama masa jedito:

—¿Uju David ñamasir'i jãnami “Rotimũorũgõgõcumi” yigu, Dios ñ cõar'i mani tũõia yuñarũgũgũ ñatiquẽ ñ? —yicama.

²⁴ To bajiro ñna yisere ajicõari, ado bajiro ñnare yicama fariseo masajũa:

—Vãtiare ñ bureajama, vãtia uju Beelzebú vãme cutigu ñ masise rãca vãtiare bureagu yami —yicama ñna.

²⁵ To bajiro ñna tũõiasere ñamasicõari, ado bajiro ñnare gotimasiocami Jesús:

—Cojo sitana rotirimasa ñna gãmerã quẽajama, ñna masune gãmerã sãayayirã yirãma. To bajirone bajiroja cojo macanare quẽne, cojo vi ñarãre quẽne. ²⁶ To bajirone bajiroja vãtiare quẽne. Vãtia ñna gãmerã bureajama, “Masare rojose yitũjato mani” yirã yiborãma. To bajiro ti bajijare, “Beelzebú vãme cutigu ñ masise rãca masa usũrijũ sãñarãre vãtiare bureaami” yũre mũa yiboase, riojo yirã me yaja mũa. ²⁷ To bajiro yũre mũa yitũõiaboajama, mũa buerã quẽne masa usũrijũ sãñarãre vãtiare ñna bu-reasere, “Vãti ñ masise rãca burearãma ñna quẽne” yirãre bajiro yaja mũa. To bajiro mũa yijama, “Tũõiamavisiaja

mua”, muare yiruarãma ñna, mua buerã. ²⁸ Ado bajirojua tuoïarona ñaboaja mua: “Vãtia uju ñ masise rãca me yami. Esp'iritu Santo ñ masise rãcajua vãtiare bureaami”, yure yituoïarona ñaja mua. To yicõari, “ ‘Rotimuorũgõrucami’ yigu, Dios ñ cõar'i ñaami”, yure yituoïamasiroti ñaja muare.

²⁹ “To bajiro yimasiroti ñaboaja” yigu ñari, “Quẽn-abusaro yimasiatu” yigu, quẽna gajeye gotimasiore queti muare gotiaja yu: Sígũ, gãji guamu ya vi sãjacõari, ñre ñ siabetijama, gajeyeũni emamasibecami. ñre siacõari, ñ gajeyeũnire emamasigũmi yuja. To bajirone bajiaja yure quẽne. Vãtia uju ñ rotiboasere ñre yirotibeticõari, masa usuriju sãnarãre vãtiare yu burease suorine, vãti ñ rotiajeboariarãre ñre emagũ yaja, “Yu yarã ñato” yigu.

³⁰ No bojarã yu gotiboasere ajitirũnumenama, yure ajitirũnuboronare matarã yirãma. No bojarã, “Jesũre ajitirũnũña” yure yigoticudibosamenama, “ñre ajibesa” yirãre bajiro bajirã ñarãma.

³¹ To bajiri, riojo muare gotiaja yu. Masa jediro rojose ñna yijama, jediro rojose ñna ñagõjaquẽne, sutiriticõari, Diore ñna sãnijama, rojose ñna yisere masiriorucami. To bajiboarine, Esp'iritu Santojuare rucubnomena rojose ñre ñna yitud'ijama, tirema masiriobetirucami. ³² No bojarã, Dios ñ roticõacacure rojose yure ñna ñagõro bero, sutiriticõari, Diore ñna sãnijama, rojose ñna yisere masiriorucami. To bajiboarine, Esp'iritu Santo ñ masise rãca moagũre, “Satanás ye rãca moami” ñna yitud'ijama, Esp'iritu Santojuare rojose yirã yirãma. Tirema gajerodo ti ñacoaboajaquẽne, masiriobetirucami Dios —ñnare yicami Jesús.

“*Ti rica* cutise suorine yucãre ñamasiaja mani”, Jesús ñ yigotimasiore queti

(Lc 6.43-45)

³³ Quēna ado bajiro goticami Jesús:

—Yucá quēnase ti rica cutijama, “Quēnaricū ñaja”, yaja mani. Yucá rojose ti rica cutijama, “Rojoricū ñaja”, yaja mani. Ricare ñacōari, “Quēnaricūaye, rojoricūaye ñaja”, yīāmasiaja mani. To bajirone bajaiaja mani yise quēne. “Quēnagū ñaami. Rojogu ñaami” yimasiruarā, ī yisere ñaīarāja mani. ³⁴ Vātia ujū rojose ī yirore bajirone rojose yijairā ñaja mūa. Rojorā ñari, no yirā quēnasere ñagōmenaja mūa. Mūa usurijū rojose mūa tuoīāsāñasere ñagōburūgūaja mūa. ³⁵ Quēnagūma, quēnaro tuoīagū ñagūmi. To bajiri quēnase ñagōgūmi. Rojogūjūama, rojose tuoīagū ñagūmi. To bajiri rojose ñagōgūmi. ³⁶ Riojo mūare gotiaja yū. Ejaruaroja masa jedirore Dios ī beserirūmū. Tirūmūre tocārāca vāme, mūa ñagōria vāmere, “Ado bajiro ti bajijare, to bajise ñagōcaju yūa”, Diore yigotiruarāja mūa. ³⁷ To bajirone bajiruaroja. Mūa ñagōrere ñacōari, “Quēnase bñjarā, rojose tāmūorā, bajiruarāja”, yirotirūcūmi Dios —īnare yicami Jesús.

*“Īñāñamani mū yīosere bojaja yūa”, ñna yire queti
(Mr 8.12; Lc 11.29-32)*

³⁸ To ī yiro bero, ado bajiro ñre yicama fariseo masa, Dios ī rotimasire gotimasiōrimasa quēne:

—Gotimasiōrimasū, ñāñāñamani mū yīosere bojaja yūa
—Jesúre ñre yicama ñna.

³⁹ To ñna yirone, ado bajiro ñnare cūdicami Jesús:

—Mūa adirodoriana, rojose yirā jājarā ñaja mūa. Yūre ajiterā ñari, ñāñāñamani mūare yū yīosere bojaboaja mūa. To bajiro mūa bojaboajaquēne, to bajise mūare yīīobetrūcūja yū. To bajiboarine Jonás ñamasir'i Diore gotirētobosarimasū ī bajimasirere bajiro bajīīoroti ñaroja. ⁴⁰ N'īnive vāme cūti macana ñamasiriarā, ñna tūjū Jonás ī ejaroto rñjoro idiarūmū, idia ñami vai jaigū gūdajoajū

ĩ ñamasirere ñnare ĩ gotisere ajicōari, “Diore gotirēto-bosagu ñnaami”, ĩre yituoĩañujarã ĩna, N'inive macana. To bajiro bajirucaja yu quēne, Dios ĩ roticōacacu quēne. Idia ñami, idiarũmu sita eñerocaju yu ñarere ajicōari, “Dios ĩ cōar'ine ñañumi”, yimasiruarãma ĩna, masa. ⁴¹ N'inive macana ñamasiriarã, Jonás ñamasir'i Dios oca ĩ gotisere ajicōari, rojose ĩna yisere sutiriticōari, yitujamasiñujarã ĩna. Jonás rētoro ñamasugũ ñaja yu. To bajiro yu bajiboajaquēne, muajuama, rojose mua yisere yitujabeaja mua. To bajiro yirã mua ñajare, masare Dios ĩ beserirũmu ti ejaro, ado bajiro bajiruaroja: N'inive maca ñamasiriarã, tudicaturuarãma ĩna. Tudicaticōari, “Mua ye suorine rojose tãmuoruarãja”, muare yĩaruarãma. ⁴² Sabá sitana ujo ñamasirio, “Uju Salomón quēnaro masigũ ñañuju” yire quetire ajicōari, sōju vadicōari, ĩre ajigo ejamasĩñuju so. Salomón rētoro ñamasugũ ñaja yu. To yu bajiboajaquēne, muajuama, yure ajitirũnubeaja mua. To bajiri, masare Dios ĩ beserirũmu ti ejaro, ado bajiro bajiruaroja muare: Salomón tu ejamasirio, tudicaticōari, “Mua ye suorine rojose tãmuoruarãja”, muare yiruocomo so, yu gotisere ajirã ñboarine, rojose mua yitujabetijare —fariseo masare ñnare yicami Jesús.

Vãti, masu usujure sãñar'i, budicōari, ĩ tudisãjare queti (Lc 11.24-26)

⁴³ Quēna ado bajiro yicami Jesús:

—Vãti, masu usujure budicōari, oco manoriju vacudigumi. Tujariajau bujabecu ñari, ado bajiro tuoĩagũmi: ⁴⁴ “Yu budiriarojune vacoarocu ñagũja yu”, yituoĩagũmi. Masu usujure ĩ budigoriarore tudiejagu ĩ ñajama, gōjan-abiose mano, quēnarivire bajiro masu usujure ñaejagumi. ⁴⁵ To bajiro ĩ usujure ñaejacōari, cojomo cōro jua jēnitarirãcu vãtia ĩ rētoro rojose yirãre ũmato ejagumi. To yicōari, ĩna ñaro cōrone masu usujure sãjarãma ĩna. To

bajiri, rētorobusa rojose yigu ñagūmi masu yuja. To bajirone bajiruaroja muare adirodoriana rojose yirāre quēne. Vātiare yu bureacōaboajaquēne, yure ajitirūnūmena ñari, butobusa rojose yirā ñaja mua —īnare yicami Jesús.

“Yu yarāma ado bajiro bajirājua ñaama”, Jesús ĩ yire queti

(Mr 3.31-35; Lc 8.19-21)

⁴⁶⁻⁴⁷ Jesús, masare ĩ gotimasio ñarone, sīgū, ado bajiro Jesúre ĩre yicami ĩ:

—Mu jaco, mu bederā rāca macajúju ejama, mu rāca ñagōruarā —Jesúre ĩre yicami.

⁴⁸ To bajiro ĩ yiboajaquēne, ado bajiro ĩre yicadicami Jesús:

—¿Ñimo ñati yu jacoma? ¿Ñimarā ñati yu bederāma? —ĩre yicami Jesús. ⁴⁹ To yigune, yuajuare, ĩ buerimasare ĩacōari,

—Mua ñaja yu bederāma, yu jacore bajiro bajirāma. ⁵⁰ No bojarā yu jacu ō vecagu ĩ rotirore bajiro yirā, ĩna ñarāma yu bederāre bajiro bajirāma, yu jacore bajiro bajirāma —yuare yicami Jesús.

13

Oterimasu ĩ bajirere Jesús ĩ gotimasio queti

(Mr 4.1-9; Lc 8.4-8)

¹ Tirūmune, vi ñar'i, budiacōari, utabucura taju yua rāca ejarūju ejacami Jesús. To bajicōari, masare gotimasio. ² Masa jājarābusa ĩna rējaquearo ĩacōari, cūmuaju vasājacōari, rujicami Jesús. Masajuama, utabucura tu rūgōcōacama ĩna. ³ To bajicōari, cojo queti me tuoĩacōari, “Ado bajiro bajisere bajiro bajaia” ĩnare yigotigu ñari, ado bajise goticami:

—Sĩgũ oterimasu, veseju ote ajere otegu vacumi. ⁴ Vese ejacõari, ote ajere ï reabaterone, gajeye maaju vëjaquearoja. To bajiri minia ejacõari, tire bareacõarãma ïna. ⁵⁻⁶ Gajeyema, gũta joeju reajeoroja. Tijũ, mojeroaca sita ti ñajare, guaro ti judidaboajaquëne muiju, asisĩocõagũmi. To bajicõari, oco manijare, sĩnireacoatoja ti. ⁷ Gajeyema, jotayucũ vatoaju vëjaquearoja. To bajicõari, ti judiboajaquëne, jotajua bucũaveocoatoja ti. ⁸ Gajeyema, sita quënarõju vëjaquearoja. To baji, judibucũacõari, quë-nase ñacõari, jairo rica cõtiroja. Cojotõ, cien ñaricari rica cõtiejoroja. Gajetõ sesenta ñaricari, gajetõ treinta ñaricari rica cõtiroja. ⁹ Tire mũa ajimasirũajama, quënarõ tũoĩaña mũa —yicami Jesús.

“Ado bajiro yigu, gotimasiore queti gotirũgũaja yũ”,
Jesús ï yire queti

(Mr 4.10-12; Lc 8.9-10)

¹⁰ To ï yiro bero, ado bajiro Jesũre sēnĩĩacaju yũa, ï buerã:

—¿No yigu gotimasiore queti tũoĩacõari, ïnare gotirũgũati mu? —ĩre yisēnĩĩacaju yũa.

¹¹ To yũa yirone, ado bajiro yũare cũdicami:

—“Uju Dios yarã quënarõ ï yirona yũa ñarũajama, ado bajiro yiroti ñaja” ïna yimasibeticatire, yucũrema Dios ï masise rãca ajimasiasa mũama. To bajiboarine, gãjerãjuama, Dios ï bojabetijare tire ajimasibeamã. ¹² No bojagu Diore ajitirũnũgũre, “Quënarõbũsa ajimasiato” yigu, ï masisere cõarucumi Dios. Gãjirema, ïre ajigu ñaboarine, ïre ï ajitirũnũbetijare, ï ajimasiboasere masiriojeocõarucumi ï. ¹³ Masa ado bajiro bajirã ïna ñajare, gotimasiore queti ïnare gotirũgũaja yũ: Yũ yĩosere ïarã ñaboarine, yũ gotisere ajirã ñaboarine, ajimasicõari, “To bajiro manire

yigotigu yatique”, yimasimenama. ¹⁴ Diore gotirêto-bosarimasu Isa'ias ñamasir'i mua bajirotire yigu, Dios i ñagõmasirere ado bajiro yuucamasiñumi:

“Yure ajirã ñaboarine, ajimasibeticõa ñaruarãma. Yu yĩosere ñarã ñaboarine, “To bajiro bajisere yigu yatique i”, yĩamasibeticõa ñaruarãma.

¹⁵ Ado bajiro bajirã ñari, yu yere ajimasimena ñarãma ñna: Gãmo gojeri tusubeti, to yicõari, caje ñamenare bajiro bajirãma. To bajiro yu yijama, “Yu yere tuoĩaruamena ñaama” yigu yaja yu. To bajirã ñari, tire quẽnaro ajimasibeama. Yu yere ñna tuoĩaruajama, tire ajimasicõari, yu bojarore bajiro tuoĩavasoacõari, yure sãnirũcuboborãma ñna. Yure ñna sãnijama, yure ñna cãmotadicõa tũjaborotire ñnare yirêto-bosaboguja yu’, yigotiami Dios”, yuucamasiñumi Isa'ias ñamasir'i.

¹⁶ Variquẽnaña mua. Yu yĩosere tuoĩacõari, yu bojarore bajiro tuoĩavasoariarã ñari, tire yu gotimasiosere ajimasiaja mua. ¹⁷ Riojo muare gotiaja yu. Tirũmuju jã-jarã Diore gotirêto-bosamasiriarã yucu muare yu yĩosere ñaruamasiboayuma. Yu gotimasiosere mua ajisere ajiruamasiboayuma. To bajiri mua, jairo yu yĩosere masirã ñari, to yicõari, yu gotimasiosere ajirã ñari, variquẽnaña mua —yuare yicami Jesús, i buerãre.

Ado bajise tuoĩacõari, “Oterimasu i bajire quetire gotibu yu”, Jesús i yire queti

(Mr 4.13-20; Lc 8.11-15)

¹⁸ Quẽna ado bajiro goticami Jesús:

—Ado bajise tuoĩacõari, oterimasu i bajire quetire gotibu yu: Quẽnaro ajiya mua. ¹⁹ Ote aje, maaju vẽ-jaquearere, minia ñna barere yu yijama, “Uju Dios yarã quẽnaro i yirona ñna ñaruajama, ado bajiro yiroti ñaja” yu

yigotimasiosere ñna ajiboasere, vātia uju ejacōari, guaro ĩ masiriosere yigu yibu yu —yuare yicami.

²⁰⁻²¹ —Gūta joeju vējaqueacōari, guaro judibucuaboarere, muiju ĩ asisiorere yu yijama, yu yere ajicōari, quēnaro variquēnase rāca ajirā ñaboarine, yoaro mene tire ñna quejerotire, to yicōari, yu gotisere ajirā ñna ñajare, gājerā rojose ñnare ñna yijama, yoaro mene yu ocare ñna ajitujarotire yigu yibu. ²² Jotayucá vatoaju vējaqueacōari, judiboarere jotajua ti bucuaveorere yu yijama, yu gotisere ajirā ñaboarine, adi macarucuro ti bajisejuare tuoïarejairā ñari, to yicōari, gajeyeūni bojatuoïarā ñari, yu yejuare tuoïatujacōari, yu bojarore bajiro yimenare yigu yibu yu. ²³ Sita quēnaroju vējaqueare judibucuaacōari, quēnase rica cutirere cojotō cien ñaricari, gajetō sesenta ñaricari, gajetō treinta ñaricari rica cutirere yu yijama, yu gotimasiosere ajimasicōari, Dios ĩ bojarore bajiro quēnaro yirā yu ocare ñna gotimasiose suori, gājerā masa quēne yure ñna ajitirūnurotire yigu yibu —yuare yicami Jesús.

Trigo vatoaju vidi judire queti

²⁴ “Masare Dios ĩ beserirūmu ti ejaro ado bajiro bajiruaroja” yigu, gaje queti gotimasiocami Jesús:

—Sīgū ĩ ya veseju trigo ajere oteguami. ²⁵ ĩ otero bero, ĩre moabosarimasa ñna cānitoye, ĩ ya vese ejacōari, vidi oterudigūmi, ĩre ĩategu ñari. To yigajano, vacoacūmi ĩ. ²⁶ To bajiri trigo ti judibucuoato, vidi quēne ruyuaraja. ²⁷ To bajisere ĩacōari, ñna ujure gotirā vanama ñna. ĩ tu ejacōari, ado bajiro yirāma: “Yuā uju, ¿no yiro trigo rīne mu otecati ñaboarine, vidi quēne judiri?”, yirāma, ñna ujure. ²⁸ To ñna yijare, “Sīgū yure ĩategu oterimi”, ñnare yigūmi ĩ. To ĩ yirone, “¿Ado cōrone yua vūerearā vatire bojati mu?”, ĩre yisēniāarāma ñna. ²⁹ To ñna yisere ajicōari, ado bajiro ñnare yigūmi ñna uju: “¡Vuebesa maji! Muā vūejama,

ote rãcane vñecõarãja mña. ³⁰ Trigo rãca bñcñacoajaro maji. Ti rica cuti bñcñaro ãacõari, tire jua bajirãne vñereacõari, soereacõaruarãja mña. Trigore juacõari, tire cñriavijũ cñcõaruarãja mña”, ãnare yirotigumi oterimasũ —yigotimasiocami Jesús.

“*Mostaza vãme cutiũ rica, ajeare bajiro bajaia*”, Jesús ã yire queti

(*Mr 4.30-32; Lc 13.18-19*)

³¹ Quẽna ado bajiro gotimasiocami Jesús:

—“Rotimũorũgõrucuja mu” yigũ, Dios ã cõagũ, yũ gotimasiosere no bojarã ãna ajitirũñujama, mñare yũ gotisere mojoroaca ajimasiboarine, rojose ãna ñare cñtisere tuoãvasoacõari, tocãrãcarũmuri quẽnaro ñamũjarũgũcõari, quẽnaro ajimasimũjarũgũjama, ado bajiro bajiruaroja: Sĩgũ ã ya vesejũre mostaza ajea otegumi.

³² Gajeye ote aje rẽtoro rũjaricaca ñaroja ti mostaza ajeaca. To bajiri ã oterica mojoricaca ñaboarine, ti judibñcñacoajama, ote yucũri rẽtobũsaricũ jairicũ ñaroja tiũ. Jairicũ ti ñajare, tiũ rũjũrijũ minia ãna ria cutiroti-jũrire quẽnorãma ãna —yigotimasiocami Jesús. ^e

“*Pan vauvasere bajiro bajaia*”, Jesús ã yire queti

(*Lc 13.20-21*)

³³ Quẽna ado bajiro gotimasiocami Jesús: “ ‘Rotimũorũgõrucuja mu’ yigũ, Dios ã cõagũ, yũ gotimasiosere no bojarã ãna ajitirũñujama, mñare yũ gotisere mojoroaca ajimasiboarine, rojose ãna ñare cñtisere tuoãvasoacõari,

^e **13:32** Mostaza ajea ti bajire queti Jesús ã gotirere, “Ado bajiro yiruaro yaja”, yiyujarã Dios oca masa ãna ucamasirere buerẽtobudiriarã sĩgũri: “Jesús ã gotimasiosere ajitirũñurã ã ñarirodo mojoroaca ñaboarine, jãjarã ãna bũjurotire yigũ yiyuju Jesús”, yiyujarã ãna.

tocārācarūmuri quēnaro ñamujarūgūcōari, quēnaro ajimasimujarūgūjama, ado bajiro bajiruaroja” yigū, gaje gotimasiore queti goticami:

—Rōmio, pan quēnogoago, trigo vetare idiaji vasācōari, pan ūmato vauvasere vūogomo so. To so yijare, jairo vauvaroja ti. Tire bajirone bajiruaroja, Diore rotibosagure yure ajitirūnurā jājarābusa mua bujuroti —īnare yigotimasiocami Jesús.

“Ado bajiro Diore gotirētobosarimasū ī yuicamasire ñajare, gotimasiore queti gotirūgūaja yū”, Jesús ī yire queti
(Mr 4.33-34)

³⁴ Gotimasiore queti rāca rīne īnare gotimasiōrūgūcamī Jesús. ³⁵ Diore gotirētobosarimasū, “Ado bajiro bajiruaroja” ī yimasire ti ñajare, to bajise gotimasiōrūgūcamī. Ado bajiro ucamasiñumi Diore gotirētobosarimasū: “Masare īnare gotigū, gotimasiore queti tuoīacōari, īnare gotimasiōrūcūmi. To bajiro yigū, adi macarūcūro ti ruyuaroto rījorojūne masiñamanicoadirere gotimasiōrūcūmi”, yuicamasiñumi Diore gotirētobosarimasū Jesúre tuoīa yugū.

Trigo vatoqū vidi judirema, “Ado bajiro yiruaro yaja”, Jesús ī yigotimasiore queti

³⁶ To bajiro yigotigajanocōari, “Vijū vacū yaja yū”, yisājacoacami. To ī yi vatone, īre sūyasājacajū yūa quēne. Sājaejacōari, ado bajiro īre sēniīacajū yūa, ī buerimasa:

—Vidi judire quetire, “Ado bajiro yigū, to bajise yibū yū”, yūare yigotiya —Jesúre īre yicajū yūa.

³⁷ To bajiro yūa yijare, ado bajiro yūare goticami Jesús:

—Trigo oterimasure yigū, yū masune yigū yibū yū, Dios ī roticōacacūre yū yijama. ³⁸ Ī ya vesere yū yijama, adi macarūcūro mani ñarojūre yigū yibū yū. Trigore yū yijama, yū yarāre quēnaro Dios ī yirāre yigū yibū. Vidire yū yijama, vātia ūjū, Satanás ī bojarore bajiro yirāre

yigũ yibũ. ³⁹ Vidi oterudirimasure yũ yijama, vãtia Ʃjũ Satanãre yigũ yibũ. Trigo ti bũcũatojũ ãna juarere yũ yijama, adi macarũcũro ti jedirotire yigũ yibũ. Trigo ti bũcũaro, juarimasare yũ yijama, ángel mesare yigũ yibũ, yicami Jesús. ⁴⁰ Vidi juacõari, ãna soerearore bajiro bajirũaroja adi macarũcũro ti jedirojũ. ⁴¹ To cõrone, Dios ã roticõacacũ, Diore rotibosagu, ángel mesare cõarũcũja yũ. “Yũ yarã vatoaju ñacõari, rojose yirãre, to yicõari, rojose ãnare ũmato yirãre quẽne juaáya” yigũ, ãnare cõarũcũja. ⁴² ãnare juacõari, jeame yatibetimejũ reacõarũarãma ãna. Tojũ ñacõari, bũto rojose tãmũorã ñari, guji põguẽ, oti, yirũarãma ãna. ⁴³ Ángel mesa, ãnare ãna reagajanoro bero, ado bajiro bajirũarãja mũa: Mani jacũ, “Quẽnase yirã ñaama” ã yĩarã ñari, muiju ã busurore bajiro busurũarãja. Tire mũa ajimasirũajama, quẽnaro tũoĩaña —yũare yicami Jesús.

Bũto vaja cutisere ã bũjare queti

⁴⁴ Quẽna ado bajiro yũare goticami Jesús:

—Dios yarã quẽnaro ã yirã mũa ñase bũto quẽnaja ti. To bajiro ti bajijare, sĩgũ bũto vaja cutise bũjagure bajiro bajirãma Dios yarã ñarũarã. Sĩgũ yere bũto vaja cutisere sita vatoaju ã yayioboarere bũjagũmi gãji. Tire bũjacõari, quẽna tijũne tudiyayiocũgũmi. To bajiri, “Jairo vaja cuti ñaja” yivariquẽnagũ ñari, ã gajeyeũni ñaro cõrone gãjerãre ãsijeocõagũmi, gãjoa bũjarũ. To yicõari, ti gãjoa rãca ti sita Ʃjũre vaja yigũmi, sita vatoaju jairo vaja cutise ã bũjarere cũorũ. Tire bajiro bajirãma Dios yarã ñarũarã. “Adi macarũcũroaye jediro yũ tũoĩa bojaboase rẽtoro quẽnase ñaja Dios ye” yitũoĩacõari, jediro ã bojarore bajiro yirũgũrãma —yũare yigotimasilocami Jesús.

Bũto vaja cutia, perla vãme cutiare ã bũjare queti

⁴⁵ Ti vāmere bajiro gaje queti ado bajiro yuare goticami Jesús:

—Dios yarā quēnaro ī yirā mani ñase quēnaja ti. To bajiro ti bajijare, buto vaja cutia perla vāme cutiare bujagure bajiro bajirāma Dios yarā ñaruarā. Sīgū gajeyeūni īsicudirimasu, perla vāme cutire sēnicudigūmi. ⁴⁶ To yicudigune, gāji ī cuoricare quēnamasuricare bujagūmi yuja. To bajiri tiare buto bojagu ñari, ī gajeyeūni jedirore īsicōari, vaja sēnigūmi, gājoa bujaru. To yicōari, ti gājoa rāca ī bojaricare vaja yigūmi yuja. Tire bajiro bajirāma Dios yarā ñaruarā. “Adi macarucuroaye jediro yu tuoīa bojaboase rētoro quēnaja Dios ye” yituoīacōari, jediro ī bojarore bajiro yirūgūrāma —yuare yigotimasiocami Jesús.

Vai sīarimasa, vai quēnarā rīne īna besere queti

⁴⁷ Quēna gotimasiore queti yuare gotimasiocami Jesús:

—Masare Dios ī beserirūmu ti ejaro, vai sīarimasa vaire īna beseriarore bajiro bajiruaroja. Vai sīarimasa bajiju rāca īna vayaro, vai vāme cutirā ñaro cōro sājara īna. ⁴⁸ Īna sājaro īacōari, jabuaju īnare tūamocūrāma. Īnare beserāma. Bariatārema jibuju juasācōari, bayamanare reacōarama. ⁴⁹ To bajirone bajiruaroja macarucuro ti jediro. Ángel mesa, masare beserā vadiruarāma. Quēnarāre, rojorāre beseruarāma. ⁵⁰ Rojorāre īnare juacōari, jeame yatibetimeju reacōaruarāma. Toju ñacōari, buto rojose tāmōrā ñari, guji pōguē, oti, yiruarāma īna —yuare yicami Jesús.

“Jesúre ajitirūnūrā ñarāma Dios ocare tirūmuayere, mamere quēne quēnaro riojo gotimasiorā”, yire queti

⁵¹ Tire yuare gotigajanocōari, ado bajiro yuare sēniñacami Jesús:

—¿Tire mũare yũ gotimasiose queti jedirore ajimasiati mũa? —yũare yisēniĩacami.

—Ajimasiaja —ĩre yicũdicajũ yũa.

⁵² To bajiro yũa yijare, ado bajiro yũare goticami:

—To bajiri Dios oca masa ĩna ucamasire quẽnaro ri-ojo gotimasiomasicõarãja mũa. To yicõari, mũare yũ gotimasiocere ajimasirã ñari, tire quẽne quẽnaro ri-ojo gotimasiomasirãja. To bajiro mũa bajijama, vi mũũ gajeyeũni tirũmũju ñarere quẽne, mame ĩ juarere quẽne quẽnocũr'ire bajiro bajirãja mũa. ĩ ya viana ĩna cũobeti-jama, ĩnare ĩsigũmi. ĩ yirore bajirone mũa yarãre quẽne ĩna ajimasiroti ti rũyajama, tirũmũayere, to yicõari, yucũ yũ gotisere quẽne quẽnaro riojo ĩnare gotimasiorũarãja —yũare yicami Jesús.

Nazaret vãme cũi macajũ Jesús ĩ vare queti

(*Mr 6.1-6; Lc 4.16-30*)

⁵³ To bajiro yũare gotimasio gajano, yũare ũmato vacoacami Jesús. ⁵⁴ To bajivana, ĩ ya macajũ ejacajũ yũa. Tojũ Dios ocare ĩna buerivijũre sãjaejacõari, masare gotimasio ñacami. Quẽnaro ĩ gotimasiocere ajicõari, no yimasibeticama ĩna:

—¿No bajicõari, to bajise gotimasiomasiati ĩ? ¿No bajiro yicõari, ĩãĩããamanire yati? ⁵⁵ ¿Adi macagũ yucũ moarimasũ macũ me ñatique ĩma? ¿Mar'ia macũ me ñatique? ¿Santiago, José, Simón, Judas mesa gagũ me ñatique ĩ? ⁵⁶ To yicõari, jediro mani vatoajũ ñarã, ¿ĩ bederã rõmiri me ñatique ĩna? To bajiri, ¿nojũ bueyujari ãni? —Jesũre ĩre yicama ĩna, ĩ ya macana.

⁵⁷ To bajiri, “Namasugũ me ñaami. Mani ya macagũ mani masigũ ñaami” yirã ñari, ĩre ajitirũnũbeticama ĩna. To ĩna yirone, ado bajiro ĩnare goticami Jesús:

—Diore gotirẽtobosarimasũ gajerojũ Dios ocare ĩ gotimasiocudijama, ĩre ajirũcũbũorãma. To bajiboarine, ĩ ya

macanare, ï ya vianare quêne Dios ocare ï gotimasiojama, ïre ajirũcũbũomenama —ĩnare yicami Jesús.

⁵⁸ To bajiri ï ya macana, ïre ïna ajitirũnũbetijare, ïaĩaĩna-manire jairo yĩomasibeticami.

14

Juan vãme cutigure, masare oco rãca bautizarimasure ï rũjoare ïna jatarocare queti

(*Mr 6.14-29; Lc 9.7-9*)

¹ Cojorũmũ Galilea sitana mũju, Herodes vãme cutigu, ïaĩaĩnamani Jesús ï yĩose quetire ajiyuju. ² To ï yĩasere ajicõari, ïre moabosarimasare ado bajiro yiyuju:

—Juan vãme cutigu, masare oco rãca bautizarimasune, ñagũmi quêne. Rijacoaboarine, tudicaticoarimi. To bajiri ïaĩaĩnamani yĩoñagũmi ï —yitũoĩaboayuju Herodes.

³⁻⁴ Juan ï sĩaecoroto rĩjoro ado bajiro bajire ti ñajare, to bajiro tũoĩañuju Herodes: ï bedi Felipe manajore Herod'ias vãme cutigore ãmacõari, manajo cutiyuju Herodes.

To bajiro ï yire ñajare, ado bajiro ïre gotirũgũñuju Juan:

—Herod'iare mũ manajo cutise quẽnabeaja. Dios ï rotimasirere ajibeaja mũ —ïre yirũgũboayuju Juan.

Tire ajirũabesuju ï manajo Herod'ias. To bajiri Juanre cõmemane siacõari, tubiberotiyuju Herodes. ⁵ To yicõari, ïre sĩaerotirũaboayuju. “Diore gotirẽtobosarimasũ ñaami Juan” masa ïna yirũcũbũosere ajigu ñari, bũto gũiyuju. To bajiri ïre sĩarotimasibesuju.

⁶ Herodes ï ruyuarĩarũmũ ejayuju. To bajiri, masare jirẽoñuju ï, “Boserũmũ yito” yigu. To yicõari, ïna rẽjaro bero, Herod'ias maco, ïna ïaro rĩjorojũare basaõoñuju. So basasere ïacõari, bũto variquẽnañuju Herodes. ⁷ To bajiri,

—Riojo mũre gotiaja yũ. Tũoĩavasoabetirũcũja. No bojase mũ sãnijama, mũre ïsirũcũja —sore yiyuju ï Herodes.

⁸ To bajiro ï yisere ajicōari, so jacojuã, “Ado bajiro ïre yicūdiya” so yi ocasājare, ado bajiro Herodere cūdiyuju so:

—Yucnacane Juan vāme cūtigũ, masare oco rāca bautizarimasũ rujoare, bare jeobariabaja joeju jeocōari, yũre ïsigũ vayá —ïre yiyuju so.

⁹ To bajiro so yisere ajicōari, sūtiritiyuju Herodes. To bajiboarine, ï jicōariarã ïna ajiro rĩjorojuã, “Ri-ojo mũre gotiaja yũ. No bojase mũ sēnijama, mũre ïsiracũja” ï yicōare ti ñajare, so sēnirore bajirone yiyuju.

¹⁰ Tubiberiaviju ñagũre, “Juanre rujoa jataya”, ïnare yiyuju. ¹¹ To bajiri, ï rujoare bare jeobariabaja joeju jeocōari, Herod'ias macore ïsiñujarã ïna. To yicōari, sojuã, jacore ïsirētoñuju so yuja.

¹² Ti queti ajicōari, Herodes tũju ejayujarã, Juan buerimasa. Ejacōari, ï rujuri ñaboarere ãmivacōari, yujeyujarã. To ïna yiro bero, yũa tũ ejacama ïna, Jesũre gotirã.

Masa, cinco mil ñarãre Jesús ï bare ecare queti

(Mr 6.30-44; Lc 9.10-17; Jn 6.1-14)

¹³ Juan oco rāca bautizarimasũre ïna sĩare quetire ajicōari, jãjarã masa yũare ïna sũyajare, ïna rāca ñarũabecũ ñari, cũmuaju vasãja, yũare ũmato jẽacoacami, masa ïna manibusaroju yũare ũmato vacũ. To bajiri ti macariana Jesús ï vasere ajicōari, boeju jãjarã variarãma, Jesús ï ejarotijũre vana. ¹⁴ To bajiri rocatu ejarãne, jãjarã masa ñarãre ïcaju yũa, boeju vacōari ejararãre. ïnare ïmaicōari, rijaye cūtirãre ïna juajarãre catiocami Jesús. ¹⁵ Rãioroto rĩjoro, ï tũ ejacōari, ado bajiro yicaju yũa, ï buerã:

—Jẽre rãioato yaja. Masa manojũ ñaja. To bajiri ïnare varotiya mũ, “Masa cūtoju bare vaja yibarã vajaro” yirã —ïre yiboacaju yũa.

¹⁶ To yũa yisere ajicōari, ado bajirojuã yũare yicami Jesús:

—No yirã vamenama. Mũane ñnare bare ecaya —yũare yicami Jesús.

¹⁷ To ñ yijare, ado bajiro ñre yicũdicajũ yũa:

—Bare maja yũare quẽne. Cojomo cõro pan, jũarã vai cõoaja yũa —ñre yicajũ yũa.

¹⁸ To bajiro yũa yisere ajicõari, ado bajiro yicami:

—Adojũa tire juaya maji —yũare yicami.

¹⁹ To bajiri,

—Masare tatũcurojũ ñnare rujirotiya —ñ buerãre yũare yicami Jesús.

To yicõari, cojomo cõro ñnaricari pan, jũarã vai ñnarãre juacõari, õ vecajũa ñamũocami. To yicõari, “Quẽnaro yaja mũ”, Diore ñre yicami. To yicõari, tire iguesurebatedcõari, ñ buerãre yũare ñsicami. To bajiri yũajũa, rujirãre ñsibatocajũ yũa yuja. ²⁰ Sĩgũ ruyariaro mano quẽnaro baũsucũtijedicõacama ñna. Ñna bagajano bero, ñna barũasere, yũa juarẽojama, jũaãmo cõro, gũbo jũa jẽnitũaro ñnarijibũri ruyacajũ. ²¹ Tire bacana cinco mil ñmũa ñacajũ yũa. Rõmiare, ñĩamasare quẽne cõĩabeticajũ yũa.

Oco joene Jesús ñ vare queti

(Mr 6.45-52; Jn 6.16-21)

²² Cũmuajũ yũare vasãjaroticami Jesús. “Yũre jẽadiyuya. Maji masare tudirotigũ yaja yũ”, yicami.

²³ Ñnare tudirotigajano, burojũ majacoasuju, tojũ Diore sẽnirũ. Ti rãioato bero, tojũ ñ sĩgũne ñacõañuju ñ maji.

²⁴ Yũajũama, utabucũra jẽana, sõjũ tira gudareco tusacajũ yũa. To yũa tusatone, bũto mino vacajũ. To bajica yiro, sabetũocõacajũ ti. To bajiri jẽatĩmabeticajũ. ²⁵ To yũa bajiñarone, busurocaroarijũ yũa tũjũ oco joene vadicami Jesús. ²⁶ Oco joejũ ñ vadire ñarãne, ucacajũ yũa.

—jBajirocar'i vãti ñaami! —yiavasãcayũ yũa.

²⁷ To yũa yiboajaquẽne,

—Güibesa. Variquēnaña mña. Yüne ñaja —yũare yicami Jesús.

²⁸ To ĩ yisere ajicōari, yua rācagu Pedro ado bajiro ĩre yicudicami:

—Yũ ɱjũ, mune mu ñajama, oco joene mu tũju yũre varotiya —ĩre yicami Pedro.

²⁹ To ĩ yisere ajicōari,

—Vayá mũ —ĩre yicami Jesús.

To ĩ yisere ajicōari, vāgã, oco joeju vacami Pedro, Jesús tũ ejagũacũ. ³⁰ To bajiboarine, mino bũto ti vasere ĩacōari, güicami. To bajicōari, rujacōa sũocami yuja. To bajigũne,

—Yũ ɱjũ, rujacũ yaja yũ. Yũre ejarēmogũaya —yĩavasācamĩ.

³¹ To ĩ yirone, ĩ āmore ñiacōari, ado bajiro ĩre yicami Jesús, Pedroro:

—¿No yigũ, “ĩ ejarēmose rāca vamasirũcũja yũ”, yũre yitũoĩa tũjacoajari mũ? —Pedroro ĩre yicami Jesús.

³² To yicōari, cũmuajũ ĩna vasājarone, mino vatũjacoacajũ yuja. ³³ To yicōari, cũmuajũ Jesús rĩjorojũna gũsomuniarĩ tuetucajũ yũ, ĩre rũcũbũorã:

—Socagu me ñaja mũ. Dios macũne ñaja —Jesũre ĩre yĩcayũ yũ.

Genesaret sitanare rijaye cũtirãre Jesús ĩ catioire queti

(Mr 6.53-56)

³⁴ To baji jēanane, Genesaret vãme cũti sitajũ ejacajũ yũ. ³⁵ Ti macariana Jesús ĩ ejasere ĩamasicōari, masa jedirore gotibatoriarãma. To bajiri, masa rijaye cũtirãre juaejacama Jesús tũjũ. ³⁶ To ĩna yirã, ado bajiro Jesũre yicama ĩna:

—Mũ ye sudi gaja yũare moaĩarotiya. Ti rĩne bojaja yũ. To bajiro yũ yijama, caticoarũarãja yũ —ĩre yisēnicama.

To bajiri, ĩ sudi gajare moaĩarãma, caticoacama.

15

“Masa ña yisere ñacõari, ‘Rojorã ñaama’ yire me ñaja. Ña tuoñasejuare masicõari, ‘To bajiro yirã ñaama’ yire ñaroja”, Jesús ñ yigotimasiore queti

(Mr 7.1-23)

¹ Fariseo masa, to yicõari Dios ñ rotimasire gotimasior-
imasa quẽne ejacama, Jesús tũju. Jerusalénju vadiriarã
ñacama. Jesús tũ ejacõari, ado bajiro ñre sēniñacama ña:

² —¿No yirã mani ñicua ña yimasiriarore bajiro yibeati
mũ buerimasa? Ña baroto rñjoro, ña ãmori coemasiri-
arore bajiro coebeamã ña —ñre yicama ña.

³ To bajiro ña yijare, ado bajiro ñnare cõdicami Jesús:

—Mani ñicua ña rotimasirejuare cõdirã ñari, Dios ñ
rotimasusejuarema cõdibeaja mũa. ⁴ Ado bajiro goti-
aja Dios ñ rotimasire: “Mũ jacure, mũ jacore quẽnaro
rñcũbuoya”. To yicõari, gaje vãme ado bajiro yaja: “No
bojagũ, ñ jacure, ñ jacore, ‘Rojose tãmõucarũarãja mũa’
ñnare ñ yijama, ñre sñaroti ñaja”, yigotiaja Dios ñ rotimasire.
⁵⁻⁶ Mũajũama, ado bajirojũa rotiaja mũa: “Ñ ye rãca ñ
jacure ñ ejarẽmobetijama, quẽnacõaja. ‘Yũ gajeyeũni yũ
cõose Diore yũ ñsiroti rñne ñaja. To bajiri mũare ejarẽ-
momasibeaja yũ’ yicõari, ñ jacure ñ ejarẽmobetijama,
quẽnacõaja”, yirotiaja mũa. To bajiro mũa yijama, mani
ñicua ña rotimasirejuare cõdirã ñari, Dios ñ rotisejuarema
cõdibeaja mũa. To bajiro mũa yijama, “Ñie vaja maja
Dios oca”, yirã yaja mũa. ⁷ “Quẽnaro yirã ñaja yũa”
yiboarine, rojorã ñaja mũa. Diore gotirẽtobosarimasũ,
Isa'ias ñamasir'i, mũa bajirotire quẽnaro tuoñacõari, ado
bajiro ucamasinũmi:

⁸ “Ña oca masune yirã, quẽnaro yure yirũcũbuoama
ñna. To bajiro yirã ñboarine, yũ bojarore bajiro
tuoñabeama.

⁹ Yũ yere buecõari, ãna masu ãna tuoõasere gotimasioama. Tirene, ‘Dios ã rotise ñaja’ yiboama. To bajiri, yũre ãna rũcũbuoboase vaja, ñie vaja bujamenama ãna”, yucamasiñumi Isa'ias, Diore gotirõtobosagu —yigoticami Jesús.

¹⁰ To ã yiro bero, masare jicõari, ado bajiro ãnare yicami Jesús:

—Yũre ajicõari, quẽnaro ajimasiña mũa. ¹¹ Dios ã ãajama, mani ñicũa ãna yimasiriarore bajiro ãmo coemene mane base suorĩ me rojose yirãja mani. Rojose tuoĩacõari, rojose mani ñagõsejũa ñaja rojose mani yise. “Ti suorĩne rojose tãmũorũarãja mani”, yimasirona ñaja mũa —ãnare yicami Jesús.

¹² To bajiro Jesús ã yisere ajicõari, ado bajiro ãre yicajũ yũa:

—¿Tire mũ gotisere fariseo masa mũre ãna ajijũnisinĩsere masĩbeati mũ? —ãre yicajũ yũa, ã buerimasa.

¹³ To bajiro yũa yiro, ado bajiro yũare yicami Jesús:

—Ã ya vesejũ ote ã otere tũ vidi ti judijama, ti ñe rãcãjũne vũereacõarũcũmi. To bajirone yirũcũmi yũ jacũ quẽne. “Yũ yarã me ñaama” yigũ ñari, ãnare reacõarũcũmi Dios.

¹⁴ To bajiri fariseo masare tuoĩagũibesã mũa. ãna ñarãma ãmenã gãjerã ãmenare tũã vanare bajiro bajirã. Sĩgũ ãabecũ, gãji ãabecũre ã tũavajama, gojejũ reasõcõanama ãna jũarãjũne. To bajiri rojose ãna bajiro tire masirã ñari, ãnare tuoĩagũibesã mũa —yũare yicami Jesús.

¹⁵ To ã yirone, ado bajiro ãre yicami Pedro:

—Mũ gotimasiosere quẽnaro yũare gotirõtobuya —ãre yicami.

¹⁶ To ã yisere ajicõari,

—¿Ajimasĩbeati mũa quẽne? —yicami. ¹⁷⁻¹⁸ —Mũã basãse mũã gudajoajũ vatoja ti. Tijũ bero, rõtobudiroja ti. To bajiri mũare rojose yimasĩbeaja ti. To bajiboajaquẽne,

mua ñagõjama, tuoĩacõari, ñagõaja mua. To bajiri rojose mua tuoĩajama, ti suorine rojose tãmuoruarãja mua. ¿Tire quẽnaro ajimasibeatique mua? ¹⁹ Masa, rojose tuoĩacõari, ado bajise rojose yirãma: Gãjerãre sjarãma ñna. Manajo cutirã, manajũ cutirã, manajo mana, manajũ mana quẽne, gãjerã rãca ajeriarã cutirãma. Juarudirãma. Socarãma ñna. Gãjerã ajiro rĩjorojua, socarãne, “Ado bajise rojose yima”, yigotirãma. ²⁰ To bajise rojose yirãma masa, rojose tuoĩacõari. Ti suorine rojose tãmuoruarãma. Baroto rĩjoro, ãmori mani ñicua ñna coemasiriarore bajiro coebeti suorini me, rojose tãmuoruarãma masa —yũare yicami Jesús.

Jud'io maso me Jesúre so ajitirũnũre queti

(Mr 7.24-30)

²¹ Gotigajanocõari, yũare ãmato vacoacami Jesús, Tiro, to yicõari Sidón vãme cuti macari tãjũ vana. ²² Tojũ yua ejaro bero, sãgõ cananeo maso, Jesús tãjũare avasã vadicamo so:

—Yũ ujũ, David ñamasir'i jãnami, “Rotimuorũgõrucũja mũ” yigũ, Dios ñ cõar'i ñaja mũ. Yũre ñamaiña. Yũ maco so usũjũ vãti sãñagõ ñnaamo. To bajiri bũto rojose tãmũoamo —Jesúre yigoticamo so.

²³ To bajiro so yiboajaquẽne, sore cũdibeticami Jesús. To bajiri ado bajiro Jesúre yicajũ yua, ñ buerimasajũama:

—Sore varotiya mũ. Gõjanabioro manire avasã sũyaamo —ñre yiboacajũ yua.

²⁴ To bajiro yua yirone, ado bajiro sore yicami Jesús:

—Yũ yarã jud'io masa, oveja mavisarãre bajiro bajirãma. Ñnare yũre ejarẽmoroticõacami Dios —sore yicami Jesús.

²⁵ To bajiro ñ yisere ajicõari, ñ rĩjorojua gũsomuniari tuetuejacamo so, ñre rũcũbũogo. To yicõari, ado bajise ñre yicamo:

—Yũ ɯɟũ, yũre ejarẽmoña —ĩre yicamo so.

²⁶ To bajiro so yiboajaquẽne, ado bajiro sore yicami Jesús:

—To bajiro yũ yijama, rĩamasa ãna basere ãmacõari, yaiare ecagũre bajiro yigũja yũ —sore yicami.^f

²⁷ To bajiro ã yisere ajicõari, ado bajiro ãre yicamo so:

—Yũ ɯɟũ, riojo gotiaja mũ. To bajiboarine ãna ɯjarã ãna bavẽjasere barãma yaia —Jesúre ãre yicamo so. “Yũa quẽne, jud'io masa me ñaboarine, mojoroaca yũare mũ ejarẽmojama, quẽnaja” yigo, to bajise ãre yicamo so.

²⁸ To bajiro so yisere ajicõari, ado bajiro sore yicami Jesús:

—“Yũre ãamaicõari, ejarẽmorucumi”, yũre yitũoĩa tũ-jabeco masu ñaja mũ. To bajiro mũ yitũoĩase ñajare, mũ maco ɯɟũjũ sãñagũre vãtire ãre burocacõaja yũ —sore yicami Jesús.

To bajiro ã yirirĩmarone, quẽnaejacoasuju so, vijũ ñario.

Jãjarã, rijaye cõtirãre Jesús ã catiore queti

²⁹ To ã yiro bero, Galilea vãme cõtirita tũjũ vacajũ yũa, Jesúrãca. Tojũ ejacõari, burojũ majacajũ. Tojũ maja, joe jeaejacõari, ejarũjucoacajũ. ³⁰ To yũa bajiro ãacõari, Jesús tũre jãjarã masa ejacama, rijaye cõtirãre juaejarã. ãna juaejacana ado bajiro bajirã ñacama: Rujasagueri vana, jeariarã, ãamena, ñagõmena, to yicõari, jãjarã gajeye rijaye cõtirã ñacama. ã tũ ãna ejarone, ãnare catiocami Jesús. ³¹ Ñagõmena ñaboariarã, ñagõcoacama. Rujasagueri vaboariarã, quẽnaro vacama. ãamena ñaboariarã, ãacoacama. Jeariarã quẽne, quẽnaejacoacama. To bajiro bajisere ãacõari, no yimasibeticama masa, ti ãnre

^f 15:26 Ado bajiro yigũ, to bajise sore yiyuju Jesús: “Jud'io masare ejarẽmobecũne, gãjerãjuare yũ ejarẽmojama, quẽnabeaja” yigũ, to bajise yiyuju.

ĩabetirũgũriarã ñari. To bajiri Diore quẽnaro rũcubuo variquẽnacama ñna, “Ĩ ñagũmi quẽnaro yigu, jud'io masa yua rũcubuo” yirã.

*Masa, cuatro mil ñarãre Jesús, bare ĩ ecare queti
(Mr 8.1-10)*

³² ĩ buerãre yuare jicõari, ado bajiro yicami Jesús:

—Ado ñarãre ĩamaiaja yu. Idiarũmu tusaju yuja, yu rãca ñna ñaro. To bajicõari, bare maama. Vamenane ñna ya viriju ñna tudiasere bojabeaja yu. ĩnare yu tudirotijama, bamenane ñna vajama, varũtu vanane, ñiorijarã ñari, rijavẽjaborãma —yuare yicami Jesús.

³³ To bajiro ĩ yirone, ado bajiro ĩre yicaju yua:

—Ado, masa manojũ ñaja. No bajiro masa ñaro cõro ñna barotire bare bujamasiña manoja —ĩre yicaju yua.

³⁴ To yua yirone,

—¿No cõro jairo pan cõoati mua? —yuare yicami.

—Cojomo cõro jua jẽnituario ñaricari ñaja. To yicõari, vai mojoroaca ñaama —ĩre yicaju yua.

³⁵ To yua yirone, rũcacane masare rujiroticami Jesús.

³⁶ To yicõari, pan cojomo cõro jua jẽnituario ñaricari ñasere, vaire quẽne juacõari, “Quẽnaro yaja mu”, Diore ĩre yivariquẽnacami. To yicõari, tire iguresurebatecõari, yuare ĩsicami. To bajiri yuajua, rujirãre ĩnare ĩsibatocaju yua yuja. ³⁷ Sĩgũ ruyariaro mano baũscutijedicõacama. ĩna bagajanoro bero, ñna baruasere yua juarẽojama, cojomo cõro jua jẽnituario ñaribũri ruyacaju. ³⁸ Tire bacana cuatro mil mũmua ñacaju yua. Rõmiare, rĩamasare quẽne cõĩabeticaju yua. ³⁹ To yigajanocõari, masare tudiroticami Jesús. To bajĩ, cũmuane Magadãn vãme cuti macaju vacaju yua.

16

“Īaīañamani yuare yīoña”, Jesúre ĩna yiboare queti
(*Mr 8.11-13; Lc 12.54-56*)

¹ Fariseo masa, saduceo masa quēne, Jesúre ĩarā eja-cama ĩna. Ejacōari, ĩre sēniīacama, “Cudimasibeticōari, rojose tāmūoato ĩ” yirā:

—“ ‘Dios ĩ cōagū ñaami’ yuare yimasiato” yigū, ō vecaye ĩaīañamani yuare yīoña —yisēniboacama.

² To ĩna yiboajaquēne, ado bajiro ĩnare cudicami Jesús:

—Rāiorijū, ũmūagasero ti sūaro ĩacōari, “Busiyū, quē-narirūmū ñarūaroja”, yaja mūa. ³ Busurijū ñibiācōari, bueri ti sūayujijama, “Adirūmū, oco quedirūaroja”, yīa-masiaja mūa. No bojarirūmū, ũmūagasero ĩacōari, “Quēnarirūmū, rojorirūmū ñarūaroja”, yīamasija. To bajiro yīamasirā ñaboarine, ñamasusejuare ĩamasibeaja mūa. Adirūmūri yū yisere ĩarā ñaboarine, “Dios ĩ roticōar’i ñari, yami”, yīamasibeaja mūa. ⁴ Mūa adirodo-riana, rojose yirā, Diore mūa gotirore bajiro yimena ñaja mūa. To bajirā ñari, “Īaīañamani mū yīose bojaja”, yuare yisēniboaja mūa. To bajiro mūa yiboajaquēne, to bajise mūare yīobetirūcūja. To bajiboarine Jonás ñamasir’i Diore gotirētobosarimasū ĩ bajimasirere bajiro mūare ba-jīoroti ñaroja —ĩnare yicudicami Jesús.

To bajiro ĩnare yicōa, ĩnare jēaveocoacajū yūa.

Fariseo masa panre vauvasere bajiro ĩna bajire queti
(*Mr 8.14-21*)

⁵ Ūtabūcūra gajejacatūajū jēajacōari,

—Mani baroti pan masiriticoayuja mani —yūa masune gāmerā yīnacajū yūa.

⁶ To yūa yiro, ado bajiro yuare goticami Jesús:

—Fariseo masa, saduceo masa “Pan vauvato” yirā ĩna vūosere quēnaro ajicōīaña mūa —yuare yicami.

⁷ To ï yisere ajimasimena ñari, yua masune ado bajiro gãmerã yicaju yua:

—Pan mani masiritijare, to bajise gotigu yigami — gãmerã yicaju yua.

⁸ To bajiro yua yituoïasere masicõari, ado bajiro yuare yicami Jesús:

—¿No yirã, “Pan maja manire”, yati mua? “Pan ti mani-boajaquëne, manire ñamaicõari, quënarõ ejarëmorucumi Jesús”, ¿yuare yituoïabeati mua? ⁹ ¿No yirã ajimasibeati mua maji? Cojomo cõro ñaricarire panre bujucõari, cinco mil masa ñarãre ecacaju yu. Ñare yu ecaro bero, jairo baruarajiburi ruycacaju, ¿Tire masiritiati mua? ¹⁰ Tijũ bero, quëna cojomo cõro juã jënituario ñaricari panre bujucõari, cuatro mil masa ñarãre ecacaju yu. Ñare yu ecaro bero, jairo baruarajiburi ruycacaju. ¿Tire quëne masiritiati mua? ¹¹ No yirã ajimasimena masu ñamenaja mua tia. Jëjũ, “Fariseo masa, saduceo masa, ‘Pan vauvato’ yirã, ña vuosere quënarõ ajicõiaña” yu yijama, “Pan juabesuma” yigu me yibu yu —yuare yicami Jesús.

¹² To ï yijare, ajimasicaju yua yuja. “‘Fariseo masa, saduceo masa, ‘Pan vauvato’ yirã ña vuosere quënarõ ajicõiaña’ yuare yigu, ‘Ña gotimasiosejuare quënarõ ajicõiamasiña, ‘Ñare bajiro bajimavisiarobe’ yirã’ yire ùnire yuare gotimasioigũ yiboayujari Jesús”, yiajimasicaju yua yuja.

“‘Rotimorũgõrucumi’ yigu, Dios ï cõar'i ñaja mu”,
Jesúre Pedro ï yire queti

(Mr 8.27-30; Lc 9.18-21)

¹³ To yi varũtu vanane, Cesarea de Filipino vãme cuti sitajure ejacaju yua, Jesúrãca. Tojũ ejacõari, ado bajiro yuare sëniïacami Jesús:

—Yure, Dios ï roticõacacure, ¿ñimũ ñaami yure yati ñna, masa? —yure yisēniĩacami Jesús.

¹⁴ To bajiro ï yisere ajicõari, ado bajiro ïre cõdicajũ yua:

—Sĩgũri, “Juan vãme cutigũ, masare oco rãca bautizarimasũ, tudicaticõari bajigumi quẽna”, mure yama ñna. Gãjerãma, “El'ias ñamasir'i ñagũmi”, yama ñna. Gãjerãjũama, “Jerem'ias ñamasir'i ñagũmi”, yama. Gãjerãjũama, “Gãji, Diore gotirẽtobosamasir'i ñagũmi”, mure yama ñna —Jesũre ïre yicõdicajũ yua.

¹⁵ To bajiro yua yirone,

—Mũama, ¿ñimũ ñaami yure yati mũa? —yure yisēniĩacami.

¹⁶ To ï yisere ajicõari, ado bajiro yicami Simón Pedro:

—Mũ ñaja rojose yua tãmuoborotire yure yirẽtobosacõari, rotimũorũgõrocũ, Dios ï cõar'i. Masirẽtogũ, Dios macũ ñaja mũ —Jesũre ïre yicõdicami.

¹⁷ To ï yisere ajicõari, ado bajiro ïre yicami Jesús:

—Quẽnaro riojo gotiaja mũ, Simón, Jonás macũ. Variquẽnaña mũ. Tire gotigũ, masũ ï masise suorĩ me tire gotimasiaja mũ. Õ vecagũ yũ jacũ ï masise rãca tire gotimasiaja mũ. ¹⁸ Ado bajiro mure gotiaja yũ: Mũ vãme ñaja Pedro. “Gũta” yĩuaro yaja ti “pedro” ti yijama. Mũ gotimasiose suorine jãjarã masa, yure ajitirũnũcõari, rẽjarũgũuarãma ñna. Yure ajitirũnrã ñna ñajare, vãti yarã, “Bajireacõa tũjajaro ñna” yirã, rojose ñnare yimasibetirũarãma ñna. ¹⁹ To bajiri, ado bajiro mure gotiaja yũ: Õmuagase rojose jãnariaro cuogure bajiro mure cũrucuja yũ. To bajiri, masare ñacõari, ado bajiro ñnare yimasirũcuja mũ: “Ãnoa to bajiro yirã ñari, Õjũ Dios yarã quẽnaro ï yirã ñarũarãma. Ãnoajũ, to bajiro yirã ñari, Dios yarã me ñaama”, ñnare yimasirũcuja mũ. Adi sitajũ yure rotibosagũ ñarũcuja mũ. To bajiro yigũ ñari, “Ado bajiro mũa yijama, Dios yarã ñarũarãja mũa.

Ado bajirojua mua yijama, Dios yarã me ñaruarãja mua”, yimasirucuja mu —ïre yicami Jesús.

²⁰ To bajiro Pedrore ïre yigotigajanocõari, ado bajiro yuare yicami:

—Ïne ñaami “ ‘Rotimurũgõrucumi’ yigu, Dios ï cõar’i”, gãjerãre ñnare yigotibeja —yuare yicami Jesús.

“Yuare sïaruarãma”, Jesús ï yire queti

(*Mr 8.31–9.1; Lc 9.22–27*)

²¹ To ï yiro bero, Jerusalénju ï bajirotire ado bajiro yuare gotimasiosuocami Jesús:

—Jerusalénju varoti ñaja yure. Toju yu ejaro, bucãrã, paia ujarã, to yicõari, Dios ï rotimasire gotimasiorimasa quẽne, rojose yure yicõari, yure sïaruarãma ñna. Yure ñna sïaboajaquẽne, idiarũmu tusatirũmũne yure catorucumi Dios —yuare yisuocami Jesús. ²² To ï yisere ajicõari, ricati ïre jicãmotocõari, ïre yiboacami Pedro:

—Yu uju, to bajiro mu bajirotire bojabecumi Dios. ¡To bajiro mu bajiroti, mure bajibeticõato! —ïre yiboacami Pedro.

²³ To ï yisere ajicõari, judarũgũgũne, ado bajiro Pedrore ïre goticami Jesús:

—¡Satanás, vasa mu! Vãtia ujure ñagõbosagu yaja mu. To bajiro yibesa. “Dios ï bojarore bajiro yibeticõato” yigure bajiro yaja mu. To bajiro mu yijama, Dios ï tuoïarore bajiro me tuoïaja mu. Masa ñna tuoïarore bajiro tuoïagũ yaja —Pedrore ïre yicami Jesús.

²⁴ To yicõari, ado bajiro ï buerãre yuare yicami Jesús:

—No bojagu yu yu ï ñarujama, ï bojasere ï ye ñarotire tuoïabecũne, “Jesúre bajiro rojose tãmurucuja yu quẽne” yituoïacõari, yujuare ajisuyarucumi. ²⁵ No bojarã, ñna bojaro ñnare cutirãma, adi macarucurore ñsere

ĩavariquẽnacõari, Diore tũoĩamenama, Dios ĩ catisere yay-
 ibetire cõomena ñaruarãma ĩna. To bajiboarine, yũre aji-
 tirũnurã, yũ oca ĩna gotisere ajijũnisinicõari, ĩna sĩarãma,
 Dios tũ quẽnaro ñarona ñarãma. ²⁶ Sĩgũ adi macarucuroju
 gajeyeũni jediro ĩ bujaboajaquẽne, beroju rojose tãmuotũ-
 jabetiriaroju ĩ vajama, gajeyeũni ĩ bujaboare, ñie vaja
 manoja. Ñiere Diore ĩsimasibecũmi, “Ĩ rijato berojũma
 tudirijabeticõato” yigũ, “Dios ĩ catisere yũre ĩsiato” yigũ.
 Mani rijato berojũma “Tudirijabeticõato” yigũ, Dios ĩ
 catisere ĩ ĩsise cõoro vaja cuti manoja. ²⁷ Yũ, Dios ĩ
 roticõacacũ ñacõari, “Quẽnarẽtogũ ñaja yũ”, yũ jacũ ĩ
 yĩorore bajiro yigũ ñari, ĩ bususe rãca tudiejarucũja yũ.
 Yũ rãca vadiruarãma Dios ĩ cõarã, ángel mesa. Tudie-
 jacõari, masa ĩna yisere ĩacõari, “To bajiro yirã ñari,
 quẽnase bujarã, rojose tãmuorã bajiruarãja mũa”, ĩnare
 yirucũja yũ. ²⁸ Riojo mũare gotiaja yũ. Mũa sĩgũri mũa
 bajireabetone, “Ñajediro cũju ñaami yũ roticõacacũ” Dios
 mũare ĩ yĩosere ĩaruarãja mũa –yũare yicami Jesús. g

17

Ĩ buerimasa ĩna ĩaro rĩjorojũa Jesús ĩ godovedĩiore queti
 (Mr 9.2-13; Lc 9.28-36)

¹ Cojomo cõoro, coja jẽnitarirũmu bero, Pedro, Santi-
 ago, ĩ bedi Juanre quẽne ãmuariburo joeju ĩnare ãmato va-
 cami Jesús. ² Toju ĩna ejaro, ĩna ĩaro rĩjorojũa, Jesús rioga
 busucoasuju ti. ãmuagũ muijũre ĩacãnamuriarore bajiro
 cajemose busuyuju ti. To yicõari, sudi ĩ sãñase quẽne

g 16:28 Dios oca masa ĩna ucamasirere buerẽtoburimasa sĩgũri ado
 bajiro yicama ĩna, 16.28 gotirijũre: “ ‘Ñajediro cũju ñaami
 yũ roticõacacũ” Dios mũare ĩ yĩorotire’ Jesús ĩ yijama, ĩ
 buerimasa sĩgũri ĩna ĩaro rĩjorojũa Jesús ĩ godovedĩiorere
 yigũ yirimi”, yicama Dios ocare buerẽtoburimasa sĩgũri.

buto boticoasuju ti. ³ To bajicōari, Moisés ñamasir'i, El'ias ñamasir'i rāca Jesús tu ruyuarūgūcōari, ĩ rāca ĩna gāmerā ñagōsere ĩañujarā ĩna, Pedro mesa. ⁴ To bajiro ĩna bajisere ĩacōari, ado bajiro Jesúre yiyuju Pedro:

—Yɯ ɯɯ, adoɯ mani ñajama, quēnamasucōaja. Mɯ bojajama, mɯa ñaro cōrone vijāiri mɯare buabosarɯcɯja yɯ. Mɯ yajāi, El'ias yajāi, to yicōari, Moisés yajāi buabosarɯcɯja —Jesúre yiboayuju Pedro.

⁵ To bajiro ĩ yiririmarone, bueri buto cajemose ĩnare buebibecōañuju ti. Ti bueri vatoajɯ ado bajiro ocaruyuyuju:

—Ānine ñaami yɯ macɯ, yɯ maigū. Īre buto ĩavariquēnaja yɯ. Īre quēnaro ajitirūnūña mɯa —yi ocaruyuyuju.

⁶ To bajiro yi ocaruyusere ajicōari, buto güiyujarā ĩna Pedro mesa. Buto güirā ñari, muqueacoasujarā ĩna. ⁷ To bajiro ĩna bajisere ĩacōari, ĩna tu vacōari, ĩnare moaĩañuju Jesús. ĩnare moaĩagūne, ado bajiro yiyuju:

—Vɯmɯrūgūña. Güibesa mɯa —ĩnare yiyuju.

⁸ To bajiro ĩ yiro bero, ĩamɯoboayujarā. El'iare, Moisére ĩnare ĩabɯjabesujarā. Jesús sġgūne ñañuju ĩ yuja.

⁹ To bajiro bajicōari bero, ti buro ĩnare ũmato rojacɯne, ado bajiro ĩnare rotiyuju Jesús:

—Jēɯ mɯa ĩasere gājerāre gotibeja maji, yɯ, Dios ĩ roticōacacɯ, yɯ rijato bero, quēna yɯ tudicatiroto rġjorore —ĩnare yiyuju Jesús.

¹⁰ To ĩ yijare, ado bajiro Jesúre sēniñañujarā ĩna:

—¿No yirā, “‘Rotimɯorūgōrɯcɯmi’ yġɯ, Dios ĩ cōarocɯ ĩ ejaroto rġjoro ejarɯcɯmi El'ias ñamasir'i”, yati ĩna Dios ĩ rotimasire gotimasiorimasa? —Īre yisēniñañujarā ĩna.

¹¹ To ĩna yijare, ado bajiro ĩnare cɯdiyuju Jesús:

—Riojo yiyuma Dios ĩ rotimasire gotimasiorimasa, “El'ias ñamasir'i ejasɯorɯcɯmi” ĩna yijama. “Rotimɯorūgōrɯcɯmi” yġɯ, Dios ĩ cōarocɯ, ĩ ejaroti

ñajare, “Jediro Dios ï bojarore bajiro yirã, quẽnaro ñayuto mani” yigũ, ejasũorũcũmi. To bajiro ï bajiroti ñajare, Dios ï rotimasire gotimasiorã, ñna gotiri vãmere bajirone yaja Dios oca masa ñna ucamasire quêne. ¹² “To bajiro yaja” yimasirã ñaboarine, ï ejaro ïre ïamasibesuma ñna. Jêre ejayumi. To ï bajiboajaquêne, ñna bojarore bajiro rojose ïre yiyuma. Yũ, Dios ï roticõacacũre quêne, to bajirone yũre yirũarãma —ñnare yitudiojoja vayuju Jesús.

¹³ To bajiro ï yisere ajimasicõari, “El'ias ñamasir'ire ï yijama, Juan vãmere cõtigu, masare oco rãca bautizari-masũjũare gotigu yami, ïre bajiro tũoïar'i ï ñajare”, yia-jimasiñujarã ñna Pedro mesa.

Masu usũju sãñagũre vãtire Jesús ï burocare queti
(Mr 9.14-29; Lc 9.37-43)

¹⁴ Ti burojũ majariarã, yũa tũ rojaejacama ñna quẽna. Jãjarã masa ñnacama yũa rãca. Jesús ï tudiejasere ïacõari, ï rĩjorojũa gũsomuniari tuetucami sĩgũ. To yicõari, ado bajiro Jesũre yicami:

¹⁵ —Yũ uju, yũ macũre ïamaiña mũ. Biyarocã rijaquedirũgũami. To bajica yigũ, bũto rojose tãmũorũgũami. Cojosi me jeameju rocatĩacõarũgũami. To bajicõari, oco vatoajũ quêne rocaroacõarũgũami. ¹⁶ Mũ buerã tũ ïre ãmiejaboabũ yũ. ï usũjũre sãñagũre vãtire burocãmasimema ñna —Jesũre yicami.

¹⁷ To ï yisere ajicõari, ado bajiro yicami, yũare ï buerimasare, to yicõari, ïre ajirã ejarãre quêne:

—Rojosere tũoïarã ñari, Diore ajitirũnumena masu ñacõaja mũa. ¿No cõrojũ mũare gotimasio tũjaguti yũ? Yoaro mũa rãca yũ ñaboajaquêne, yũ masisere mũare yũ ujosere ajitirũnũbeaja mũa maji —yũare yicami Jesús. To yigũne, —Adojũa vãti sãñagũre ïre ãmiaya —yicami Jesús.

18 Īre ĩna āmiejarone, ĩ usujū sāñagũre vātire burocōacami Jesús. Vāti ĩ budirirĩmarone, catiquēnagũ ñacoacami daquegujua.

19 To ĩ yiro bero, ricati cāmotadicōari, Jesúre ado bajiro ĩre sēniñacaju yua:

—¿No yirā daquegu usujure sāñagũre vātire burocama-sibeti yua? —ĩre yicaju yua.

20 To bajiro yua yisere ajicōari, ado bajiro cudicami Jesús:

—“Dios ĩ ejarēmose rāca burocaruarāja” yituoīamena ñari, vātire burocamasibesuja mua. Riojo muare gotiaja yu: “Mojoroaca yimasirā ñaboarine, Dios ĩ ejarēmose rāca yimasicōarāja” yirā, i bureore, “Gajeroju vasa” mua yirotijama, to bajirone bajiruaroja ti. Ñiejua mua yimasibeti maniruaroja. 21 To bajiboarine, jēju yu burocagure bajiro bajirāre mua burearuajama, bare bamenane Diore sēnicōari rĩne bureamasiruarāja mua —yuare yicami Jesús.

“Yure sīaruarāma”, Jesús ĩ yigotibabore queti

(Mr 9.30-32; Lc 9.43-45)

22 Galilea sitaju vana, gāmerā cāmotadiri mene cojōjūnane Jesúrāca vacudicaju yua. To bajiro yuare ũmato bajicudigune, ado bajiro yuare yicami Jesús:

—Yure Dios ĩ roticōacacure masare ĩsirocarucumi sīgũ.

23 To bajiro ĩ yijare, yure sīaruarāma ĩna. Yure ĩna sīaboajaquēne, idiarũmu tusatirũmune yure catorucumi Dios —yuare yicami Jesús.

To bajiro ĩ yisere ajicōari, buto sutiriticaju yua, ĩ buerā.

Diore yirũcubũoriavire boarijaurire quēnoruarā, vaja sēnirimasa, Pedrore ĩna sēniñare queti

²⁴ To ĩ yiro bero, Capernaum vāme cūti maca eja-
caju yua, Jesúrāca. Toju yua ñaro, Diore yirūcubūori-
avire boarijaurire quēnoruarā, vaja sēnirimasa, Pedrore
sēniīarā ejayujarā, macajúju:

—¿Muare gotimasiorimasuma, Diore yirūcubūoriavi
quēnoroti vaja ĩsibecūti ĩ? —Pedrore ĩre yisēniīañujarā
īna.

²⁵ —Īsirucami —yicūdiyuju Pedrojuama.

Tiju bero, vijū sājaejacōari, vaja sēnirimasa ĩna
sēniīarere ĩ gotibetone, Jesújua, ado bajiro Pedrore
ĩre boca yicōacami:

—Simón, ¿no bajiro tuoīati mu? ¿Adigodoana ujarā,
ñimarājuare vaja yirotiati? ¿Īna yarārene gāmerā vaja
sēniatique? ¿Gajero vadiriarājuare vaja yirotirūgūatique
īna? —Pedrore ĩre yisēniīacami Jesús.

²⁶ To bajiro ĩ yisēniīarone, ado bajiro ĩre cūdicami
Pedro:

—Gajero vadiriarājuare vaja yirotirūgūama —
yicūdicami Pedro.

To ĩ yirone, ado bajiro yicami Jesús:

—Riojo yaja mu. To bajiri Dios macu ñari, yu ya vi
ti ñajare, Diore yirūcubūoriavi coderāre vaja yibecuja
yuma. ²⁷ To bajiboarine, “Rojose manire tuoīabeticōato”
yirā, mani vaja yijama, quēnaja. Utabucuraju vasa mu.
Toju vai vejeba. Basuogure ĩre sīacōari, ĩ riseju gājoatii
bujarucuja mu. Titiine ĩnare vaja yiroti ñaroja, Diore
yirūcubūoriavi coderāre. Titiire āmicōari, ĩnare ĩsima —
Pedrore ĩre yicami Jesús.

18

“¿Ñimujua ñagūti ñamasugū ñarocu?”, Jesúre ĩna
yisēniīare queti

(Mr 9.33-37; Lc 9.46-48)

¹ Tirũmune Jesũre ĩre sēniĩacaju yua ĩ buerimasa:

—Mũre yua rotibosarirodo ti ejaro, ¿ñimũjua ñagũti ñamasugũ ñarocu? —ĩre yisēniĩacaju yua.

² To yua yirone, sīgũ daquegure jicõari, yua rĩjorojua ĩre rũgõroticami Jesús. ³ To yicõari, ado bajiro yũare yicami:

—Riojo mũare gotiaja yu. Daquerã, “Ñamasurã me ñaja yua” ĩna yitũoĩarore bajiro mũa tũoĩabetijama, Uju Dios yarã quẽnaro ĩ yirã me ñarũarãja mũa. ⁴ Uju Dios yarã ñamasurã ñaama āni daquegure bajiro tũoĩarã, “Ñamasurã me ñaja yua” yirã. ⁵ Āni daquegure bajiro tũoĩarã ĩna ñajare, gãjerã tu ĩna ejaro, quẽnaro ĩnare yirãma, yũjũare quẽnaro yirãre bajiro yirã yirãma —yũare yicami Jesús.

“Mũa sũorine gãjerã rojose ĩna yijama, gũiose ñaja”, Jesús ĩ yigotimasiore queti

(Mr 9.42; Lc 17.1-2)

⁶ Quẽna ado bajiro yũare goticami Jesús:

—No bojarã, āni daquegure bajiro tũoĩarãre, yũre ajitirũnũrãre rojose ĩna ũmato yijama, buto rojose tãmũorũarãma. Rojose ĩnare ĩna ũmato yiroto rĩjoro, tocãrãcũrene ĩna ãmũarijũre gũta jairica siatucõari, riaga ĩcũaroju ĩnare rearoderuucõajama, rojose tãmũobetibus-aborãma. ⁷ Rojose yirã sũorine buto rojose tãmũorũarãma masa. Rojose yirã jãjarã ñarãma. To bajiri gãjerãre rojose ũmato yirũarãma. To ĩna yise sũori buto rojose masu tãmũocõarũarãma.

“Buto mũa maise ti ñaboajaquẽne, ti sũorine Dios ĩ bojabeti mũa yijama, tire reacõaña”, Jesús ĩ yire queti

(Mr 9.43-48)

⁸ “Yũ ãmo sũorine rojose yibũ yũ” mũa yitũoĩamasi-jama, jatarocaya. “Yũ gũbo sũorine rojose yibũ yũ” mũa yitũoĩamasijama, jatarocaya. Mũare cojo ãmo, cojo gũbo ti manijama, quẽnabetoja. To bajiboarine juaãmo rãca, jua gũbo rãca mũa bajireajama, jeame yatibetimeju

mua vajama, rētoḅusaro quēnabetiruroja. ⁹ “Yū cajea suorine ĩabojacōari, rojose yibū yū” mua yituoĩamasi-jama tiare āmirocacōaña. Coja cajea mware ti manijama, quēnabetoja. To bajiboarine, juaJune caje cuticōari, mua bajireajama, jeame yatibetimeju mua vajama, rētoḅusaro quēnabetiruroja —yware yicami Jesús.

“Oveja yayir'ire ĩnare coderimasū ĩre macagūmi”, Jesús ĩ yigotimasiore queti

(Lc 15.3-7)

¹⁰ Quēna ado bajiro yware goticami Jesús:

—Yure ajitirūnrāre, “Ñamasurā me ñaja yua” yituoĩarāre, “Vaja mana ñaama”, ĩnare yiĩatebeja. Ō vecaju ángel mesa ñaruarāma ĩnare ĩatirūnrā. Yū jacū tujure cojorūmu ruyabeto ĩnare ñagōbosarūgūrāma. ¹¹ Yayirāre bajiro bajirāre, rojose tāmuoboronare, ĩnare yirētoḅosagu vadicaju yū, Dios ĩ roticōacacū —yware yicami Jesús.

¹² To bajiro yicōari, ado bajiro yirūtuacami Jesús:

—Adi quetiaca mware yū gotimasiosere quēnaro ajituoĩaña mua. Sīgū ñagūmi cien oveja cuogu. Cojorūmu sīgū yayicoacūmi. To bajiri ĩnare coderimasū, ruyarāre, noventa y nueve ñarāre ta veseju ĩnare cūcōari, yayir'ire macagū vacoacūmi ĩ. ¹³ Gājerā yayimena noventa y nueve ñarirācure, “Yayibesuma” yivariquēnagū ñaboarine, yayir'ire bujacōari, ĩnare ĩ variquēnaro rētoḅusaro ĩre variquēnagūmi. ¹⁴ Mani jacū ō vecagu to bajirone bajigūmi ĩ quēne. Sīgū ruyabeto daquegure bajiro tuoĩagū, Dios tu ĩ ñabetirotire bojabecūmi Dios —yware yicami Jesús.

“Mũare bajiro yũre ajitirũnugũ ñaboarine, rojose mũare ĩ yijama, ado bajiro ĩre ñagõquẽnoma”, Jesús ĩ yigotimasiore

(Lc 17.3)

¹⁵ Quẽna ado bajiro yũare gotimasiocami Jesús:

—Yũre ajitirũnugũ ñaboarine, rojose mũare ĩ yijama, gãjerãre gotimenane, ĩ tũ vacõari, ñagõquẽnoma, “ ‘Riojo yaja mũ. Mũre rojose yibũ yũ’ yato ĩ” yirã. “Riojo yaja mũ” ĩ yijama, ñagõquẽnoruarãja mũa. To bajiri ĩ rãca quẽnaro baba cutiruarãja mũa quẽna. ¹⁶ “Bajibeaja” ĩ yicũdijama, gãjerã juarã, yũre ajitirũnurã, “Rojose yibũ mũ” ĩre yimasirãre ĩnare jicõari, ĩ tũ vaja mũa. Juarã ĩna manijama, sigũ yũre ajitirũnugũre, “Rojose yibũ mũ” ĩre yimasigũre jicõari, ĩ tũ vaja mũa. ¹⁷ ĩnare quẽne ĩ ajibetijama, yũre ajitirũnucõari mũa rãca rẽjarã jediro ĩna ĩaro rĩjorojũa ĩnare gotiba mũa. ĩna jediro “Rojose yiyuja mũ” ĩre ĩna yisere ĩ ajibetijama, Diore ajibecũre, to yicõari, Ʃjũre gãjõa sãnibosarimasare ĩnare mũa cãmotadiriarore bajiro ĩre cãmotadiruarãja mũa —yũare yicami Jesús.

¹⁸ Quẽna ado bajiro yũare yicami Jesús:

—Riojo mũare gotiaja yũ. Adi macarucuroju yũre rotibosarã ñaruarãja mũa. To bajiro yirã ñari, “Ado bajiro mũa yijama, Dios yarã ñaruarãja mũa. Ado bajirojũa mũa yijama, Dios yarã me ñaruarãja mũa”, yimasiruarãja —yũare yicami Jesús.

¹⁹ Quẽna ado bajiro yũare yicami Jesús:

—Gajeye ado bajiro mũare gotiaja yũ: Sigũ ĩ tũoĩarore bajirone mũa tũoĩajedicõajama, mũa bojasere ĩsirucũmi yũ jacũ õ vecagũ. ²⁰ No bojarijũ juarã, idiarã, yũre ajitirũnurã ñari, Diore ĩna sãnijama, ĩna rãca ñarucũja yũ —yũare yicami Jesús.

²¹ To ĩ yiro bero, ado bajiro Jesũre sãnĩĩacami Pedro:

—Yꝯ ꝯꝯ, sĭgũ mure ajitirũnugũ ñaboarine, yure rojose ĩ yijama, ¿nocãrãcaji masu ĩre masirioꝯti yꝯ? ¿Cojomo cõro gaje ãmo jua jẽnituario ñarirãcagine ĩre yꝯ masiriojama, quẽnarojari? —Jesũre ĩre yicami.

²² To ĩ yisere ajicõari, ado bajiro ĩre cãdicami Jesús:

—Tocãrãcagine rojose mure ĩ yiro cõrone masirioroti ñaja mure —ĩre yicami Jesús.

“Manire rojose ĩna yisere mani masiriobetijama, Dios quẽne, ĩ bojabeti mani yisere masiriobetirucami”, Jesús ĩ yigotimasiore

²³ To yicõari, ado bajiro ĩ buerãre yũare gotimasiocami Jesús:

—Buto rojose mua yiro bero, sutiriticõari, “Yũare masirioya” Diore mua yijama, mũare masiriorucami. To bajiro mũare ĩ yise ñajare, “Gãjerã rojose mũare ĩna yiboajaquẽne, mũare masirioroti ñaja” yigꝯ, ado bajise gotimasiore queti mũare gotiaja yꝯ: Uꝯ, ĩre vaja morãre gotiru, ĩre moabosarimasare jicõagũmi. ²⁴ ĩre vaja morãre “Adocãrãcu ñaama” ĩ yiguadijune, sĭgũ jairo ĩre vaja mogũre ĩre ãmiejarãma ĩna. ²⁵ ĩre ĩna ãmiejarirĩmarore, ñie rãca vaja yimasibecami. To bajiro ĩ bajijare, ĩre ãmiejarãre ado bajiro ĩnare rotigumi: “Ãnire, ĩ manajo, ĩ rĩare quẽne gãjerãre yure ĩsibosaya, ‘Gãjerãre moabosarimasa ñato’ yirã. To yicõari, ĩ gajeyeũni jedirore gãjerãre ĩsicõari, vaja sẽnima. To yicõari, ti vaja mua bujasere yure ĩsima. To bajiro mua yijama, yure ĩ vaja mose jedicoarũaroja”, ĩnare yigotigumi ꝯꝯ. ²⁶ To ĩ yisere ajicõari, ĩ rĩjorojua gũsomuniari tuetuejagumi ĩre vaja mogũ. To yicõari, rũcubũose rãca ĩre sẽnigũmi: “ĭYꝯ ꝯꝯ, yuya maji! Mure yꝯ vaja mosere vaja yijeocõarucuja maji”, ĩre yigumi. ²⁷ To ĩ yisere ajicõari, ĩre ĩamaigũ ñari, “Tone bajicõato”, ĩre yicõa tũjacami, ĩ ꝯꝯ.

²⁸ To bajiro ĩ ɯɟɯ ĩ yisere ajicōari, budicoacɯmi. Budi-acɯne, ĩ baba mojoroaca ĩre vaja mogũre ĩre ĩabɯjagɯmi ĩ quēne. ĩre ĩabɯjacōari, ĩ āmɯare ñiamatagɯmi. To yicōari, ado bajiro ĩre yigɯmi: “ĭYɯre mɯ vaja mosere vaja yijeocōañã mɯ!”, ĩre yigɯmi. ²⁹ To ĩ yiboajaquēne, gusomuniari tuetucōari, ado bajise ĩre yigɯmi: “ĭYuya maji! Mɯre yɯ vaja mosere vaja yijeocōarɯcɯja yɯ”, yiboagɯmi. ³⁰ To ĩ yiboajaquēne, ajibecɯmi ĩ. To bajiri tubiberiavijɯ ĩre āmiacōari, ĩre cūrotigɯmi, “Yɯre mɯ vaja mosere vaja yijeocōarijɯ, budirɯcɯja mɯ” yigɯ. ³¹ ĩ babarã, to bajiro ĩ yisere ĩacōari, bɯto sɯtiritirãma ĩna. To bajiri ĩna ɯɟɯ tɯ vacōari, ĩna ĩariaro cōro gotirãma. ³² To bajiro ĩna yisere ajicōari, ĩre vaja moboar'i ĩ masirior'ire jirotigɯmi ɯɟɯ. ĩ ejaro ĩacōari, ado bajiro ĩre yigɯmi: “Yɯre moabosarimasɯ rojogɯ masu ñacōaja mɯ. Yɯre mɯ vaja mosere, ‘Tone bajicōato’ mure yiboabu yɯ, rŭcubɯose rãca yure mɯ sēnijare. ³³ Mure yɯ ĩamaiore bajirone mɯ babare ĩamairoti ñaboayuja”, ĩre yigɯmi ĩ ɯɟɯ. ³⁴ To bajiro ĩre yicōari, bɯto jŭnisinigũ ñari, ĩre tubiberotigɯmi ĩ quēne, “Yɯre mɯ vaja mosere vaja yijeocōarijɯ, budirɯcɯja mɯ” yigɯ —yɯare yigoticami Jesús.

³⁵ To bajise gotigajanocōari, ado bajise yɯare gotitusacami Jesús:

—To bajirone yirɯcɯmi yɯ jacɯ ò vecagɯ quēne, gãjerã rojose ĩna yisere mɯa masiriobetijama —yɯare yicami Jesús.

19

“Mɯa manajoare reabetiroti ñaja”, Jesús ĩ yire queti
(Mr 10.1-12; Lc 16.18)

¹ To bajiro ĩ gotimasioro bero, Galilea sita ñariarã vacōari, Judea sitajɯ ejacajɯ yɯa. Jordán vãme cɯtirisa

gajejacatuaĵu ñacaju ti sita. ² Toĵu jājarã masa Jesúre suyacama. Rijaye cutirãre ñinare catiocami ĩ.

³ Toĵu yua ñaro sigũri fariseo masa ejacama, Jesúre sēniĩatorã. Ado bajiro ĩre sēniĩatocama ĩna:

—¿No bojase suorine, manajo rocajama, quēnacōati? — ĩre yisēniĩatocama ĩna.

⁴ To ĩna yisere ajicōari, ado bajiro ĩnare cudicami Jesús:

—¿Dios oca masa ĩna ucamasire ado bajiro yisere ĩabeticatique mua? “Rēmoĵu ũmure, rōmiore rujeo-masiñuju Dios”, yigotiaja Dios oca. ⁵ To yicōari gajeĵu ado bajiro gotiaja Dios oca: “Ŭmu, rōmio ĩ rujeore ti ñajare, ũmuĵua, manajo cutigũ, ĩ jacuare ĩnare cãmotadicoarucumi. Manajo cutijama, ĵuarã ñaboarine, sigũ rujure bajirone ñaruarãma”, yigotiaja Dios oca. ⁶ “To bajiruarãma” Dios ĩ yimasire ti ñajare, mua manajoare reabetiroti ñaja —ĩnare yicami Jesús, fariseo masare.

⁷ To ĩ yisere ajicōari, ado bajiro tudisēniĩatocama ĩna:

—Riojo mu gotiboajaquēne, ¿no yigu ricati rotimasiñujari Moisés ñamasir'i? Ado bajiro rotimasiñumi ĩ: “No bojagu ĩ manajore ĩ rocaruajama, ‘Mure rocagu yaja’ yise papera ucacōari, sore ĩsiroti ñaja”, yimasiñumi Moisés — Jesúre ĩre yicama.

⁸ To bajiro ĩna yisere ajicōari, ado bajiro cudicami Jesús:

—Diore ajiterã ĩna ñajare, “Butobusa rojose ĩna manajoare yiroma” yigu, manajoa reare beobetimasiñuju Moisés ñamasir'i. Rēmoĵuma to bajiro me bajimasiñuju. ⁹ Riojo ado bajiro muare gotiaja yu: ĩ manajo gãji rãca so ajeri cutibetiboajaquēne, sore rocacōari, gajeo ĩ manajo cutijama, Dioĵua ĩ ĩajama, ĩ manajo me ñagōmo. ĩ ajerio cutigo ñagōmo —ĩnare yicami Jesús.

¹⁰ To ĩ yisere ajicōari, ĩ buerimasajua ado bajiro ĩre yicaju yua:

—To yijama, manajo magũne ñacõaroti ñañuja —ĩre yicajũ yũa.

¹¹ To bajiro yũa yisere ajicõari, ado bajiro yũare yicami Jesús:

—Jediro me ñarãma, manajo cõtibetiboarine, Dios ï bojarore bajiro yimasirã. To bajiro yirãma, Dios ï ejarẽmose rãca yirãma. ¹² Sīgũri manajo cõtimenta ñarãma. Rõmia rãca ña yiroti ti manijare, bajirãma. To bajirãne ruyuar-iarã ñari, bajirãma. Gãjerãma, “Rĩa yimasibeticõato” yirã, ña yijeriarã ñari, bajirãma. Gãjerãma, manajo bojamenama, “Yũ manajo cõtibetijama, yũ ɸjũ, Dios ï bojarore bajiro quẽnabusaro yimasirũcũja yũ” yitũoĩarã ñari, bajirãma. To bajiro bajirũa tũoĩarãma, to bajirone bajiato —yũare yicami Jesús.

“Rĩamasare Jesús ï ñubuejeore queti

(Mr 10.13-16; Lc 18.15-17)

¹³ Jesús tũjũ rĩamasacare juaejacama masa, ï ãmori ñujeocõari, Diore ñnare sãnibosato ï” yirã. Ña juaejasere ñacõari, ado bajiro ñnare yicajũ yũa, ï buerimasa:

—¡Juavadibesa! Gõjanabioro yaja mũa —ñnare yicajũ yũa.

¹⁴ To bajiro yũa yiboajaquẽne, Jesújuama, ado bajiro yicami:

—Rĩamasare ñnare matabesa. Ñnare bajiro tũoĩarã ñarãma ɸjũ Dios yarã quẽnaro ï yirã —yũare yicami Jesús.

¹⁵ To yicõari, rĩamasare ï ãmori ñujeocõari, Diore ñnare sãnibosacami Jesús. To yicõari bero, yũare ùmato vacoacami Jesús.

Gajeyeũni jaijũ Jesúsre ï sãnĩĩare queti

(Mr 10.17-31; Lc 18.18-30)

¹⁶ Gajeyeũni jaijũ, Jesúsre sãnĩĩagũ ejacami:

—Gotimasiorimasu, yu rijato beroju “Tudirijabeticōato” yigu, Dios i catisere yure i isisere yu bojajama, ¿no bajise quēnase yiroti ñati yure? —Jesúre ire yicami.

¹⁷ To i yisere ajicōari, ado bajiro ire cūdicami Jesús:

—¿No yigu quēnaseayere yure sēniñati mu? Dios sīgūne ñaami quēnagūma. To bajiri Dios oca masa ñna ucamasirere ñaroti ñaja. Mu rijato beroju “Tudirijabeticōato” yigu, Dios i catisere mu bujaruajama, Dios i rotimasirere cūdiroti ñaja —ire yicami Jesús.

¹⁸ To i yijare,

—¿Disire yati mu, “Dios i rotimasirere cūdiroti ñaja” mu yijama? —Jesúre ire yicami.

To i yirone, ado bajiro ire yicami Jesús:

—Dios i rotimasire yu yijama, ado bajise rotimasirere yaja yu: “Sīabesa. Gāji manajo rāca ajerio cutibesa. Juarudibesa. Socune, ‘Rojose yimi’ yigotiyirobesa. ¹⁹ Mu jacure, mu jacore quēne quēnaro ñnare rucubuoaya. To yicōari, mu masu rujare mu maiore bajirone mu tuanare maiña”, yigotiaja Dios i rotimasire —ire yicami Jesús.

²⁰ To i yirone, ado bajiro ire yicūdicami:

—Daquegūjune tire cūdisuoadicaju yu. ¿Ñie gajeye rayati quēnaro yu yiroti? —Jesúre ire yicami.

²¹ To i yisere ajicōari, ado bajiro ire goticami Jesús:

—Cojo vāme rayaja, mu yiroti, mu rijato beroju “Tudirijabeticōato” yigu, Dios i catisere mu bujaruajama: Jediro mu cuosere gājerāre isijeocōaña. To yicōari, ti vaja bujacōari, maioro bajirāre isima. To bajiro mu yijama, o vecaju Dios i ñaroju quēnase bujarucuja mu. To bajiro yigajanocōari, yure ajisuyaya —ire yicami Jesús.

²² To bajiro i yisere ajicōari, buto sutiriti vacoacami i, gajeyeūni jaigu ñari, tire maigū.

²³ To bajiro i bajivato ñacōari, i buerimasare ado bajiro yuare yicami Jesús:

—Riojo m̄are gotiaja yu. Gajeyeũni jairãrema, yure ñna s̄yaruã t̄oõaboajama, b̄uto josaruaroja ñnare. To bajicõari, yirẽto ecobosabetiruarãma. ²⁴ Quẽna tire bajise m̄are tudigotiaja yu: Vaibuc̄u, camello vãme cutigu, gãjojota gojeacare s̄ajarẽtobudimasibec̄umi. To bajirone bajaiaja gajeyeũni jairãre quẽne, yure ajitirũnu s̄yaruãboarãre. To bajiro bajirã ñnari, yirẽto ecobosabetiruarãma —yũare yicami Jesús.

²⁵ To ñ yisere ajicõari, no yimasibeticaju yua, ti ñnire ajibetirũgũriarã ñnari. To bajiri ado bajiro ñre s̄eniĩacaju yua:

—Riojo m̄a gotijama, ¿no bajiro bajirãjua Dios tujure ejaruarãda? —ñre yicaju yua.

²⁶ To yua yirone, yũare ñacõari, ado bajiro yicami Jesújuaama:

—Ñna masune ejamasimenama masa, Dios tujure. Diojuaama, ñajediro yimasijeocõami. Ñiejua josase maja, ñrema. Ñ suorine ñ tujũ ejamasire ñaja —yũare yicami Jesús.

²⁷ To ñ yisere ajicõari, ado bajiro yicami Pedro:

—Jediro yua gajeyeũnire c̄ucõari, m̄re s̄yacaju yua. ¿To bajiro yua bajicati vaja, ñie b̄ujarãti yua? —Jesũre ñre yicami.

²⁸ To ñ yisere ajicõari, ado bajiro yũare c̄udicami Jesús:

—Riojo m̄are gotiaja yu. Cojorũmu adi macaruc̄uro ti jediro quẽna tudiquẽnoruc̄umi Dios. To bajiro ñ yirirũmu yu, Dios ñ roticõacac̄u, r̄uc̄ub̄uoriaju rujiruc̄uja yu, rotiguagu. To cõrone m̄a quẽne yure s̄yuarã, juaãmo cõro, cojo ḡubo jua j̄enituario ñaricũmurorire rujiruarãja m̄a. To yicõari, mani yarã, jud'io masa, juaãmo cõro, cojo ḡubo jua j̄enituarirãc̄u ñarã masatubuarire rotiruarãja m̄a. Yure ajitirũnurãre, to yicõari, yure ajitirũnũmenare ñabesemasiruarãja. ²⁹ No bojarã, yure ajitirũnurã ñnari, ñna ya vi, ñna yarã, ñna jac̄ua, ñna r̄ia, to yicõari, ñna ya veserire

quêne ñna maisë ñaro cõro ñna vaveojama, adigodoju ñna cõosõore rëtoõusaro quênase bõjaruãrãma ñna, Dios tũju. ³⁰To bajiboarine adire quêne quênaro tuoĩaña mña: Jãjarã ado bajiro mña tuoĩarore bajirone tuoĩaboarãma: “Dios ï bojase yirã rëtoro Dios ï bojasere yirã ñari, ñamasurã ñaja yua. To bajiri, õ vecajure quêne ñamasurã ñari, quênase bõjaruãrãja”, yituoĩaboarãma. To bajiro yirã ñari, gãjerãre ïacõari, “Ïna ya vi, ñna yarã, ñna jacna, ñna rĩa, to yicõari ñna ya veserire vaveomena ñari, ñamasurã me ñaama. To bajiri, õ vecajure quênase mojoroaca bõjarona ñaama”, yituoĩaboarãma. To bajiro me bajiruãroja. Adoju ñamasurã, õ vecajurema ñamasumena ñaruãrãma ñna. Adi macarucuroju ñamasumenama, õ vecajurema ñamasurã ñaruãrãma —yũare yicami Jesús.

20

Moabosarimasa ñna bajire rãca tuoĩacõari, “Adi macarucurojure ñamasurã, õ vecajurema ñamasurã me ñaruãrãma ñna”, Jesús ï yigotimasiore queti

¹To yicõari, ï buerimasare yũare gotimasiorũtuacami Jesús. “Adoju ñamasurã ñaja yua. To bajiri õ vecaju quêne ñamasurã ñari, quênamasuse bõjaruãrãja’ yituoĩabeticõato” yigũ, ado bajise yũare gotimasiocami:

—Uye vese cuogu, uye ti bucũaro ïacõari, busuriju jẽju ñre moabosaronare jigũ vacũmi. To bajirone yiruãũmi Dios, mña uju quêne. ²Ïnare bõjacõari, ado bajiro ñnare gotigũmi: “Mña moase vaja mña sëniro cõrone mñare vaja yiruãũja yu”, ñnare yigũmi. To yicõari, ñnare moaroticõagũmi, ï ya veseju. ³Muiju ï asitutuajediriju cõro, moaruãrã ñna yuritũcuroju ñna ñacõajare, gãjerãre ñnare ïabũjagũmi. ⁴“Vasa, mña quêne. Yu uye veseju moaaya. Mña moajama, quênaro mñare vaja yiruãũja yu”,

ĩnare yigumi. ⁵ To bajiri ĩna quẽne ĩre moabosarã vacoanama. To yicõari, bero ĩmũrecaji ñaro vacu, gãjerãre bujagumi. Ñamicajua ti tusato vacu, gãjerãre bujagumi quẽna. Moare manare bujacõari, ĩnare moaroticõagũmi. ⁶ Yucú veca muiju tusato, gãjerã moaruarã ĩna yuritũcuroju ejacõari, moamenane ĩna ñacõajare, “¿No yirã moamenane ñarũmu cutiati mua?”, ĩnare yigumi. ⁷ To ĩ yirone, “Ñimũjua, yuare moarotibeami. To bajiri ñacõajaya”, ĩre yirãma ĩna. To bajiro ĩna yijare, “Vasa mua quẽne. Yu uye veseju yũre moabosaaya”, ĩnare yigumi.

⁸ Rãioriju, ĩre moabosarimasare coderimasure ĩre jigumi. “Yuare moabosarimasare ĩnare jiaya mu”, ĩre yigumi. “To yicõari, ejatusariarãre vaja yisũoya. ĩnare vaja yigajanocõari, ĩna rĩjorobusa ejariarãre vaja yiya. To bajiro rĩne yicõa vasa. To bajiri, moarã ejasũoriarãre ĩnare vaja yitũsaya”, ĩre yigumi, ĩre moabosarimasare coderimasure. ⁹ To bajiro ĩ yijare, ejatusariarãjua ejasũorãma. ĩna ejaro ĩacõari, cojorũmu vaja tariaro cõro ĩna moare vaja ĩnare vaja yigumi. ¹⁰ To cõro ĩna vaja tasere ĩacõari, “Manima jaibusaro bujaruarãja”, yitũoĩaboarãma ejasũoriarãjua. To bajiro yitũoĩaboariarãre gãjerã ĩna vaja taro cõrone ĩnare vaja yigumi. ¹¹ Uju ĩ vaja yirotisere ĩacõari, ñagõjairãma ejasũoriarãjua: ¹² “Veseju ejatusariarã, yoaro meaca ĩna moaboajaquẽne, yuare mu ĩsiro cõrone ĩnare ĩsiaja mu. Yuama, cojorũmu jediro, muiju ĩ asicõaro josari moaboabu yua”, ĩre yitud'irãma, ĩna uju. ¹³ To bajiro ĩna yiboajaquẽne, sigũre ado bajiro cudigumi ĩna uju: “Rojose mũre yibeju yu. Jẽju, ‘Mua vaja sũniro cõrone mũare vaja yirũcũja’ yigu ñari, to cõrone mũare vaja yibu. ¹⁴ Mu moare vaja juacõari, vasa. Mũre yu vaja yiro cõrone, ‘Ejatusariarãre quẽne vaja yirũcũja’ yitũoĩamu yu. ¹⁵⁻¹⁶ Yu ye gãjoa ñamu ti. To bajiri yu bojarore bajirone yibu yu. ĩnare quẽnaro yu

vaja yisere ñajūnisiniaja m̄”, ñre yigūmi ñ ɱj̄. To bajiri adi queti m̄are ȳa gotirore bajiro bajiruarōja. Adoj̄ ñamasurā, ò vecaj̄arema ñamasumena ñaruarāma ñna. Adi macarucuroj̄ ñamasumenama, ò vecaj̄arema ñamasurā ñaruarāma —ȳare yicami Jesús.

“Ȳare s̄aruarāma”, Jesús ñ yigotitusare queti

(Mr 10.32-34; Lc 18.31-34)

¹⁷Jerusalénj̄a ȳare ūmato varūtu vac̄ne, j̄uaāmo cōro, ḡubo j̄ua j̄ēnituarirāc̄u ñarāre ȳare gotir̄u, ricati ȳare jicāmotocami Jesús:

¹⁸—Quēnaro ajiya m̄a. Jerusalénj̄a vana bajiaja mani. Toj̄a mani ejaro, ȳare Dios ñ roticōacac̄re paia ɱjarāre, Dios ñ rotimasire gotimasiorimasare ñsiroc̄aruc̄mi s̄iḡ. ñnaja, “Ñre s̄aroti ñaja”, ȳare yiruarāma. ¹⁹To yicōari, romano masare ȳare ñsiruarāma. To ñna yijare, ȳare ajatud'icōari, bajaruarāma ñna. To yicōari, yucūtēroj̄a ȳare jajuturuarāma. Ȳare jajutucōari, ȳa rijato bero, ȳare yujeboaruarāma. To ñna yiboajaquēne, ȳare ñna s̄aro bero, idiarūm̄a tusatirūm̄ne ȳare catiocōaruc̄mi Dios —ȳare yicami Jesús.

Santiago mesa jaco Jesúre so s̄enire queti

(Mr 10.35-45)

²⁰To ñ yiro bero, Zebedeo r̄ia jaco, so r̄ia rāca ejacamo, so r̄ia ñna bajirotire Jesúre s̄enigō ejago. Adocārāc̄u ñacama so r̄ia: Santiago, Juan ñacama ñna. Jesúre r̄ucub̄ogo, ñ r̄ijoroj̄ua ḡusomuniar̄i t̄uetucamo so. To yicōari, Jesús quēnaro so r̄iare ñ yirotire s̄enicamo. ²¹So s̄enisere ajicōari,

—¿No bajiro quēnaro ȳa yirotire bojati m̄a? —sore yicami Jesús.

To ñ yijare, ado bajiro c̄udicamo so:

—“Ñajediro ɱj̄a ñaja ȳa” ȳiñocōari, m̄a rotis̄orirodo ti ejaro, ȳa r̄iare ado bajiro ñnare m̄a ūmato rujirotire bojaja

yũ: Sîgũ mũ riojojacatua, gãjire mũ gãcojacatua ñnare ùmato rujirũcũja mũ, “Mũ rotirore bajirone ñna quẽne rotimasiato” yigũ —ĩre yicamo so.

²² To so yisere ajicõari, so rĩajũare ado bajiro yicami Jesús:

—Tũoĩamasimenane yũre sẽniboaja mũa. Yũ rãca mũa rotirũajama, ¿mũa quẽne yũre bajirone rojose tãmũorã-tique mũa? —ñnare yicami Jesús.

—Bajicõarãja —ĩre yicama ñna.

²³ To ñna yisere ajicõari, ado bajiro yicami Jesús:

—Riojo mũare gotiaja yũ. Mũa quẽne, yũ tãmũorotire bajiro rojose tãmũorũarãja. To bajiboajaquẽne, yũ riojojacatua, yũ gãcojacatua mũare rojomasiyecũja yũ. “Ñna ñnarũarãma yũ macũ tũ rujirona” yũ jacũ ñ yicana rĩne rujirũarãma —ñnare yicami Jesús.

²⁴ Jesús buerimasa juaãmo cõro ñnarã, yua ajibetone, “To bajiro bojaja yua” ñna yirudisere ajicõari, jũnisinicajũ yua.

h ²⁵ To bajiro yua bajijare, yua jedirore jirẽocõari, ado bajiro yicami Jesús:

—Ujarã, Dios yarã me ñnarã, ñna yarãre buto tutuaro rotirãma ñna. Tire masiaja mũa —yũare yicami. ²⁶ — Mũama, yũ yarã ñnari, ñnare bajiro bajibetirũarãja. Yũre ajitirũnũrã, ñnasmurã ñnarũarãma, gãjerã ñna bojasere masicõari, quẽnaro ñnare yiejarẽmorã. ²⁷ To bajiri ñnasmurã mũa ñnarũajama, gãjerãre moabosarũarãja mũa. ²⁸ Dios ñ roticõacacũ quẽne, to bajirone bajiaja yũ. “Gãjerã yũ bojasere masicõari, quẽnaro yũre yato ñna” yigũ me vadicaũ yũ. “Ñna bojasejũare masicõari, quẽnaro ñnare yirũcũja”

h **20:24** Zebedeo manajo, Juan, Santiago jaco, Jesús buamo ñañũju so. To bajiri, “Ñ yarã ñnaama” yitũoĩagõ ñnari, “Yũ rĩare quẽnaro yirũcũmi”, yitũoĩaboayũju so. Tire ajimasicõari, jũnisiniñũjarã Jesús buerã juaãmocãrãcũ ñnarãjua, “Ñ yarã ñnajare, ejarẽmogũmi” yitũoĩarã ñnari.

yigũ vadicaɟu yũ. To yicõari, jãjarã rojose ãna yisere Dios ã masiriose vaja, ãnare vaja yibosagũagũ vadicaɟu yũ — yũare yicami Jesús.

Juarã caje ãamenare Jesús ã ãarotire queti

(Mr 10.46-52; Lc 18.35-43)

²⁹ Jericó vãme cuti maca ãacõari, yũa vatone, jãjarã masa yũare sũyacama, Jesúre ãarã. ³⁰ Toɟu yũa vatone, juarã ãamena rujicama, maa tu. Jesús ã rãtosere ajicõari, ado bajiro ãre jiavasãcama ãna:

—Yũa ɟju, Ɔju David ãamasir'i jãnami, “Rotimũorũgõrũcũmi” yigũ, Dios ã cõar'i ãaja mũ. Yũare ãamaiña mũ —yiavasãcama ãna. ³¹ To bajiro ãna yiavasãrone,

—¡Avasãbesa! —ãnare yicama masa. To bajiro ãna yiboajaquẽne, butobusa avasãcama ãna:

—Yũa ɟju, Ɔju David ãamasir'i jãnami, “Rotimũorũgõrũcũmi” yigũ, Dios ã cõar'i ãaja mũ. Yũare ãamaiña —Jesúre ãre yiavasãcama ãna.

³² To ãna yisere ajicõari, tujarũgũcami Jesús. To bajicõari, ãamenare jicami:

—¿No bajiro mũare yũ yisere bojati mũa? —ãnare yisẽniĩacami, caje ãamenare.

To ã yijare, ado bajiro ãre yicũdicama:

³³ —Yũa ɟju, tudĩĩarũaja yũa —ãre yicama ãna.

³⁴ To ãna yisere ajicõari, ãnare ãamaigũ ãnari, ãna cajearire moaĩacami. To bajiro ã yirirĩmarone, ãamena ãaboacana, ãacoacama ãna yuja. ãacõari, ãna quẽne Jesúre sũyacoadicama.

21

“ ‘Rotimũorũgõrũcũmi’ yigũ, Dios ã cõagũ ãaja yũ”
yĩĩogũ, Jerusalénju Jesús ã ejare queti

(Mr 11.1-11; Lc 19.28-40; Jn 12.12-19)

¹⁻² Jerusalén cõñana, Betfagé vãme cõtí maca ejacajũ yua. Olivo vãme cõtí buro jũdo ñacajũ ti maca. Tojũ juarã yua rãcanare ï buerãre ado bajiro ñnare roticõacami Jesús:

—Mani varoto riojo ñarimacare vasa maji. Tojũ ejacõari, burra ñna siaturũgõriore bujaruarãja mua, so macũ rãca ñagõre. Ñnare õjacõari, yũre juadibosaba. ³ Ti macagũ mua õjaro ñacõari, mũare ï sãnĩñajama, “Mani mũjũ ñnare bojami. No cõro mene tũocõarũcumĩ quẽna”, ñre yicũdiba. To bajiro mua yisere ajicõari, sãnĩñarẽmobe-tirũcumĩ. “Ваѣ. Vasa”, mũare yirũcumĩ —ñnare yicami Jesús.

⁴ To bajiro ñnare yiroticami Jesús, Diore gotirẽtobosari-masũ, “Ado bajiro bajirũaroja” ï yucamasire ñajare:

⁵ “Jerusalén macanare ado bajiro yirũarãja mua: ‘Íaña mua. Mua mũjũ vadiami. “Ñamasugũ me ñaja yũ” yitũoĩagũre bajiro ejaami. Burra, gajeyeũni ùmagõ macũ joejũ jesacõari, vadiami’ yirũarãja mua”, yucamasiñũju Diore gotirẽtobosarimasũ.

⁶ To bajiri Jesús ï rotisere ajicõari, ï rotirore bajirone yiyuma ñna. ⁷ Burra to yicõari, so macũre quẽne ñnare juaejacama ñna. To yicõari, ñna ye sudi joeayere vejecõari ñna joere jeocama ñna. To ñna yiro bero, macũjũare vaje-jacami Jesús. ⁸ Jãjarã masa ñnacama. Ñna ye sudi joeayere vejecõari, ï varotijũre cũ rĩjoro cõtícama. “Yua mũjũ ñaja mũ” yirã, to bajiro yicama, Jesũre rũcũbuorã. Gãjerã yucũ rũjũri jasurecõari, maare cũ rĩjoro cõtícama. ⁹ To yicõari, “ “Rotimũorũgõrũcumĩ” yigũ, Dios ï cõagũ ñaja yũ’ yĩicõari, rotisũorũcumĩ yuja” Jesũre ñre yitũoĩarã ñari, bũto variquẽnacama ñna. Ñre rĩjoro cõtí vana, ñre sũyarã quẽne, ñre ñavariquẽnarã ado bajiro avasã vacama ñna:

—¡Ujũ David ñamasir'i jãnami, “Rotimũorũgõrũcumĩ” yigũ, Dios ï cõar'i ñnaami! ¡Quẽnase ñre yivariquẽnato

mani! ¡Diore rotibosagu quēnaro ï yigu ñaami! ¡Diore quēne, quēnase ïre yivariquēnato mani, āni yua ujure ï cōajare! —yivasā vacama ïna.

¹⁰ To bajiro Jesús, Jerusalénju, masa rāca ï ejasere ïacōari, buto gāmerā ñagōcama ti macana jediro.

—¿Ñimū ūgū ñati? —gāmerā yisēniīacama, masa ïna avasā vado vatoaju Jesús ï vadire ïacōari.

¹¹ To ïna yijare, gājerā ado bajiro yicudicama:

—Īne ñaami Diore gotirētobosarimasu, Jesús vāme cutigu, Galilea sita Nazaret vāme cuti macagu —yicama masa.

Diore yirūcubuoariaviju ñacōari, gajeyeūni ïsirivire bajiro ïna yiñajare, Jesús ïnare ï tud' iāgōbure queti

(Mr 11.15-19; Lc 19.45-48; Jn 2.13-22)

¹² Ti macajure ejacōari, Diore yirūcubuoariaviju sājacaju yua, Jesúrāca. Ti vijū gajeyeūni ïsirāre, ïnare vaja yirāre quēne tud' iāgōbucami Jesús. Gājerā ye rāca gājoa vasoarimasa ïna gājoa jeorijaure tucaguereacami. To yicōari, buja ïsirimasa ïna rujiri cūmurorire tucaguereacami. ¹³ To yicōari, ado bajiro ïnare goticami Jesús:

—Diore gotirētobosarimasa ïna ucamasire ado bajiro gotiaja: “Yū ya vima, yure sēnirūcubuoarā rējariavi ñarūaroja”, yigotiaja, adi vire. To bajiro ï yimasire ti ñaboajaquēne, ado bajiro mūa yiñase suorine juarudirimasa ya vire bajiro bajiaja ti —ïnare yicami Jesús.

¹⁴ Ti vijū, yua ñarone, ïamena to yicōari rujasagueri vana, ejacama, Jesús tūju. To bajiro ïna bajirone ïnare catiocami. ¹⁵ Ti vire ñacama paia ujarā, Dios ï rotimasire gotimasiorimasa quēne. To bajiri Jesús, ïaiañamani ï yiōsere ïacōari, “¡Uju David ñamasir'i jānami, ‘Rotimuoarūgōrucami’ yigu, Dios ï cōar'i ñaami! ¡Quēnase ïre yivariquēnato mani!” rīamasa ïna yivasā ñasere

ajicōari, Jesújuare buto jūnisinicama. ¹⁶ To bajiri ado bajiro Jesúre sēniācama:

—¿To bajiro mure ĩna yisere ajati m̄? “To bajise yibesa”, ĩnare yiya —ĩre yicama ĩna.

To ĩna yiboajaquēne, ado bajiro ĩnare goticami Jesús:

—Ajiaja ȳ. Dios oca masa ĩna ucamasire to bajirone gotiaja rīamasa ĩna yiro tire. ¿Īabeticatique ado bajiro yisere? Ado bajiro gotiaja ti:

“Rīamasa, to yicōari, ūjurāca quēne, m̄re quēnaro r̄c̄ub̄uor̄ar̄ama ĩna’ to bajiro m̄ yise ñajare”, yigotiaja Dios oca —ĩnare yicami Jesús.

¹⁷ To ĩ yiro bero, ĩnare vaveocōari, Betania vāme c̄ti macaj̄ ejacōari, cānicaj̄ ȳna.

Higuera vāme c̄tiure, “Juaji rica maniucararāja”, Jesús ĩ yire queti

(Mr 11.12-14, 20-26)

¹⁸ Quēna busurij̄ Jerusalénj̄ tudiacaj̄ ȳna. To ȳna bajiro, Jesús, ñiorijacami. ¹⁹ Maa t̄ higuera vāme c̄tī ñacaj̄. Tī ricare bar̄, ojaboacami Jesús. Rica manicaj̄, tījuama. J̄ r̄ne ñacaj̄. To bajiri tīre ado bajiro yicami Jesús:

—Juaji rica maniucararāja —tīre yicami.

To bajiro ĩ yirir̄marone, s̄nirocacoacaj̄ tī. ²⁰ To bajiro ti bajisere ĩacōari, no yimasibeticaj̄ ȳna, ti ūnire ĩabetir̄ḡc̄ana ñari. “¿No yiro guaro s̄nirocacoajari ti?” yisēniācaj̄ ȳna.

²¹ To ȳna yirone, ado bajiro ȳnare c̄dicami ĩ:

—Riojo m̄are gotiaja ȳ. “To bajiro yir̄c̄ami Dios” ĩre m̄a yiaj̄tir̄n̄ t̄j̄abetijama, higuera vāme c̄tīure ȳ yise ūni r̄rene yimasimenaja m̄a. Gajeye josase ti ñaboajaquēne, yimasicōarāja. “I burore, moa riagaj̄ ro-caracoasa” m̄a yijama, to bajirone bajir̄aroja. ²² “Ȳna

sēnijama, yuare ĩsicōagũmi” yituoĩfacōari, Diore mua sēnijama, muare ĩsirucumi —yuare yicami Jesús.

“¿Ñimũ mure ĩ rotise rāca to bajiro yati mu?”, Jesúre ĩna yisēniĩare queti

(Mr 11.27-33; Lc 20.1-8)

²³ To ĩ yiro bero, Jerusalénjũ ejacajũ yua. To bajicōari, Diore yirũcubũoriavijũ Jesúrāca sājacajũ yua. Sājaejacōari, masare gotimasiocami Jesús. To ĩ yiĩarone, bũcurā, paia ẽjarā quẽne, ejacama ĩna, Jesúre sēniĩarā:

—¿Ñimũ mure ĩ rotise rāca to bajiro yirũgũati mu? —ĩre yisēniĩacama ĩna.

²⁴⁻²⁵ To bajiro ĩna yisere ajicōari,

—Yũ quẽne, ado bajiro muare sēniĩaja yũ. Yũre mua cũdicōarojũ, “Ĩ rotise rāca yaja yũ”, muare yirucũja maji. ¿Ñimũ rotiyujari, Juanre, “Oco rāca masare ĩnare bautizaya” yigũ? ¿Dios rotiyujari? ¿Masajua rotiyujarique? —ĩnare yisēniĩacami Jesús.

To ĩ yisere ajicōari, ĩna masurione gāmerā ñagõñacama ĩna:

—“Dione, Juanre oco rāca masare bautizarotiyumi” mani yijama, ado bajiro manire sēniĩajacagumi: “Tire masirā ñaboarine, ¿no yirā ĩre ajitirũnũbeticati mua?” manire yisēniĩajacagumi. ²⁶ To yicōari, “Masane, Juanre oco rāca bautizarotiriarāma” mani yijama, manire bũto tud'irũarāma masa, “Diore gotirẽtobosarimasũ ñaboacami Juan” yirā ñari —gāmerā yicama ĩna.

²⁷ To bajiro gāmerā ñagõrā ñari, ado bajiro ĩre cũdicama ĩna:

—Juanre rotir'ire masibeaja yua —Jesúre yicōacama ĩna.

To ĩna yisere ajicōari, ado bajiro ĩnare cũdicami Jesús:

—To bajiro yũre mua cũdijare, “Ĩ rotise rāca yaja yũ”, muare yigotibetirucũja yũ quẽne —ĩnare yicami Jesús.

Juarã rĩa cutigu, ï rĩare ï moarotirere Jesús ï gotimasiore queti

²⁸ To bajiro ïnare yigajanocõari, gotimasiore queti ïnare goticami Jesús:

—¿No bajiro tuoĩati mua, adire, yu gotiguadire? Sīgũ ñagũmi juarã rĩa cutigu. ï macu ñasuoğure ado bajiro yigumi ï: “Macu, yucurema mani uye vesere moagũaja”, ïre yigumi. ²⁹ To ï yiboajaquẽne, “Varuabeaja yu”, ïre yicudigumi. To bajiro yiboarine, berojuma, tuoĩavasoacõari, moagũ vacoacumi ï yuja. ³⁰ To ï yiro bero, gãji ï macure quẽne, to bajirone ïre yigumi. To ï yirone, “Baũ. Moagũ varucija yu”, ï jacure yicudigumi ï. To yiboarine, vabecumi. ³¹ To bajiri mua tuoĩajama, ¿nijua ñañujari ï jacu ï rotiriarore bajirone cudir'i? —ïnare yisẽniĩacami Jesús.

To ï yisẽniĩarone, ado bajiro ïre cudicama:

—Ï, moarotisur'ijua, ï jacu ï rotiriarore bajiro ïre cudiyumi —ïre yicudicama.

To ïna yisere ajicõari, ado bajiro yicami Jesús:

—Riojo muare gotiaja yu. Ujũre gãjoa sãnibosari-masare, to yicõari, rõmia, ãmuare ajeriarã cuticõari, vaja sãnirã rõmirire, “Rojorã masu ñaama” ïnare yĩaterã ñarãja mua. Mua ïaterã sīgũri, tuoĩavasoacõari, Uju Dios yarã quẽnaro ï yirã ñarãma. ïnare bajiro mua tuoĩavasoabetijama, ï yarã me ñaruarãja mua. ³² Juan, oco rãca masare bautizarimasu, “Ado bajirojua mua yijama, quẽnaroja” muare ï yigotimasioboajaquẽne, ïre ajibesuja mua. To bajiboarine, “Rojorã masu ñaama” mua yĩaterãjuama, ïre ajitirũnuñuma ïna. To bajiri ïre ïna ajitirũnũsere ïariarã ñaboarine, ïre ajibeticõari, rojose mua yirũgũriarore bajiro rojose yicõa ñaja mua —ïnare yicami Jesús.

“*Jud'io masa ñna ajitirũnubetijare, gãjerãjuare ñjorũcumi Dios*” yigũ, moarimasa rojose yirã ñna bajire rãca Jesús ñ gotimasiore

(*Mr 12.1-12; Lc 20.9-19*)

³³ Quẽna ado bajiro ñnare gotimasiocami Jesús:

—Sĩgũ masũ ñye vese otegũmi. Tire otegajanocõari, matagũmi. To yicõari, ñye oco juarotijũ quẽnogũmi. Tijũ bero, vecajũ ñacõari, ñ ñatirũnũjesarotijũ quẽnogũmi. To yigajanocõari, gãjerãre, “Yũre ñatirũnũbosaba”, yigũmi. “Ñye ti rica cutiro, gãjerãre ñsicõari, vaja sãniruarãja mũa. To yicõari, mũa juajama, ‘Ado cõro ñaja mani ye. Ado cõro ñaja ñ yema’ yicõĩama”, ñnare yigũmi. To yicõari, gajerojũ vacoacũmi yuja. ³⁴ To bajiri cojorũmũ, “Ñye rica cuti bucũatoja ti” yigũ, ñre moabosarimasare cõagũmi, “Ñye, yũre ñna cũbosarere yũre juabosaaya” yigũ. ³⁵ Ñye vesejũ ñna ejaro ñacõari, ti vese coderãjũ, ado bajiro yirãma: ñnare ñejecõari, jarãma. Gãjerãre sãrãma, to yicõari gãjerãre gũtane reasãrãma. ³⁶ To ñna yire quetire ajicõari, jãjarãbusa ñre moabosarimasare cõagũmi vese ñjũ, ñ ye ñarotire juabosaaya yigũ. Ti vesejũ ñna ejarone, ñatirũnũrimasa, to rĩjoro ejariarãre ñna yiriarore bajirone yirãma, ñnare quẽne.

³⁷ To bajiro ñna yiecore quetire ajicõari, “Yũ macũjuare rũcũbũorãma” yitũõĩacõari, ñre cõaboagũmi. ³⁸ To bajiro ñ yicõar'ire, vesejũ ñ ejasere ñacõari, ado bajiro gãmerã ñagõrãma vese coderimasa: “Adi vese ñjũ macũne ñaami. To bajiri ñ bajirocaveojama, ñne ñaami ñre vasoarocũ. To bajiri ñre mani sãajama, mani ye sita ñarũaroja yuja”, gãmerã yĩagõrãma ñna. ³⁹ To bajiri vese sojuajũ ñre ñia vati, ñre sãrocacõarãma —ñnare yicami Jesús.

⁴⁰ To bajiro ñnare yigajanocõari, ado bajiro ñnare sãnĩacami:

—¿Ti vese ɯɯ tudiejagu, no bajiro ñnare yigɯjari, ti vese coderimasare? —ñnare yisēñiācami Jesús.

⁴¹ To ñ yisere ajicōari, ado bajiro ñre cɯdicama ñna:

—Rojorã masu ñnarãma ti vese ñatirñnã. To bajiri ñnare ñamaibecune ñnare sñareagumi. To ñ yiro bero, gãjerãre ti vesere ñatirñnaronare vasoagumi, ñ ye ñnrotire juabosaronare —Jesúre ñre yicama ñna.

⁴² To ñna yicɯdisere ajicōari, Jesúsua, ado bajiro ñnare yicami:

—“ɯye vese ɯɯ macure rojorã ñna sñarocarere bajirone viri buarimasa gũta ñna beserocaria ñnaboarine, ñnamasurica ñnarũaroja”, yigotiaja Dios ocare masa ñna ucamasire. ¿Tire ñabeticatique mua? Ado bajiro gotiaja:

“Gũta rãca vi quēnorimasa coja gũtare rocarãma ñna. ñna rocaria ñnaboarine, gajea gũta rētoro quēnarica ñnarũaroja tia. Tia gũta suorine quēnarivi quēnorucumi Dios. Tia manijama, quēnomasibetibogumi. To bajiro bojagumi Dios mani ɯɯ. To bajiri tia gũta suori Dios quēnaro ñ yisere ajimasicōari, buto tuoĩa variquēnaja mani”, yigotiaja Dios oca masa ñna ucamasire.

⁴³ To bajiri ado bajiro yigu, ti quetire muare gotibu yu: Diore rotibosagure yure ajitirñnumena mua ñnjare, jud'io masa mejuare, “Yu yarã ñña” ñnare yicōari, quēnaro ñnare yirucumi Dios. ñnajuama, Dios ñ bojarore bajiro ñre ajitirñnũarãma. ⁴⁴ No bojarã yure, yu ocare ajiterã, rojose tãmũorũarãma ñna —ñnare yicami Jesús.

⁴⁵ Jesús ñ gotimasiosere ajicōari, “Mani bajisere yigu yami”, yiajimasicōacama fariseo masa, paia ɯjarã quēne.

⁴⁶ To bajiri Jesúre ñnarũaboacama ñna. “Diore gotirēto-bosarimasu ñnaami Jesús” masa ñna yituoājare, masare güirã, ñre ñiabeticama.

22

“*Ī macu* ĩ āmosiagu^uadijare, masare jirēogūmi *u*ju”,
Jesús ĩ yigotimasiore queti

(*Lc 14.15-24*)

¹ Quēna gotimasiore queti masare goticami Jesús:

² —Adi quetire t^uoīacōari, “Tire bajiro bajiruaroja, masare ‘Yu yarā ñaña m^ua’ Uju Dios ĩ yiroti” m^uare gotimasiogū yaja: Sīgū *u*ju, ĩ macu ĩ āmosiarotirūm^ure quēnoyugūmi. ³ To yicōari, “Īvari quēna ejarēmoronare jiaja m^ua” yig^u, ĩre moabosarimasare cōagūmi ĩ. To ĩ yisere ajicōari, jirā vaboarāma ĩna. Īnajuama, vadiruamenama. ⁴ Īna vadirubetire ajicōari, gājerā ĩre moabosarimasare cōagūmi quēna. “Yu^u *u*ju m^uare jig^u ñari, ĩ yarā vaib^uc^urā mame b^uc^uarāre sīarotimi. Jēre quēnogajanom^u y^ua. To bajiri ĩ macu ĩ āmosiarirūm^u ĩarā vayá m^ua quēne’ ĩnare yiba”, yicōagūmi ĩna *u*ju. ⁵ To ĩ yisere ajicōari, jirā vaboarāma ĩna quēna. Īnare c^udimenane, vacoanama, ĩna ye moare moaroana. Sīgū ĩ ya veseju vacūmi. Gāji ĩ gajeyeūni ĩsiroju vacūmi. ⁶ Gājerāma, *u*ju ĩ cōaboariarāre ñejecōari, ĩnare jasīacōarāma. ⁷ Tire ajicōari, b^uto jūnisinigūmi *u*ju. To bajiri ĩ yarā surarare cōagūmi. “Īnare sīacōari, ĩna ya virire soereacoaya”, ĩnare yicōagūmi. ⁸ To ĩ yiro bero, gājerā ĩre moabosarimasare ado bajiro gotigūmi: “Yu macu ĩ āmosiarotiaye quēnogajanom^u. Jēju y^u queti cōaboarā, ĩna ejabetijare, quēnaja. Īnare jicōabetiroti ñaboayuja. ⁹ Jājarā masa ĩna vati maarijuare vasa. To m^ua ĩab^ujarā cōro jirēocōari, ĩnare ūmato vaba”, ĩnare yigūmi *u*ju, ĩre moabosarimasare. ¹⁰ ĩ rotirore bajirone masare jirēorāma ĩna. Quēnarā, rojorā, ĩna b^ujarā cōro jirēorāma. To bajiri *u*ju ya vi, jūm^ucoatoja ti.

¹¹ ĩ jicōariarāre ĩagū sājagūmi *u*ju. Sīgūre, ĩna āmosiaro ĩarā ejarā ĩna sāñase ūnire sāñabec^ure ĩab^ujugūmi ĩ. ¹² To

bajiri, ĩre ĩacōari, ado bajiro ĩre sēniĩagūmi: “¿No yigū ĩna āmosiario ĩarā ĩna sāñase ũni sāñabeati mū?”, ĩre yigūmi. To ĩ yiboajaquēne, ĩre cūdibecūmi. ¹³ To ĩ bajijare, bare jeorimasare ado bajiro ĩnare yigūmi ũjū. “ĩ gūbori, ĩ āmorire quēne siacōari, rētiaroju ĩre rocacōaña. Toju ĩnacōari, buto rojose tāmūogū ĩnari, guji pōguē, oti, yirucūmi”, ĩnare yigūmi ũjū, bare jeorimasare. ¹⁴ To bajiro bajiruaroja, “Yū yarā ĩaña mūa” Ūju Dios ĩ yiroti quēne. Jājarā masare, “Yū yarā ĩaña mūa” Dios ĩ yire ti ĩaboajaquēne, sīgūrīne ĩnarāma ĩ rāca ĩnaronā —ĩnare yicami Jesús.

*“Ūjarā gājoa manire ĩna vaja yirotijama, ĩnare ĩsiroti ĩnaja”,
Jesús ĩ yigotire queti*

(Mr 12.13-17; Lc 20.20-26)

¹⁵ To ĩ yisere ajicōari, fariseo masa ĩ tū ĩboarā cāmō-tadicoacama ĩna, gāmerā ĩagōroana. “Ado bajiro yirāsa”, yiruyuyuma:

—Ado bajiro mani sēniĩajama, cūdimasibeticōari rojose tāmūorucūmi —yitūoĩaboayuma.

¹⁶ To bajiro yitūoĩarā ĩnari, ĩna rācanare, to yicōari, “Ūju ĩnamasugū ĩnarucūmi Herodes” yirūgūrīarāre quēne, Jesús tū ĩnare cōañujarā ĩna, “ĩre sēniĩaaya mūa” yirā. To ĩna yicōariarā ado bajiro Jesúre sēniĩacama ĩna:

—Ajīya gotimasiorimasū. “Riojo gotigū ĩnaami”, mūre yimasīaja yūa. “Ado bajiro mani yisere bojagūmi Dios” yigotimasīogū ĩnari, riojo yūare gotimasīoaja mū. “Ado bajiro yū gotimasīojama, yūre ajjūnisinīruarāma” yitūoĩabecūne, riojo gotigū ĩnaja mū. “Ānoama, ĩnāsurā ĩna ĩnājare, ricati ĩna ajjūnisinībetire ĩnare gotimasīorucūja”, yitūoĩabecū ĩnaja mū. Masa ĩnājedīrore yūare riojo gotigū ĩnaja mū. ¹⁷ To bajiro yigū mū ĩnājare, mū tūoĩasere ajīruaja yūa. ¿Roma macagū ũjū, César, gājoa manire ĩ vaja yirotisere mani vaja yijama, quēnacōarōjari?

¿Dios ï rotimasirere cüdimenta yirãjarique mani, ïre mani vaja yijama? —Jesúre yisēniĩaboacama ïna.

¹⁸ Jesújuama, “Rojose yure yiruarã, to bajise yure sēniĩatoama ïna”, yimasicōacami. To bajiri ado bajiro ïnare cüdicami:

—“Quēnarã ñaja yua” yiboarine, mua yirore bajiro yirã me ñaja mua. ¿No yirã, “Rojose ïre yirãsa” yirã, to bajise yure sēniĩatoati mua? —ïnare yicami Jesús. ¹⁹ —Roma macagu ujure gãjoatii, ïre vaja yirotiire, cojotii yure ïoña —ïnare yicami Jesús.

To ï yijare, ãmiadi, ïre ïocama ïna. ²⁰ Gãjoatiire ïacōari, ado bajiro ïnare sēniĩacami Jesús:

—¿Ñimua rioga tuyati? ¿Ñimua vãme tuyati? —ïnare yicami Jesús.

²¹ To ï yirone,

—Roma macagu Uju César rioga tuyaja. To yicōari, ï vãme quēne ñaja ti —Jesúre yicüdicama ïna.

To ïna yijare, ado bajise yicami Jesús:

—To bajiri aditiire ïacōari, “César yatii ñaja”, yimasiaja mua. To bajiri, gobierno ï vaja yirotijama, ïnare vaja yiroti ñaja. To bajirone bajiaja Diore quēne. Jediro Dios ï cōase ti ñajare, “Yua cuose ti ñaboajaquēne, ti rãca mu bojarore bajiro yiruarãja”, Diore ïre yiroti ñaja, manire. To yicōari, “No bojase moare yua yise quēne, mu ujose rãca yua yimasisse ti ñajare, ti rãca mu bojarore bajiro yirügürarãja”, ïre yiroti ñaja, muare —ïnare yicami Jesús.

²² To bajiro ï yisere ajicōari, no yimasibeticama ïna, quēnaro gotigure ajibetirügürarã ñari. To bajiri juaji tudisēniĩamenane, vacoacama yuja.

“¿Bajirearãma, tudicaticoanajari?”, Jesúre ïna yisēniĩatore queti

(Mr 12.18-27; Lc 20.27-40)

²³ Tirũmũne saduceo masa quẽne ejacama, Jesũre sẽnĩatorã. “Masa ñna rijato bero, ñna usũri, ñna rujũri ñaro cõrone quẽna tudicatimenama” yirã ñacama saduceo masa. Ado bajiro ñre sẽnĩacama:

²⁴ —Ajiya gotimasiorimasũ. Moisés ñamasir'i ado bajiro ñ yiuacũmasire ti ñajare, mũre sẽnĩarã vabũ yũa: “Sĩgũ, manajo cutiboa, rĩa magũne ñ bajirocayama, ñ gagũ manajo ñariore manajo cutirucumi ñ bedijũa. To bajiri ñ rãca ñacõari, so macũ cutijama, ñ gagũ macũ ñarucumi”, yimasĩũju Moisés. ²⁵ Yũa rãcana, sĩgũ rĩa, cojomo cõro jũa jẽnĩtuarĩacũ ãmũa ñaboacama. Sĩgõrene manajo cutiboacama ñna. Ñasũogu sore manajo cutisũoboacami. Rĩa magũne rijacoacami ñ. Ñ rijato bero, gãji ñ bedi vasoaboacami. Ñ quẽne rĩa magũne rijacoacami. ²⁶ Ñ bederã quẽne, to bajirone sore manajo cutiboacama. Rĩa manane, rijajedicoacama ñna quẽne. ²⁷ So manajũa ñna rijajediro bero, so quẽne rijacoacamo yuja. ²⁸ To bajiri bajireacõari, quẽna ñna tudicatijama, ¿ñĩmũjũa ñaguĩda so manajũ masũ ñarocũma, ñna ñaro cõrone sore ñna manajo cuticato bero? —Jesũre yisẽnĩiatocama ñna.

²⁹ To ñna yirone, ado bajiro cudicami Jesús:

—Dios oca masa ñna ucamasire ajimasimena ñaja mũa. Dios ñ masisere quẽne masirã me ñaja. To bajirã ñari, Moisés ñ ucamasirere tũoĩacõari, “Riojo me gotiro yaja”, yitũoĩaboaja mũa. ³⁰ Ado bajirojũa bajijaja: Bajireariarã, ñna tudicatiro bero, manajo cutire, manajũ cutire quẽne manirũaroja. Ángel mesare bajiro bajirã ñarũarãma ñna. ³¹ ¿“Masa ñna bajirearo bero, ñna usũri caticõaroja”, yirere ñabeticatique mũa? Dios ñ masune ñ gotirere ñre gotirẽ-tobosarimasũ ado bajise ucamasĩũmi: ³² “Mũa ñicũa ñamasiriarã Abraham, Isaac, Jacob, ñna rũcũbuo vadimasicacũne ñaja yũ”, yigotimasĩũmi Dios. Masa bajireariarã ñna usũri ti caticõa ñabetijama, to bajise yibetimasiborimi.

Bajireariarã, quëna tudicatrãjua ñna rûcubuoꝝ ñagũmi. “Ñna usari ti caticõa ñajare, bajireariarã ñaboarine, Diore rûcubuoõõa ñarãma”, yire ñaja —ñnare yicami Jesús.

³³ To bajiro ñ yisere ajicõari, no yimasibeticama ñna, quënarõ gotigũre ajibetirũgũriarã ñnari.

Dios ñ rotimasire ñamasuri vãmere Jesús ñ gotire queti

(Mr 12.28-34)

³⁴ Saduceo masare Jesús quënarõ ñnare ñ cõdise ñnare, gajeye ñre ñna sënĩĩatomasibetirere ajiyujarã fariseo masa. Tire ajicõari, rëjañujarã ñna. ³⁵ Tijũ bero, sĩgũ ñna rãcagũ, Dios ñ rotimasire gotimasiõrimasũ, Jesũre sënĩĩagũ ejacami. “Adõ bajiro josasere yũ sënĩĩajama, cõdimasibeticõari rojose tãmũorũcũmi” yigũ, adõ bajise ñre sënĩĩacami:

³⁶ —Gotimasiõrimasũ, ¿disejua ñnati ñamasuse masu Dios ñ rotimasire, mũ ñajama? —ñre yisënĩĩacami.

³⁷ To bajiro ñ yisere ajicõari, adõ bajiro cõdicami Jesús:

—Mani ñjũre, Diore bũto mairõti ñaja. No bojagũre mani mairõ rëtorõ, no bojase mani cõose, to yicõari, mani bojatũõĩase rëtorõ Diore mairõti ñaja. ³⁸ Ti ñaja ñnasõose, ñamasuse Dios ñ rotimasire. ³⁹ To yicõari, gajeye tire bajibũsasene adõ bajiro yaja: “Mũ masu rujũre mũ mairõre bajirõne mũ tũanare maiña”, yigõtĩaja Dios ñ rotimasire. ⁴⁰ To bajiri jua vãmene ñaja ñamasuse masu Dios ñ rotimasire. Tire mũ cõdijama, Moisés ñamasir'i ñ rotimasire, to yicõari, Diore gotirëtobõsarimasa ñna gotimasiõmasirere quëne cõdijeocõagũ yigũja mũ —ñre yicami Jesús.

“*‘Rotimũorũgõrũcũmi’ yigũ, Dios ñ cõarõcũ, ¿ñimũ ñarũcũmi, yitũõĩati mũa?’*”, Jesús ñ yisënĩĩare queti

(Mr 12.35-37; Lc 20.41-44)

⁴¹⁻⁴² Fariseo masa yua tu ñna rējaro, ado bajiro ñnare sēniñacami Jesús:

—“Rotim̄orũḡōr̄uc̄umi” yigu, Dios ñ cōaroc̄u, ¿ñim̄u ñar̄uc̄umi yit̄uoĩati m̄ua? —ñnare yicami Jesús.

—“Ūju David ñamasir'i jānamine ñar̄uc̄umi” yaja —ñre yic̄udicama ñna.

⁴³ To ñna yisere ajic̄ōari, ado bajiro ñnare yicami:

—To bajiro m̄ua yit̄uoĩaboajaquēne, Ūju David ñamasir'i, “Rotim̄orũḡōr̄uc̄umi” yigu, Dios ñ cūroc̄ure t̄uoĩaḡũ, ¿no yigu Diore yigure bajiro, “ȳu ūju” yimasĩñu-jari ñ? Esp'iritu Santo ñ ejarēnose r̄āca ado bajiro ucamasiñumi:

⁴⁴ “Ȳu ūj̄ure ado bajiro yir̄uc̄umi Dios: ‘Ȳu riojocat̄ua ruj̄iya maji. M̄ure ñater̄āre, ‘Rojose yit̄ujaya’ ñnare ȳu yiro bero, rojose yimasibetir̄uar̄āma. To cōrone rotis̄uor̄uc̄uja m̄u’ yir̄uc̄umi Dios, ȳu ūj̄ure”, yiu-camasiñumi David.

⁴⁵ To bajiri, “‘Rotim̄orũḡōr̄uc̄umi’ yigu, Dios ñ cōaroc̄u, David ñamasir'i jānami ñar̄uc̄umi” yiu-camasire ti ñaboajaquēne, ¿no yigu ñ ūj̄ure bajiro bajiḡutique? —ñnare yicami Jesús.

⁴⁶ To bajiro ñnare ñ gotisere ajic̄ōari, s̄īgũ ñre c̄udimasiḡũ manicami. “Mani r̄ētoro masiḡũ ñaami” yit̄uoĩac̄ōari, “‘Ñnoama masimena ñaama’ yiro mi” yir̄ā, ñre sēniña t̄u-jac̄ōacama ñna yuja.

23

“Rojose t̄ām̄uor̄uar̄āja m̄ua”, fariseo masare Jesús ñ yire queti

(Mr 12.38-40; Lc 11.37-54; 20.45-47)

¹ To ñ yiro bero, masare, yua ñ buer̄āre quēne, ado bajiro yuare yicami Jesús:

² —Dios ñ rotimasire gotimasiorimasa, fariseo masa quēne, Moisére Dios ñ rotic̄ūmasirere buer̄ēto-buc̄ōari,

“Ado bajiro yiroti ñaja manire”, yigotimasiorã ñaama. ³ To bajiri tire ña gotimasiosere quẽnaro ajitirũñña mua. To bajiboarine, ña yirore bajiro yimena ña ñajare, ña yirore bajiro yibesa. ⁴ Dios ï rotimasirere buerẽto-bucõari, ï rotimasire rõtobusaro yirotiama ña. “Cojo vãme me mani rotise ñajare, cudijeomasimenama ña” yimasirã ñaboarine, ñare ñamaimenane, “Ñajediro yua gotirõtobuse riojo ñaja”, masare ñare yicõa ñarũgũama. ⁵ Jediro ña yisere, “Quẽnaro yirã ñaama” masa ña yĩarũcubuosere bojarã yama. Ña riovecari siature, ña ricari dũreature quẽne Dios ocasãñarijataroriaca jacabusar-jatarori cõoama ña, “Gãjerã manire ñacõari, quẽnaro rũcubuoato ña” yirã. To yicõari sudiro gaja seayore, jacabusase seayore cutiaseri sãñaama ña. “Quẽnaro yirã ñaama ña” masa ña yĩarũcubuosere bojarã yama. ⁶ Boserũmuri ñaro ña barujijama, ñamasuri cũmurorire rujivariquẽnarũgũama ña. Dios ocare bueriavirijure quẽne ñamasuri cũmurorire rujivariquẽnarũgũama. ⁷ To yicõari, jãjarã masa ña rẽjarũgũrijaurire ejarũgũama. Masare ña bocajama, rũcubuose rãca ñare ña sẽnisere bojarũgũama. To yicõari, “gotimasiorimasu” masa ña yijama, ajivariquẽnarũgũama.

⁸ Muarema, ña yirore bajiro mua yibetijare, quẽnaruroja. “Gotimasiorimasu” mua rãcana muare ña yisere bojabetiruarãja mua. Sĩgũne ñaja yu, mua jedirore gotimasiorimasuma. Muama, cojoro cõrone ñarã ñaja mua, yure ajitirũnrãma. To bajiri gotimasiorimasu gãmerã yimasimenaja mua. ⁹ Õ vecajure ñagũ sĩgũne ñaami mani jacu, Dios vãme cutigu. To bajiri adi sitagure, gãjire yure ajitirũnugũre, Diore mua yirũcubuoore bajiro yirã, “yua jacu” ñre yibeja mua. ¹⁰ “Yua ucũ ñaja mu” gãjerã muare ña yirũcubuosere ñare yirotibejã. “Rotimuoũgõrcũja mu” yigu, Dios ï cõacacu, yu sĩgũne ñaja

mua ujuma. ¹¹ Sīgũ yũre ajitirũnũgũ, ñamasugũ ï ñarua-jama, gãjerã ïna bojasere masicõari, quẽnaro ïnare yie-jarẽmogũ ñarucumi. ¹² Quẽnaro ïnare ïna yirũcũbuosere bojarãre, “Ñamasurã me ñato”, ïnare yirucumi Dios. No bojagu, “Ñamasugũ me ñaja yu” yicõari, quẽnaro gãjerãre yirẽmogũjuare, “Ñamasugũ ñato”, ïre yirucumi Dios — yũare yicami Jesús.

¹³ Fariseo masare, Dios ï rotimasire gotimasiorimasare quẽne yigu, ado bajiro goticami Jesús:

—Buto rojose tãmuoruarãja mua. “Quẽnaro yirã ñaja yua” yiboarine, rojorã ñaja mua. Dios ï rotimasirere buerẽtobucõari, ñamasuse mejuare ajitirũnucõari, gotimasiovadicaju mua. To bajiro mua yijama, “Uju Dios yarã quẽnaro ï yirã ñabeticõato mani” yirãre bajiro yinaja mua. To yicõari, “Gãjerã, Uju Dios yarã quẽnaro ï yirã ñabeticõato ïna” yirã yaja mua. Dios yarã ïna ñarua-boajaquẽne, ïnare matarã yaja mua. To bajiri mua quẽne ï yarã ñabetiruarãja mua — ïnare yicami Jesús.

¹⁴ —Buto rojose tãmuoruarãja mua, fariseo masa, Dios ï rotimasire gotimasiorimasa quẽne. “Quẽnaro yirã ñaja yua”, yituoĩaboaja mua. Manajua rijaveoriarã ya virire êmarã ñaboarine, masa ïna ïaro rĩjorojua, “‘Quẽnaro yirã ñaama’ yĩato” yirã, “Yoaro Diore sẽnirã yaja”, yisocarũgũboaja mua. To bajiro mua yise vaja, gãjerã rojorã, rojose ïna tãmuose rẽtoro rojose tãmuoruarãja mua — ïnare yicami Jesús.

¹⁵ —Buto rojose tãmuoruarãja mua. “Quẽnaro yirã ñaja yua” yiboarine, mua yirore bajiro yirã me ñaja mua. “Manire bajiro gãji ï tuoĩajama, quẽnaja” yituoĩacõari, masare buto gotimasiocludiaja mua. Sīgũ, “Yũare bajiro tuoĩato” mua yigure, “Mani ajitirũnũro rẽtoro mani yere ajitirũnũato ï” yirã yaja mua. To bajiro mua yijama, “Butobusa rojose tuoĩato” yirã yaja mua. To bajiri, mua

rêtoḃusaro Dios ĩ bojabetire yicōari, “Rojose tãḃuotḃ-jabetiriaroḃu varḃcumi ĩ quēne”, yirã yaja ḃua —ĩnare yicami Jesús.

¹⁶⁻²² Quēna ado bajiro ĩnare goticami Jesús, fariseo masare, Dios ĩ rotimasirere gotimasiorimasare quēne:

—Ḃuto rojose tãḃuorḃarãja ḃua. ĩamena, gãjerã ĩamenare tãa vanare bajiro bajirã ñaja ḃua. No bojase ḃua yiroḃire ḃua yirḃajama, “Yimasucōarḃarãja ḃua. Tire ḃua yibetijama, Dios, rojose ḃuare yibogḃumi” yirã, yirere ado bajiro gãjerãre gotimasiorũgũboaja ḃua: “Cojofirema mani gotirore bajiro yirḃamena ñari, ado bajiroḃua mani gotijama, quēnacōaroja”, yirũgũboaja ḃua: “Mani gotirũgũrore bajiro yirã ñaboarine, Dios vãmere mani gotivasoajama, mani gotirore bajiro mani yibetiboajaquēne, rojose manire yibecumi Dios”, yirũgũboaja ḃua. To yicōari, ado bajiro gotimasiorēmoaja: “Dios vãmere gotiterã, Diore yirũcḃuoriavi vãme rãca mani yijama, quēnacōaroja. To bajiro yiterã, Diore yirũcḃuorã soemḃoriajau vãme rãca mani yijama, quēnacōaroja. Tire mani yitejama, õ vecajḃu ũḃuagaseroḃu Dios ĩ ñaro vãme rãca mani yijama, quēnacōaroja. To bajiboarine, Diore yirũcḃuoriaviaye oro vãme cutise rãca, to yicōari, gaje vãme Diore rũcḃuorã soemḃoriajau joere jesase vãme rãca mani yijama, mani gotirore bajirone yiroḃi ñaja”, yiboaja ḃua. Tḃoĩamasimena, ĩamenare bajiro bajirã ñaja ḃua. Ñajediro Dios ye ti ñajare, ĩ vãmerene gotirã yaja ḃua —ĩnare yicami Jesús.

²³ —Ḃuto rojose tãḃuorḃarãja ḃua. “Quēnaro yirã ñaja ḃua” yiboarine, rojorã ñaja ḃua. Dios ĩ rotimasirere buerêtoḃucōari, ñamasuse meḃuare ajitirũnrãja ḃua. To bajiro yirã ñari, bare sãvḃorere, an'is, menta, comino vãme cutire mojoroaca ti vaja cutiboajaquēne, Diore yirũcḃuoriavi moabosarimasare ĩsiaja ḃua. To bajiro

yirã ñaboarine, Dios ï rotimasire ñamasusejuarema ajitirũnumena ñaja mña. Ado bajiro bajaia ñamasuse: Quẽnaro riojo yire, gãjerãre ñamaire, to yicõari, Diore maire quẽne ñaja ñamasuse. Tire quẽne yirũgũrona ñaja mña. ²⁴ To bajiro yirã ñari, ado bajiro yirãre bajiro yaja mña: “Beco rãca idirobe” yirã, oco mña idirotire veorũgũaja mña. To bajiro yirã ñaboarine, camello vãme cutigujarema jaigu ï ñaboajaquẽne, rujune bayurãre bajiro yirũgũaja mña. To bajiri, ñamena, gãjerã ñamenare tũa vanare bajiro bajirã ñaja mña. Dios ï rotimasire ñamasuse mere ajirũcuburã ñaboarine, ñamasusejuare yimena ñaja mña —ñare yicami Jesús.

²⁵ —Buto rojose tãmuorãrãja mña. “Quẽnaro yirã ñaja yua” yituoĩaboarine, rojorã ñaja mña. Idiriabaja, bare jeobariabaja joema coeriabajari ñaboarine, jubeajuama buto ñeri cutibajarire bajiro bajaia mña. Mña usuri bajisejuarema tuoĩabeaja mña. To bajirã ñari, “Quẽnaro yirã ñaja yua” yituoĩaboarine, rojosere quẽne tuoĩarã ñari, rojorã ñaja mña. Ñaorã ñari, “Ñare yitocõari, ña cuobosere emaruarãja”, yituoĩarã ñaja mña. ²⁶ “Rojorã ñaja mani” yimasimena ñari, ñamenare bajiro bajirã ñaja mña, fariseo masa. Rojasere tuoĩatujaya. To bajiro mña yijama, Dios ï bojarore bajiro tuoĩarã ñari, quẽnaro yirã ñaruarãja mña.

²⁷ Buto rojose tãmuorãrãja mña fariseo masa, Dios ï rotimasire gotimasiorimasa quẽne. “Quẽnaro yirã ñaja yua” yiboarine, mña yimore bajiro yirã me ñaja mña. Masa yujeriaviri botisene viariavirire bajiro bajaia mña. Masa ña ñaquenariviri ñaboarine, jubeajuama rijariarã gõa quẽnabetoja. ²⁸ To bajiro bajirã ñaja mña. “Quẽnaro yirã ñaama” masa ña yĩarã ñaboarine, mña tuoĩare cutisema rojorã ñaja. “Quẽnaro yirã ñaama” masa muare ña yĩasere bojatuoĩarã ñaboarine, rojose ñaro cõro tuoĩarã

ñaja mua — ñnare yicami Jesús.

²⁹ Quēna ado bajiro ñnare gotirũtuacami Jesús:

— Buto rojose tãmuoruarãja mua. “Quēnaro yirã ñaja yua” yiboarine, mua yirore bajiro yirã me ñaja mua. Diore gotirētosamasiriarãre ñna yujemasiriaju joere quēnariju quēnoaja mua, “Quēnarã ñamasiñuma” yirã. To yicõari, gãjerã quēnaro yiriarãre quēne ñna yujerijau joere quēnase quēnorũgũaja mua. ³⁰ To yicõari, ado bajiro yirũgũaja mua: “Mani ñicua, Diore gotirētosarimasare ñna sãarearo, ñnare sãa ejarēmobetiboriarãja mani”, yirũgũaja mua. ³¹ To bajiro mua yijama, “Quēnarã ñañuma” yirã me yaja mua. Ado bajirojua yirã yaja: “Diore gotirētosamasiriarãre mani ñicua ñna sãamasire quēnañuja ti” yirã yaja mua, mua ñicua rojose ñna yiriarore bajiro rojose yirã ñari. ³² Mua ñicua Diore gotirētosarimasare ñna sãasovadimasiriarore bajirone mua quēne ñna jānerabatia ñari, Diore gotirētosarimasare sãajeocõaroti ñaja — ñnare yicami Jesús.

³³ — Vãtia uju rojose ñ yirore bajirone rojose yijairã ñaja mua. Rojose tãmuotujabetiriaroju mua varotire, no bajiro rudimasibetiruarãja. ³⁴ Mua jud'io masa vatoaju Diore gotirētosarãre, quēnaro tuoãrãre quēne, Dios ocare gotimasiorãre quēne cõarucuja yu. ñnare sãaruarãja mua. Gãjerãrema yucútẽroju jajusãaruarãja. Gãjerãrema, Dios ocare ñna buerivirijau ñnare jaruarãja. Gãjerãrema, ñna vati macari ñnaro cõrone rojose ñnare yisuyaruarãja. ³⁵ To bajiro mua yiroti ti ñajare, ado bajiro yirucumi Dios, mua ñicua, mua yarã jedirore yure ajitirũnmenare: Abel ñamasir'ire mua ñicu ñ sãasomasire, to yicõari Diore yirũcubõoriavi jubeaju ñnarijau soemuorijau tũju Berequ'ias macure Zacar'iare ñna sãatusamasirere, quēnaro yirãre ñna sãavadimasire ñajare, buto rojose tãmuoruarãja mua, adirũmuri ñarã. ³⁶ Riojo muare gotiaja

yɯ. Mɯa ñicɯa ñna bajimasiriarore bajirone Diore mɯa ajitirũnbeticõa ñajare, ñna sãamasire vaja rojose ñnare ï yiroti rêtobusaro rojose mɯare yirucami Dios, adirũmuri ñnarãre —ñnare yicami Jesús.

Jerusalén macanare ñna bajirotire Jesús ï tuoĩasutiritire queti

(Lc 13.34-35)

³⁷ Jerusalén macanare ñre ñna sãarocarõ bero ñna bajirotire tuoĩacõari, ado bajiro yicami Jesús:

—Jerusalén macana, Diore gotirêtobosamasiriarãre sãamasiriarã jãnerabatia ñacõama ñna. Dios ï cõamasiriarãre, ï ocare gotimasiõimasare gũtane ñnare reasãamasiriarã jãnerabatia ñaama. Cojõji me gãjaboco so querũjũ eñeroca so rĩare so juarẽorore bajiro ñnare yirũaboacajũ yɯ, ñnare coderũ. To bajiro yɯ yirũaboajaquẽne, ñnajũa yũre bojabeticama. ³⁸To bajiri jẽre, “Ñna ñnarijũre codetũjacõaja yɯ yuja”, yituoĩami Dios. ³⁹Riojo gotiaja yɯ: “¡Rotimõorũgõrũcũmi’ yigũ, Dios ï cõar’i vadiami! ¡Quẽnase ñre yivariquẽnato mani! ¡Diore rotibosagũ ï ñajare, ñre quẽnaro yato Dios!” yũre ñna yiroto rĩjoro, quẽna jũaji yũre ñbetiruarãma ñna —ñnare yituoĩa ñagõcami Jesús, Jerusalén macanare.

24

“Diore yirũcũbuoriavire jud’io masa me ñnarã caguerocacõaruarãma”, Jesús ï yire queti

(Mr 13.1-2; Lc 21.5-6)

¹ Diore yirũcũbuoriavijũ ñnacõari, budiacami Jesús. Ñre eñmũcõari, ado bajiro ñre yicajũ yɯa:

—Adi vire ñaña mɯ —ñre yicajũ yɯa.

² To bajiro yɯa yirone, ado bajiro yũare yicami Jesús:

—¿Adi vire quẽnaro ñati mɯa? Mɯa ñarivi ti bajirotire riojo mɯare gotigũagũ yaja yɯ. Adi vi mɯa ñarivi ñnaro

cõrone cagueroca ecoruaroja. To bajiri adi viaye gajea gũta joere, gajea jesabeticõaruaroja —yũare yicami Jesús.

“Macarucuro ti jediroto rĩjoro ado bajiro bajiruaroja”, Jesús ã yire queti

(Mr 13.3-23; Lc 21.7-24; 17.22-24)

³ Tijũ bero, Olivo vãme cãti buro joejũ rujicami Jesús. To ã rujirone, gãjerã ãna mano ãcõari, ado bajiro ãre sãnĩacajũ yũa:

—¿Divato cagueroca ecoroti Diore yirũcũbũoriavi? ¿No bajiro ti bajisere ãcõari, “Jesús e jaguagu yigũmi”, yimasirãti yũa? ¿No bajiro ti bajiro ãcõari, “Adi macarucuro jediato yaja”, yimasirãti yũa? —Jesũre yisãnĩacajũ yũa.

⁴ To bajiro yũa yisere ajicõari, ado bajiro yũare cũdicami Jesús:

—Roori ñaruarãja mũa, “Socarãne, gãjerã manire yitoroma” yirã. ⁵ Jãjarã yitorã ñaruarãma, “Yũne ñaja ‘Rotimũorũgõrucũmi’ yigũ, Dios ã cõagũ” yirã. To bajiro ãna yisocasere jãjarã masa ãnare ajisuyaboaruarãma. ⁶ Mũa tũana, to yicõari, gajeroana quẽne gãjerã rãca ãna gãmerã sãsere ajiruarãja mũa. Tire ajicõari, gãibetiruarãja mũa. “Bajiruaroja” Dios ã yiriarore bajirone bajiruaroja. To bajiro ãna gãmerã yĩnaboajaquẽne, adi macarucuro jediro me bajiruaroja. ⁷ Cojo sitana gaje sitana rãca gãmerã sãruarãma. Cojo maca me ñioñaruaroja. To yicõari bũto sita saberuaroja. ⁸ To bajiri, rojose tãmuosũoruarãma masa. ãna tãmuose rõtobusaro rojose tãmuoroana yirãma yuja.

⁹ Tirodori, gãjerã, mũare ñejecõari, ãsirearuarãma, gãjerãre, “ ‘Rojorã ñaama’ yĩacõari, rojose ãnare yato” yirã. To bajiri, gãjerãjũa, rojose mũare yigajanocõari, mũare sãruarãma. Yũre ajitirũnurã mũa ñajare, mũare ãteruarãma adi macarucuroana jediro. ¹⁰ To bajicõari,

jājarā yure ajitirūnūrā, ajitirūnu tujaruarāma ĩna. To yicōari, yure ajitirūnūrā, sīgūri, gāmerā ĩateruarāma. Gājerā, ĩna rācanare ĩatecōari, ĩsirearuarāma ĩna. ¹¹ “Diore gotirētosarimasa űaja yua” yitorā, jājarā űaruarāma. To bajiro ĩna yisocasere jājarā masa ĩnare ajisuyaboaruarāma. ¹² Butobusa rojose rīne yirūtu vare ti űajare, gāmerā maire quēne manibusacoaruaroja. ¹³ To bajiro ti bajiboajaquēne yure ajitirūnu tujamenare, adi macarucuro ti jediroju, rojose tāmnotujabetiriaroju ĩna vaborotire ĩnare yirētosarucumi Dios. ¹⁴ “Ŭju Dios yarā quēnaro ĩ yirona mua űaruarāma, Jesúre ajitirūnuña” yire queti, adi macarucuro űarā masa űaro cōrone gotimasiojeo ecoruarāma. ĩna masijedicōaro beroju adi macarucuro jediruaroja.

¹⁵ Diore gotirētosarimasu Daniel űamasir'i ado bajiro ucamasiñumi: “Adi macarucuro jedirirodo sīgū, ‘Diore rūcububeticōato ĩna’ yigu, Dios ĩ bojabetire yirucumi. Diore yirūcububoriaviju ĩ űasere masiruarāja mua”, yucamasiñumi Daniel űamasir'i. (Ŭu, Mateo, adi papa Daniel ĩ ucamasirere Jesús ĩ gotisere yu ucasere ĩacōari, ajimasiña.) To bajiri Dios ĩ bojabetire ĩ yisere ĩacōari, “Jerusalén maca ti jedirotirūmu cōñaro bajiaja”, yimasiruarāja mua. ¹⁶ To bajiro bajirirūmu Judea sitana gūtayucuju guaro rudicoajaro ĩna. ¹⁷ Sīgū ĩ ya vi joeju jesaguma, rujiacōari, ĩ ya vi jubeaju gajeyeūni űasere juatīmabetirucumi. ¹⁸ Gāji, veseju moañagū, ĩ ye sudire juagu tudiatīmabetirucumi, rujarīmarone yu ejaroti ti űajare. ¹⁹ Rōmia macu sāñarā, űjurā cūrā quēne, rojose tāmnotuarāma ĩna, űmatīmabetica yirā. ²⁰ “Buto oco quedirirūmure, to yicōari, usūsajariarūmure bajibeticōato” yirā, Diore sēnicōa űarūgūña. ²¹ To bajiro bajirirūmuri buto rojose tāmnotuarāma masa. Adi macarucuro űasuruarūmuri masa rojose ĩna tāmnotuarāma

rêtoro tãmuoruarãma ñna. Rojose ñna tãmuoro bero, to bajise rojose tãmuobetiruarãma yuja. ²²“Yoaro mebusane rojose tãmuoato masa” Dios í yibetijama, sîgũ catiruarocũ manibogũmi. “Yũ yarã ñaña mua” í yirere cãdiriarãre ñamaigũ ñari, “Yoaro mebusane rojose tãmuoato ñna”, yirũcũmi Dios.

²³ To bajiro bajinãriodorire, “Ãnine ñaami ‘Rotimũorũgõrũcũmi’ yigũ, Dios í cõar’i. Ejayumi” gãjerã ñna yijama, ñnare ajibeja mua. To yicõari, gãjerãjuama, “Tone ñagũmi. Ejayuju” mũare ñna yijaquẽne, ñnare ajibeja mua. ²⁴ Jãjarã yitorã ñaruarãma, “Yũne ñaja ‘Rotimũorũgõrũcũmi’ yigũ, Dios í cõagũ” yirã, to yicõari, “Diore gotirẽtobosarimasa ñaja yua” yirã. To bajiro yirã, ñaiañamani jairo yĩoruarãma, masare yitorã. To bajiro yiruarãma, “Yũ yarã ñaña mua’ Dios í yirere cãdirã quẽne, manijuare ajitirũnuato” yirã. ²⁵ Tire mũare yũ gotimasiosere quẽnaro tuoña mua. Ti bajiroto rĩjoro jediro mũare gotijeobũ yũ. ²⁶ To bajiri, “Yucũ manojũ ñagũmi, ‘Rotimũorũgõrũcũmi’ yigũ, Dios í cõar’i” mũare ñna yijama, ñarã vabetiruarãja mua. To yicõari, “Vi jubeaju yayiorojũ ñagũmi, ‘Rotimũorũgõrũcũja mũ’ yigũ, Dios í cõar’i” ñna yijama, ñnare ajitirũnubetiruarãja mua. ²⁷ Macarũcũro jediro bũjo í yabesere masa ñna ñarore bajiro Dios í roticõacacũ, yũ vadore yũre ñare ñaruarõja. ²⁸ Rijar’i, í boacũñarõrema, yuca ejarãma ñna —yũare yicami Jesús. í

“Dios í roticõacacũ tudiejarũcũja yũ”, Jesús í yire queti
(Mr 13.24-37; Lc 21.25-33; 17.26-30, 34-36)

²⁹ To yicõari, quẽna ado bajiro yũare yicami Jesús:

í **24:28** “Yuca ejarãma, mastũ boagu í ñarore” í yijama, “Rojose yirãma, no bojarone ñacõarãma” yigũ yiyuju Jesús.

—Tire rojose ñna tãtũo gajanorijaũne, gaje vãme rojose bajirũaroja. Muiju ãtũagũ asibetirũcũmi yuja. Ñamiagũ quẽne busubetirũcũmi. Ñocõa quẽne vẽjacoarũarãma. To yicõari, õ vecayere nũrũobatorũcũmi Dios. ³⁰ To bajiro ti bajiro ñacõari, “Õ vecagũ Dios ñ roticõagũ rujiadiguagũ yigũmi”, yũre yirũarãma masa. Yũ rujiadire ñacõari, gũirã, otirũarãma. Yũ masise rãca, oco bueri vatoajũ bũto yũ busubatorujiadire ñarũarãma. ³¹ Õ vecajũ trompeta jutise ocaruyurũaroja. To cõrone, “ ‘Yũ yarã ñãña’ Dios ñ yirere cũdiriarãre jũdoaga soje, jũnaga soje, varuaga soje, gajejacatua varuaga soje ñarã jedirore juarẽoato” yigũ, ángel mesare cõarũcũja yũ. To yũ yijare, yũ yarã ñaro cõrone juarẽorũarãma ñna —yũare yicami Jesús.

³² To yicõari, quẽna ado bajiro yũare goticami Jesús:

—Gotimasiore queti mũare gotigũ yaja yũ. Higuera vãme cutiure tũoĩaña mũa. Higuera vãme cutiu gajecu bũcũamũjacõari, jũ mameaja. Tire ñacõari, “Mojoroaca rũyaja cũma ti ejaroti”, yimasijaja mani, jud'io masa. ³³ Mũare yũ gotisere bajiro bajisere ñacõari, “Mojoroaca rũyaja Jesús ñ vadiroti”, yimasirũarãja mũa. ³⁴ Riojo mũare gotiaja yũ. Adirodo ñarã mũa bajireajediroto rĩjoro, mũare yũ gotirore bajirone bajirũaroja ti. J ³⁵ Adi macarũcũro ñaro cõrone, to yicõari, õ vecaye quẽne jedicoarũaroja. To bajiboarine, yũ ocama, jedibeti mũorũgõcõarũaroja.

³⁶ “Ado cõrone ejarũcũmi Jesús” yimasigũ magũmi. Ángel mesa quẽne, masimenama ñna. Dios macũ ñaboarine, “To cõro ejarũcũja yũ”, yimasibeaja yũ quẽne. Yũ jacũ sũgũne masigũmi —yũare yicami Jesús.

³⁷ Quẽna ado bajiro yũare gotirẽmocami Jesús:

J **24:34** Griego masa ye rãca “esta raza” yiroma, judío mesare yiro yaja. To bajicõari, “esta generación” ti yijama, adirodo ñarãre yiro yaja.

—Noé ñamasir'i ĩ ñariarodo masa ĩna bajiñamasiri-
arore bajiro bajiaruarãma, Dios ĩ roticõacacu, yu tudie-
jarirũmure quẽne. ³⁸ Adi macarucuro ti rujaroto rĩjoro,
bare ba, idi, manajo cuti, yicõa ñamasiñujarã ĩna. Diore
tuoĩari mene, “¿To bajiroado yatique?” yimenane, jairica
cũmua quẽnogajanocõari, Noé ĩ vasãjaro ũnone to bajiro
yicõa ñamasiñujarã ĩna. ³⁹ “To bajiroado yiroja” ĩna
yimasibetone, ĩnare ruureacõamasiñuju Dios. To bajirone
bajiaruarãma masa, yu tudiejarirũmure quẽne. ⁴⁰ Yu
ejarirũmu juarã ũmua ĩna veseju moañaruarãma. To ĩna
yiñarone, sigũ amiecorucumi. Gãjima, amiecobetirucumi.
⁴¹ Rõmia juarã trigore vãiañaruarãma. To bajiri, sigõ
amiecorucocomo. Gajeoma, amiecobetirucocomo.

⁴² To bajiro bajiroti ti ñajare, roori ñaruarãja mua,
“To cõrone tudiejarucumi mani ujũ” yure yimasimena
ñari. ⁴³ Sigũ vi ujũ, “Adi ñami juarudirimasu ejarucumi”
ĩ yimasijama, roori ñabogumi, ĩre mataru. ⁴⁴ To bajiri,
“Dios ĩ roticõagũ ĩ tudiejarotire mani masibetirĩmarone
tudiejaromi” yirã, roori ñarũgũruarãja mua —yure yi-
cami Jesús.

“Ado bajiro bajigumi yu tudiejarotire roori ñagũma”,
Jesús ĩ yire queti

(Lc 12.41-48)

⁴⁵ Quẽna ado bajiro yure gotirẽmocami Jesús:

—Ado bajiro bajirucumi yure quẽnaro ajitirũnu tu-
jabecu, quẽnaro tuoĩagũ: Uju, gajeroju ñaguacu, ĩ varoto
rĩjoro, “Yu ya vianare yure codebosaba” yigu, ĩre moa-
bosarimasure ĩ cũ var'ire bajiro bajigu ñagũmi. ⁴⁶ ĩ ujũ,
ĩ rotivariarore bajirone ĩ moayurere tudiejacõari, ĩ ñaeja-
jama, quẽnaro ĩre yigumi, ĩre moabosarimasure. ⁴⁷ Riojo
mũare gotiaja yu. Uju ĩ bojarore bajirone ĩ yire ti ñajare,
ĩ caose jedirorene ĩre ĩatirũnu rotigumi. ⁴⁸⁻⁴⁹ Ado bajiro

bajirucumi yure quënarō ajitirũnũbecuma: Rojose yigũ ï ñajama, ẽjũ, ï vato bero, “Yoatojũ tudiejagumi” yitũoĩagũ ñari, ï ẽjũ moabosarimasare rojose yigumi. To yicõari, idimecũrũgũrãre baba cuticõari, ïna rãca idirũgũgũmi ï quëne. ⁵⁰To ï yĩnarone, ï ẽjũ, tudiejagumi. ⁵¹Tudiejacõari, ï rotiriarore bajiro ï yibetire ti ñajare, rojose ïre yigumi. To bajiri “Quënarō yirã ñaja yua” yiboarine, ïna yirore bajiro yimena rojose ïna tãmũorore bajirone tãmũogũmi. Bũto rojose tãmũogũ ñari, guji põguë, oti, yigumi —yũare yicami Jesús.

25

“*Ado bajiro bajirũarãma* Dios yarãma. To yicõari, ï yarã me ñarãma ado bajirojũa bajirũarãma”, Jesús ï yire queti

¹Quëna ado bajiro yũare yicami Jesús:

—Ujũ Dios yarã ñaronama, quënarō ï yironama, to yicõari, ï yarã me ñaronajũama, ado bajiro bajirãre bajiro bajirũarãma: Mamarã rõmiri juaãmocãrãco ñarãma, mame manajo cutirocũre ïre bocarã vana. To vana, ïna sĩabusuore juaánama. ²Cojomocãrãco ñarãma quënarō tũoĩarã. To yicõari, cojomocãrãco quënarō tũoĩamena ñarãma. ³Quënarō tũoĩamenama ïna sĩabusuorere juarã ñaboarine, ỹe ti jediro, ïna jiovasoaborotire juaámenama. ⁴Quënarō tũoĩarãjũama, “Ti jediro jiorãsa mani” yirã, juaánama. ⁵Manajo cutirocũ ï ejatĩmabetijare, yoaro yubũsaboã, cãnicoanama. ⁶Ïna cãniñarone, ñami gũdareco cõñarō cõro ocaruyuroja yuja: “Manajo cutirocũ vadicoadiami yuja. Ïre bocarã vayá”, yĩ ocaruyuroja. ⁷Tire ajicõari, ïna sĩabusuore sĩarãma. ⁸Cojomocãrãco ñarã quënarō tũoĩamenajũa, ado bajiro yirãma quënarō tũoĩarãjũare: “Yua sĩabusuore ỹe jedicoajũ ti. To bajiri mũa ỹe mojoroaca yũare ïsiña”, yiboarãma ïna. ⁹To bajiro ïna yiboajaquëne, ado bajiro cũdirãma quënarō

tuořarā: “İsibeaja. Mũa masune ıye İsirimasa tujũ vacõari, vaja yiaya. Mũare yũa İsjama, manire tıjabeti-boroja”, İnare yirāma. ¹⁰ To bajiro İna yisere ajicõari, ıye vaja yirā vacoanama quẽnaro tuořamenajũa. İna vato bero, manajo cutirocũ ejagũmi yuja. Quẽnaro ñayuriarā rõmirima, İ ejarone, İ rāca sājacoanama İna, İ āmosiaro İarā. Sājacõari, sojere tucõagũmi manajo cutirocũjũa. ¹¹ Soje İ turiaro bero, ejaboarāma quẽnaro tuořamena. Sājamasiemenama. To bajiri, manajo cutirocũre ado bajiro İre yiboarāma: “Yũa ıjũ, soje jānaña maji”, İre yiboarāma. ¹² To İna yisere ajicõari, ado bajiro İnare cudigũmi manajo cutirocũ: “Riojo mũare gotiaja yũ. Yũ yarā me ñaja mũa. Mũare masibeaja yũ”, İnare yigũmi manajo cutirocũ — yũare yicami Jesús.

¹³ —To bajiri roori ñarũgũrũarāja mũa, “To cõrone tudiejarucũmi” yũre yimasimena ñari —yũare yicami Jesús.

*Moabosarimasa İna bajirere Jesús İ gotimasiore queti
(Lc 19.11-27)*

¹⁴ Quẽna ado bajiro yũare yicami Jesús:

—Quẽna yũ tudiejaro, “Ñajediro ıjũ ñaja yũ” yĩocõari, yũ yarā yũre ajitirũnrā İna yisere masicõari, moabosarimasa ıjũ ado bajiro İ yiriarore bajiro bajirũaroja: Sĩgũ ñagũmi gaje sitajũ varocũ. İ varoto rĩjoro, İre moabosarimasare jirẽogũmi. İnare jirẽocõari, İ ye gājoare İnare bategũmi. “Yũ manitoyejũ adi gājoa rāca vaja yicõari, mũa vaja yisere gājerāre İsirā, jaibusaro vaja sẽnima, ‘Jaibusaro gājoa bujarāsa’ yirā”, İnare yigũmi.

¹⁵ To bajiri, sĩgũre cinco mil ñaritiiri gājoatiire İre İsigũmi. Gājire, dos mil ñaritiiri İsigũmi. To yicõari, gājirema, mil ñaritiiri İsigũmi. İnare İsigajanocõari, vacocũmi. ¹⁶ ıjũ İ vato bero, cinco mil ñaritiiri İsiecor’i,

quēna cinco mil ñaritiiri bujarēmogūmi. ¹⁷ Gāji dos mil ñaritiiri ĩsiecor'i, quēna dos mil ñaritiiri bujarēmogūmi. ¹⁸ Gāji, mil ñaritiiri ĩsiecor'ima, ĩ ĩsiecoriaro cōrone yu-jecūcōagūmi.

¹⁹ Yoatoju ɯju tudiejagumi quēna. Tudiejacōari, “Gājoa ĩnare yu ĩsicati rāca, ¿no bajiro yure yibosayujari ĩna?” yisēniīaru, ĩnare jigumi quēna. ²⁰ Cinco mil ñaritiiri ĩ ĩsir'ire jisuoğumi. To ĩ yigu, ejacōari, ĩre ĩ ĩsiriaro cōro tuoğumi. To yicōari, cinco mil ĩ bujarēmorerere ĩre ĩsigūmi. To yigune, ado bajiro gotigumi: “Cinco mil ñaritiiri yure ĩsicaju mɯ. To bajiri quēna gaje cinco mil ñaritiiri mure bujarēmobosabu yu”, ĩ ɯjure ĩre yigumi. ²¹ To ĩ yijare, ado bajiro ĩre cūdigumi ĩ ɯju: “Yure quēnaro moabosayuja mɯ. Yu roticatore bajirone yure cūdiyuja mɯ. Mojoroaca mure yu ĩsicati rāca yu roticatore bajiro mɯ yire ti ñajare, ñamasuse yure yibosarucuja mɯ. Yu rāca variquēnaña”, ĩre yigumi. ²² To ĩ yiro bero, gāji, dos mil ñaritiiri ĩsiecor'i ejagumi. Ejacōari, ĩre ĩ ĩsiriaro cōro tuoğumi ĩ quēne. To yicōari, gaje dos mil ñaritiiri ĩ bujarēmorerere ĩsigūmi. To yigune, ado bajiro gotigumi: “Dos mil ñaritiiri yure ĩsicaju mɯ. To bajiri quēna gaje dos mil ñaritiiri mure bujarēmobosabu yu”, ĩ ɯjure ĩre yigumi. ²³ To ĩ yijare, ado bajiro ĩre cūdigumi ĩ ɯju: “Yure quēnaro moabosayuja mɯ. Yu roticatore bajirone yure cūdiyuja mɯ. Mojoroaca mure yu ĩsicati rāca yu roticatore bajiro mɯ yire ti ñajare, ñamasuse yure yibosarucuja mɯ. Yu rāca variquēnaña”, ĩre yigumi.

²⁴⁻²⁵ ĩ bero ĩ ɯjure ĩogū ejagumi mil ñaritiiri ĩsiecor'i: “Yu ɯju, adine ñaja mɯ gājoa, yure mɯ ĩsicati. Tire yujecūcōacaju yu, mure gūigu ñari, ‘Ti suorine yure tud'ljacagumi; buro roticōari ĩ bojarore bajiro yirere bo-jagu ñacami’ yituoīagū ñari”, ĩre yigumi. ²⁶ To bajiro ĩ yijare, ado bajiro ĩre cūdigumi ĩ ɯju: “Yu bojasere

yitegu bajiyuja mu. Rojogu ñaja mu. ‘Tud'ijacagumi; buto roticōari ī bojarore bajiro yirere bojagu ñacami’ yure yituoīagū ñaboarine, quēnaro yure moabosabesuja mu. ²⁷ Gājoa mure yu īsicati rāca vaja yicōari, mu vaja yisere gājerāre īsicōari, jaibusaro vaja sēnibetiboarine, gājoa cūriavijua mu cūjama, jaibusaro yure bujarēmo-bosaboriaja mu”, ĩre yitud'igumi ī uju. ²⁸ To bajiro ĩre yigajanocōari, gājerāre ado bajiro rotigumi: “Ānire gājoa yu īsiboacatire ēmaña. Tire ēmacōari, diez mil ñaritiiri yure īsigūjuare īsiña”, ĩnare yigumi ĩna uju. ²⁹ To yicōari, ado bajise ĩnare gotirēmogumi: “No bojagu ĩre yu īsise rāca yu bojarore bajiro yigu, quēnase bujarucumi. Ñiejua ruyabetiruaroja ĩre. No bojagu ĩre yu īsise rāca yu bojarore bajiro yibecurema, ĩre yu īsiboacatire ĩre ēmarucuja yu, ‘Yu bojarore bajiro yimasibeami’ yigu. To yicōari, ĩre yu ēmasere gāji yu bojarore bajiro yigūjuare īsirucuja yu. ³⁰ Āni yure moabosarimasu ñie vaja magūre, rētiaroju ĩre rocacōaña mua. Toju ñacōari, buto rojose tāmogū ñari, guji pōguē, oti, yirucumi”, yigumi ĩna uju —yure yigoticami Jesús.

Adi macarucuro ñarāre, masare ī beserotire Jesús ī gotire queti

³¹ Ado bajiro yure goticami Jesús quēna:

—Dios ī roticōacacu yu tudiejaru, yu rāca ejaruarāma ángel mesa. Ejacōari, masare rotiguagu, rucubuari-aju rujirucuja yu. ³² To bajicōari, “Adi macarucuroana masa ñajediro yu rījorojua ejato” yigu, ángel mesare juaárotirucuja yu. To bajiro ĩna yiejoro bero, yu yarāre, yu yarā mere quēne ĩamasicōari, ricati ĩnare cūrucuja yu. Oveja coderimasu, ovejare ricati, cabrare ricati ī cūrore bajiro ĩnare yirucuja yu. ³³ Yu yarāre yu riojojacatua cūrucuja. To yicōari, yu yarā mere yu gācojacetua cūrucuja. ³⁴ To bajiri yu riojojacetuanare ado bajiro ĩnare

yirucija yu: “Yu jacu quēnaro ĩ yirā ñaja mua. To bajiri ĩ rāca ĩ ye quēnasere bujaruarāja mua yuja. ‘To bajiro bajiruarāma’ mware yituoĩacōari, quēnobosacami, adi macarucuro rujeogu. ³⁵ Yu ñiorijaro, yure bare ecacaju mua. Yu idiruaro, yure iocaju mua. Gajeroagu mua masibecu yu ñaboajaquēne, quēnaro yure bocaāmicaju mua. ³⁶ Yu sudi mano, yure sudi sācaju mua. Yu rijaro, yure ĩarā ejacaju mua. Tubiberiavi yu ñaro, yure ĩarā ejacaju mua”, yirucija yu, yu yarāre. ³⁷ To bajiro yu yisere ajicōari, ado bajiro yure sēniĩaruarāma ĩna: “Yua uju, ¿Divato mu ñiorijasere ĩacōari, mure bare ecacati yua? ¿Divato mu idiruaro mure iocati yua? ³⁸ ¿Divato gajeroagu yua masibecu mu ñaboajaquēne, quēnaro mure bocaāmicati yua? To yicōari, ¿divato mu sudi mano, mure sudi sācati yua? ³⁹ To yicōari, ¿divato mu tubibe ecoro, mu rijarore quēne, mure ĩarā ejacati yua?”, yure yisēniĩaruarāma ĩna. ⁴⁰ To bajiro ĩna yisere ajicōari, ado bajiro ĩnare cudirucija yu: “Riojo mware gotiaja yu. Yu yarāre, ‘Ñamasurā me ñaama’ ĩnare yiboarine, quēnaro ĩnare mua yijama, yurene quēnaro yirā yicaju mua”, ĩnare yirucija yu, yu yarāre, yu riojojacatuajua ñarāre.

⁴¹ To yicōari, yu gācojacaduajua ñarārema ado bajiro yirucija yu: “Yure cāmotadiya mua. ‘Rojose tāmurouarāma’ Dios ĩ yirā ñaja mua. ‘Jeame yatibetimeju, rojose tāmurouarāma vātia, ĩna uju rāca’ Dios ĩ yirujeocatijuju vasa mua. ⁴² Yu ñiorijaro yure bare ecabeticaju mua. Yu idiruaro yure iobeticaju mua. ⁴³ Gajeroagu mua masibecu yu ñajare, yure bocaāmibeticaju mua. Yu sudi mano, yure sudi sābeticaju mua. Yu rijaro quēne, tubiberiavi yu ñaro quēne, yure ĩarā ejabeticaju mua”, ĩnare yirucija yu, yu gācojacaduanare. ⁴⁴ To bajiro ĩnare yu yirone, ado bajiro yure sēniĩaruarāma ĩna: “¿Divato mu ñiorijaro mure ecabeticati yua? ¿Divato mu idiruaro,

mure iobeticati yua? ¿Divato gajeroagu yua masibecu mu ñajare, mure bocaãmibeticati yua? ¿Mu sudi mano, mure sudi sãbeticati yua? ¿Divato mu tubibe ecoro, mu rijarore quëne, mure ñarã ejabeticati yua?”, yure yisëniïaruarãma ñna. ⁴⁵ To bajiro ñna yisere ajicõari, ado bajiro ñnare cudirucuja yu: “Riojo mure gotiaja yu. Ñnoa yu riojojacatuana yu yarãre, ‘Ñamasurã me ñaama’ ñnare yiboarine, quënarõ ñnare mua yibetijama, yurene quënarõ yimena bajicaju mua”, ñnare yicudirucuja yu, yu gãco-jacatuana. ⁴⁶ To bajiro ñnare yigajanocõari, rojose ñna tãmuotujabetirotoju ñnare reacõarucuja yu. To yicõari, yu yarãjuama, quënarõ ñna ñacõa ñarotoju varuarãma — yure yicami Jesús.

26

“¿No bajiro yigu ñaami yitocõari, Jesúre ñre ñiarãti mani, ñre sïaruarã?”, ñna yire queti

(Mr 14.1-2; Lc 22.1-2; Jn 11.45-53)

¹ To bajiro gotigajanocõari, ñ buerimasare ado bajiro yure yicami Jesús:

² —Juarũmu berone ñaroadõ yaja Pascua boserũmu ñasurorũmu. Tirũmune yure Dios ñ roticõacacure masare ñsirocarucumi sïgũ. To bajiri yure ñiacõari, yucútëroju jajusïaruarãma ñna —yure yicami Jesús.

³ Tirũmuri paia ujũ ñamasugũ Caifás vãme cutigu ya vijũ rëjacõari, tuoïañañujarã bucãrã, paia ujarã quëne:

⁴ —Jesúre sïaruarã, ¿no bajiro yigu ñaami yitocõari, ñiarotirãti mani? ⁵ To bajiboarine, boserũmu ñaro ñre mani sïajama, tire ñajũnisinicõari, manire rojose yiborãma masa —gãmerã yïñagõñujarã ñna.

Jesús rujoare sutiquënasene rõmio so yuejeore queti
(Mr 14.3-9; Jn 12.1-8)

⁶ Betania vāme cuti macaju cāmi boacacu, Simón vāme cutigu ya viju ñacaju yua, Jesúrāca. ⁷ Ti viju Jesús ĩ baru-jirone, sīgō, gūta sotu alabastro vāme cuti rāca veariaru āmiejacamo. Sutiquēnase buto vaja cutise, nardo vāme cutise sãnaritu ñacaju tiru, so āmiritu. To bajiri Jesús tuaca eja, ĩ rujoa joere ĩre yuejeocamo so. ⁸ To bajiro so yisere ĩacōari, jūnisinicaju yua ĩ buerimasa. To bajiri, ado bajiro gāmerã yicaju yua:

—¡Jairo gãjoa yireago yamo! ⁹ Tire ĩsicōari, jairo gãjoa bujacōari, maioro bajirãre ejarēmoroti ñaboaja ti — gāmerã yicaju yua.

¹⁰ To bajiro yua yisere ajicōari, ado bajiro yuare yicami Jesús:

—Sore gōjanabiobesa mua. Tire yure so yuejeojama, quēnaro yure yigo yamo. ¹¹ Maioro bajirã mua rāca ñacōa ñarūgūruarāma, mua ejarēmorona. Yuma, mua rāca ñacōa ñabetirucuja. ¹² Adio sutiquēnase yure so yuejeojama, yure ĩna yujeroto rĳoro yuejeo rĳoro cutigo yamo. ¹³ Riojo muare gotiaja yu. Yu bajiroti quēnase quetire, adi macarucuroana jedirore gotibatoruarāma masa. To bajirone bajiruaroja sutiquēnase yure so yuejeose queti quēne. So yuejeosere masiritimenane tire gotibatoruarāma —yuare yigoticami Jesús.

“Jesúre ñiato” yigu, ĩre ĩaterã taju Judas ĩ gotirudigu vare queti

(Mr 14.10-11; Lc 22.3-6)

¹⁴ Jesús buerimasa juãmo cōro, gubo juã jēnitarirācu ñacaju yua. To bajiri yua rācagune Judas Iscariote vāme cutigu, paia ujarãre ñagōgū varimi. ¹⁵ ĩna taju ejacōari, ado bajiro ĩnare sēniãñuju ĩ:

—¿No cōro jairo yure vaja yirãda mua, “Jesúre ñiato” yigu, muare yu gotijama? —ĩnare yisēniãñuju.

To ï yisēniñase ñajare, treinta ñaritiiri gãjoa ïre ïsiñujarã ïna. ¹⁶ To bajiro ïna gãmerã yiriario bero, “¿Dirĩmaro ũno Jesúre ïnare ñiarotigati yu?”, yituoĩacõa ñañuju ï.

Jesús ï batúsare queti

(Mr 14.12-25; Lc 22.7-23; Jn 13.21-30; 1 Co 11.23-26)

¹⁷ Pascua boserũmu pan ũmato vauvase vuoyamani basuoriarũmu ejacaju ti. To bajiri Jesús buerimasa, ado bajiro ïre sēniñacaju yua:

—Pascua boserũmu ñajare, mani barotire, ¿noju bare yua quēnoyusere bojati mu? —ïre yisēniñacaju yua.

¹⁸ —Jerusalénju vasa mua. Toju ejacõari, ado bajiro ïre yiba, vi ujure: “Manire gotimasiiorimasu ado bajiro mure yicõami: ‘Mojoroaca ruyaja, Dios ï bojarore bajiro yu yijeoroti. To bajiri, ï ya vijũ adi ñami Pascua boserũmu ti ñajare, yu buerimasare ũmato bagu varucuja’ mure yicõami”, ïre yigotiba mua —ïnare yicami Jesús.

¹⁹ “To bajiro yiba mua” Jesús ï yicatore bajirone yiyuma ïna. To bajiri, Pascua boserũmu yua barotire quēnoyuyuma ïna.

²⁰ Ti ñami ï buerimasa juaãmo cõro, gũbo juã jēnitarirãcu ñarã barujicaju yua, Jesúrãca. ²¹ Yua bañarone, ado bajiro yuare yicami Jesús:

—Riojo muare gotiaja yu. Sīgũ mua rãcagu, yure ïaterãre yure ïsirocarucumi —yuare yicami Jesús.

²² To ï yisere ajicõari, buto sutiriticaju yua. Tocãrãcune sutiritirã ñari, ado bajiro ïre sēniñacaju yua:

—¿Yu ujũ, yune ñabetiboati, mure ïsirocarocu? —ïre yisēniñacaju yua.

²³ To bajiro yua yisere ajicõari, ado bajiro yuare cudicami Jesús:

—Sīgũ, yu rãca yosebagu ñaami yure ïsirocarocuma.

²⁴ Dios oca masa ïna ucamasire ti gotirore bajiro rojose tãmuogucuja yu, Dios ï roticõacacu. To bajirocu

yә ñajare, yәre ãaterãre yәre ãsirocарucәmi. Yәre ã gotiyirose sәorine rojose tãmәorucәja yә. “Masare yirē-tobosarucәmi” Dios ã yimasire ti ñajare, bajirucәja yә. To bajiboarine, yәre gotiyiror'ijәama, rojose tãmәorucәmi. Ruyuabeticõarocә ñaboayumi —yәare yicami Jesús.

²⁵ To ã yirone, Judas, Jesúre ãsirocарocә, socәne ado bajiro Jesúre ãre sәniãatocami:

—Gotimasiorimasә, ¿yәne ñabetiboati, mәre ãsirocарocә? —ãre yisәniãacami.

To ã yirone, ado bajiro ãre cәdicami Jesús:

—Riojo yaja mә —ãre yicami Jesús.

²⁶ Yәa bañarone, pan ãmicõari, “Quәnaja”, Diore ãre yicami Jesús. To yigajano, tire mәtocõari, ã buerimasare yәare ãsibatogәne, ado bajiro yәare yicami:

—Baya mәa. Ti ñaja yә rujә rii —yәare yicami.

²⁷ Tire yәa bagajanorone, idiriabaja ãmicõari, “Quәnaro yaja mә”, Diore yicami quәna. To yicõari, tibaja yәare ãsigәne, ado bajiro yicami:

—Mәa jediro adire idiya. ²⁸ Adi ñaja tirũmәana “Rojose mani yirere masirioato” yirã, Diore rүcәbәorijә joere ãna yuejeoriarore bajiro bajise. Yүcәrema, yә ri'i ñaja. Ti sәorine, “Gajerodo to bajiro mәare yirucәja yә” Dios ã yicүmasiriarore bajiro bajirәaroja. To bajicõari, jãjarã masa rojose ãna yisere masiriocõari, tuditәoãbetirucәmi Dios. k ²⁹ Riojo mәare gotiaja yә. “Rotimәorүgõrucәmi” yigә, yә jacә yәre ã cүroto rїjoro, quәna jәajı ңye oco idibetirucәja yә —yәare yicami Jesús.

“*Jesúre masibeaja yә*’ yirucәja mә”, Pedrore Jesús ã yire queti

(*Mr 14.26-31; Lc 22.31-34; Jn 13.36-38*)

k ^{26:28} “Yә bojarore bajiro mәa yijama, quәnaro mәare yirucәja yә” masare Dios ã yicүmasire yirәaro yaja pacto ti yijama.

³⁰ To ĩ yiro bero, Diore rŭcubŭorã basacaju yua. Basagajano, Olivo vãme cuti buroju vacoacaju yuja. ³¹ To yua vatone, ado bajiro yuare yicami Jesús:

—Adi ñamine yure ajitirũnu tujacõari, vaveoruarãja mua jediro. Dios oca masa ñna ucamasire to bajiro ti gotijare, to bajise muare yaja yu. Ado bajiro gotiaja ti: “Oveja coderimasire bajiro bajigure sŭarucuja yu. To bajiri ĩ yarã ovejare bajiro bajirã rudibatecoaruarãma”, yigotiaja Dios oca masa ñna ucamasire, manire gotiro.

³² Yure mua vaveoboajaquẽne, yure ñna sŭaro bero, quẽna tudicaticõari, Galilea sitaju mua vato, yujua mua rŭjoro ñatujarucuja —yuare yicami Jesús.

³³ To ĩ yisere ajicõari, ado bajiro ĩre yicami Pedro:

—Ñnoa jediro, mure ñna vaveoboajaquẽne, mure vaveobetirucuja yuma —Jesúre ĩre yicami.

³⁴ To ĩ yisere ajicõari, ado bajiro ĩre cudicami Jesús:

—Riojo mure gotiaja yu. Adi ñami busiyujua gãjabocu ĩ ñagõroto rŭjoro, idiaji, “Jesúre masibeaja; ĩ rãcagu me ñaja yu”, yisocarucuja mu —Pedrore ĩre yicami.

³⁵ To bajiro ĩ yisere ajicõari, ado bajiro cudicami Pedro:

—Mu rãca yure ñna sŭaruaajaquẽne, “Jesúrãcagu me ñaja yu”, yisocabetirucuja yu —Jesúre yicami Pedro.

To bajiro Pedro ĩ yisere ajicõari, yua quẽne to bajiro yijedicõacaju.

Getseman'i vãme cutoju Jesús ĩ jacure ĩ sãnigũ vare queti (Mr 14.32-42; Lc 22.39-46)

³⁶ To yua yiro bero, Getseman'i vãme cutoju yuare ũmato vacami Jesús. Toju ejacõari, ado bajiro yuare goticami Jesús:

—Õju Diore sãniguacu yaja yu. To yu vatoye, ado rujicõaña mua maji —yuare yicami.

³⁷ To yi vacune, Pedrore, to yicõari, Zebedeo rŭare juarãjurene ji vacami Jesús. To yi vacune, buto

tuoĩasutiriticami yuja. ³⁸ To bajiro bajigũne, ado bajiro yiyuju Jesús, ĩ rãca variarãre:

—Buto tuoĩasutiritiaja yũ. Sutiriosene yũre sĩaro yaja. Adone yũre yuĩaña maji. Yũ cãnibetore bajirone cãnibeja mũa quẽne, Diore sẽnĩnarã —ĩnare yiyuju Jesús.

³⁹ To yicõari, to sojũabũsa varẽmoñuju Jesús. Va, sita tũcurojũ murocacũcõari, Diore sẽnĩñuju ĩ:

—Cacũ, yũre ĩna sĩarotire matamasiaja mũa. To bajiboarine, mũa bojarore bajirone bajiato —Diore yiyuju.

⁴⁰ To yigajano, Pedro mesa ĩna cãnitoyene ĩna tũjũ ejayuju. ĩnare yujiocõari, ado bajise Pedrorre ĩre yiyuju Jesús:

—¿No yirã cojo hora cõro cãnibetibũsarãne, yũre yuĩabetimasucõati mũa? ⁴¹ Yũ cãnibetore bajirone cãnibesa mũa quẽne. To bajicõari, Diore sẽnĩna, “Vãtia mũjũ Satanás ĩ yirotsere yicõari, Dios ĩ bojabetire yirobe” yirã. Quẽnaro mũare masiaja yũ. “Dios ĩ bojasere yirũcũja” yirã ñaboarine, cojojirema rojose usuri cutirã ñari, Dios ĩ bojabetijũare yirũgũaja mũa —Pedro mesare ĩnare yiyuju Jesús.

⁴² To yicõari, gãme vacũ, ado bajiro Diore sẽnĩñuju Jesús:

—Cacũ, yũre ĩna sĩaroti matamasiaja mũa. To bajiboarine, mũa bojarore bajirone bajiato —Diore yisẽnĩñuju.

⁴³ To yigajano vacũne, cãniararãre ĩnare ejayuju quẽna. Buto vũjajearã ñari, cãnĩñujarã ĩna. ⁴⁴ To bajiri rĩjoro ĩnare ĩ yiriarore bajirone ĩnare yicõa, Diore sẽnigũ vacoasuju quẽna. To ejacõari, rĩjoro Diore ĩ sẽniriarore bajirone ĩre sẽnĩñuju quẽna. ⁴⁵ Diore sẽnigũ var'i, tudiejacõari yũare yujiocami:

—¿No yirã cãni manicõati mũa maji? Ado cõrone Dios ĩ roticõacacũre rojose yirãre yũre ĩsirocarocũ vadicoagũmi

yuja. ⁴⁶ To bajiri yujiya m̄ua. Īre bocarã vajaro. Ȳure ĩširocaroc̄u vadiami yuja —ȳure yicami Jesús.

Jesúre ĩna ñiare queti

(Mr 14.43-50; Lc 22.47-53; Jn 18.2-11)

⁴⁷ To bajiro Jesús ȳure ĩ yĩnarirĩmarone, Judas Iscariote vãme c̄utiḡu, ȳua rãcaḡune, vadicami yuja. Jãjarã ĩ rãca vadicama jariaseri c̄uorã, gãjerã yuc̄ujuriri c̄uorã. B̄ucurã, paia ɸjarã quẽne ĩna cõariarã ñacama ĩna. ⁴⁸ Jẽre ado bajiro goti vadiruyuyumi Judas, ĩ rãca vanare, “ Īne ñaami Jesús’ yĩamasiato ĩna” yiḡu:

—Jesúre s̄enicõari, ĩre usuruc̄uja ȳu. To ȳu yirone, ĩre ñiama m̄ua —ĩnare yi vadiruyuyumi.

⁴⁹ To bajiro yir'i ñari, Jesús rĩjoroj̄ua ejacõari, ado bajiro ĩre yicami Judas:

—Gotimasierimas̄u, ¿ñati m̄u? —ĩre yiḡune, usucami.

⁵⁰ To ĩ yirone, ado bajiro yicami Jesús:

—“To bajiro yirãsa mani” ĩnare m̄u ũmato yivadiriarore bajiro yiya m̄u —ĩre yicami Jesús.

To ĩ yirone, ĩre ñiacama Judas rãca vadiriarã.

⁵¹ To ĩna yirone, s̄iḡũ Jesúrãcaḡu, ĩ jariase yoveaãmicõari, paia ɸj̄u ñamasuḡure moabosarimas̄ure gãmoro jatarocacõacami. ⁵² To ĩ yisere ĩacõari, ado bajiro ĩre yicami Jesús:

—M̄u jariasere tudisuacõaña quẽna. “Jariase rãca gãmerã quẽarãma, tiase rãcane s̄iaecoruarãma”, yimasija mani. ⁵³ Ado cõrone ȳu jac̄ure ȳu s̄enijama, setenta y dos mil ñarã ángel mesare cõamasicõaḡũmi. ¿Tire masibeati m̄u? ⁵⁴ To bajilboarine, ĩnare ĩre ȳu s̄enijama, Dios oca masa ĩna ucamasire, “To bajiro bajir̄uaroja” ĩna yimasiriarore bajiro bajibetiboroja. To bajiri tire ĩre s̄enibeaja ȳu —ĩre yicami Jesús.

⁵⁵ To yicōari, ĩre ñiarã ejarãjuare ado bajiro yicami Jesús:

—¿No yirã gajeyeũni juarudirimasũre ñiarã vanare bajiro jariaseri rãca, yucújuriri rãca yũre ñiarã vadiati mũa? Tocãrãcarũmũne Diore yirũcũbuoriavijũ mũa ñaro mũare gotimasio rujirũgũmũ yũ. To yũ bajiboajaquẽne yũre ñiabetirũgũmũ mũa maji. ⁵⁶ Diore gotirẽtobosarimasa, ado bajiro yũre mũa yirotirene ucamasiñuma. To bajiri to bajirone yũre yaja mũa —ĩnare yicami Jesús, ĩre ñiarã ejarãre.

Jesúre ĩna ñiasere ĩacōari, ũmarudijedicoacajũ yũa.

“Mũ ye sũorine rojose tãmũorũcũja mũ”, jud'io masa ɯjarã, Jesúre ĩna yire queti

(*Mr 14.53-65; Lc 22.54-55, 63-71; Jn 18.12-14, 19-24*)

⁵⁷ Jesúre ñiacōari, paia ɯjũ ñamasugũ Caifás vãme cõtigu tũjũ ĩre ãmiasujarã. Tojũ rẽjacōari, ñañujarã Dios ĩ rotimasire gotimasiorimasa, to yicōari, bũcũrã quẽne.

⁵⁸ Jesúre ĩna ãmivato, sõjũ yayĩasũyayuju Pedro. ĩnare yayĩasũyacōari, paia ɯjũ ñamasugũ ya vi, ta biberiasãniro rẽtosãjacoasuju. Sãjacōari, Diore yirũcũbuoriavi coderimasa rãca rujiyuju ĩ. “No bajiro Jesúre ĩna yigajano vato ĩagũsa” yigu, tojũ bocaĩarujiyuju.

⁵⁹ Paia ɯjarã, to yicōari, gãjerã ɯjarã, ĩna jediro, Jesúre sĩarũayujarã. To bajiro yirã ñari, “Rojose masu yigu ñaami Jesús” yisocaronare macañujarã ĩna. ⁶⁰ Jãjarã masa socarãne ĩna gotiboajaquẽne, to bajiro ĩna yisere ajicōari, “To bajiro ĩ yire ñajare, ĩre sĩaroti ñaja”, yimasibesujarã ĩna maji.

To bajiboarine, juarã ejayujarã ĩna. ⁶¹ Ejacōari, ado bajiro socarãne gotiyujarã:

—“Diore yirũcũbuoriavire caguerocamasiaja yũ. To yicōari, idiarũmũ tũsatirũmũne bũajeocōamasiaja”, yicami ãni —yiyujarã ĩna.

⁶² To ñna yirone, paia ɯɟu ñamasugũ, vũmurũgũcõari ado bajiro Jesúre yiyuju:

—To bajiro mure ñna yi ocasãserẽ, ¿no bajiro yati mu? ¿Cudibeati mu? —Jesúre ñre yiboayuju.

⁶³ To ñ yiboajaquẽne, cojo vãme cudibeticõañuju. Ñ cudi-betire ñacõari, ado bajiro Jesúre yiyuju paia ɯɟu ñamasugũ:

—Quẽnaro riojo yũare cudiya mu. Mu socajama, rojose mure yirucumi Dios. ¿“Rotimũorũgõrucumi” yigu, Dios ñ cõar'ine, Dios macune ñati mu? —Jesúre ñre yisẽniãañuju paia ɯɟu ñamasugũ.

⁶⁴ To bajiro ñ yisere ajicõari, ado bajiro ñre cudiyuju Jesús:

—Mu yirore bajirone bajiaja. Ñne ñaja yu. To bajiri, Dios ñ roticõacacu ñari, yoaro mene ñ riojojacatua rujicõari, masare beseguagu oco bueri vatoaju yu rujiadire ñaruarãja mua, —paia ɯɟu ñamasugũre yiyuju Jesús.

⁶⁵ To bajiro Jesús ñ yisere ajitegu ñari, ñ sudire tãavoyuju paia ɯɟu ñamasugũ. To yigune, ado bajiro ñ rãcanare yiyuju:

—¿To bajiro ñ ñagõjama, Diore rũcubũobecu yami! ¿“Diore bajiro bajigu ñaja yu” yigu yami! No yirã gãjerã, “Rojose yigu ñaami” yironare macarẽmomenaja mani yuja. Mua quẽne, Diore rũcubũobecu ñ yisere ajiaja mua.

⁶⁶ To bajiro ñ yisere ajicõari, ¿no bajiro ñre yiroti ñati? —Ñ rãcanare yiyuju paia ɯɟu ñamasugũ.

To bajiro ñ yisere ajicõari, ado bajiro ñre cudiyujarã:

—Rojose masu yicõami. Ñre sãcõaroti ñaja — yicudiyujarã.

⁶⁷ To yicõari, Jesús riogare gooco eoreatuyujarã ñna. To yicõari, ñ cajere siabibecõari, ñre jayujarã. ⁶⁸ To yicõari,

—“ ‘Rotimũorũgõrucumi’ yigu, Dios ñ cõagũ ñaja yu” mu yijama, mu masise rãca, “Ñ, yure jami”, yũare yiya — Jesúre yitud'iyujarã.

“Jesúre masibeaja yu”, Pedro ï yire queti
(Mr 14.66-72; Lc 22.56-62; Jn 18.15-18, 25-27)

⁶⁹ Vi jubeaju Jesúre rojose ïna yiñarone, macajúju rujicõañuju Pedro. Sígõ paia uju ñamasugãre moabosari-maso, Pedro tu ejacõari, ado bajiro ïre yiyuju:

—Jesús, Galilea sitagu rãca vacudirügügüne ñagãja mu quëne —ïre yiyuju so.

⁷⁰ To bajiro so yisere ajicõari, masa jediro ïna ajiro rïjorojuu ado bajiro yiyuju Pedro:

—“Riojo yaja mu”, mure yimasibeaja yu —sore yiyuju Pedro.

⁷¹ To bajiro sore yicudicõa, ta biberiasãniro sãjariasoje tu vasuju Pedro. To ï vatone, gajeo ïre ïacõari, ado bajiro yiyuju:

—Ñani, Jesús Nazaret macagu rãca vacudigu ñaami —yiyuju, gãjerãre gotigo.

⁷² To bajiro ïnare so yisere ajicõari, ado bajiro yiyuju Pedro:

—Ïre masibeaja yu. Socu me yaja yu. Dios quëne yure ajigumi —ïnare yiyuju Pedro.

⁷³ To ï yigotiriario bero yoatobusa, to ñarã ado bajiro Pedroro gotiyujarã:

—Riojo yaja yu. Jesúrãca vacudirügügüne ñaja mu. ïna ñagõsere bajirone ñagõaja mu —Pedroro ïre yiyujarã ïna.

⁷⁴ —Ïre masibeaja yu. Socu me yaja. Dios yure ajigumi —ïnare yiyuju Pedro.

To bajiro ï yigajanorirïmarone, gãjabocu ñagõcõañuju yuja. ⁷⁵ ï ñagõsere ajicõari, Jesús ado bajise ïre ï gotirere masibujayuju Pedro yuja: “Gãjabocu ï ñagõroto rïjoro, idiaji, ‘Jesúre masibeaja yu’ yirucuja mu” ïre ï yirere masibujayuju. Tire masibujacõari, vacoasuju. Vacõari, bato otiyuju.

27

Pilato tujɔ Jesúre ñna ãmiejare queti

(Mr 15.1; Lc 23.1-2; Jn 18.28-32)

¹ Busuro bero, bucurã, paia ɔjarã quêne, ñna jediro tudirējañujarã ñna. To bajicõari, “Ado bajiro mani yijama, Jesúre sãarãama”, yituoïañujarã ñna. ² To bajiro yirã ñari, Jesús ãmorire siacõari ñre ãmiasujarã ñna, Pilato vãme cutigu ya vijɔ vana. Jud'io masa ɔjɔ ñamasugũ, romano masɔ ñañuju Pilato. To bajiri ñ ya vijɔ Jesúre ãmiejayujarã.

Judas ñ masune ñ sãayayire queti

(Hch 1.18)

³ Judas, Jesúre ñsirocacɔ, “Jesúre sãaroti ñaja” ñna yisere ajicõari, “Rojose yibɔ yɔ”, yituoïa sutiritiyuju. To bajigu ñari, bucurã, paia ɔjarã quêne, Diore yirũcubũoriaviju ñarãre, ñnare ejacõari, gãjoatiiri treinta ñaritiiri ñre ñna ñsiboarere ñnare tũocõañuju. ⁴ Gãjoatiirire ñnare ñsigũne, ado bajiro ñnare yiyuju ñ:

—Rojose yibɔ yɔ. Ñie rojose yibecũrene mũare ñsirocõañuja yɔ —ñnare yiyuju.

To bajiro ñ yiboajaquêne, ado bajiro ñre cãdiyujarã ñna:

—To bajiro yũare mũ yiboajaquêne, no yibeaja yũarema. Mũre bajiroja —Judare ñre yiyujarã ñna.

⁵ To ñna yisere ajicõari, ti vijɔ gãjoatiiri ñ ñsiacoboarere reabateyuju Judas. To yi, gajano vacũne, yucũjɔ mũjacõari, ti rũjɔ misimare siatucõari, ñ ãmũare quêne siatu, quedirocayo rijacoasuju.

⁶ Diore yirũcubũoriaviju gãjoatiiri Judas ñ reabaterere juarẽoñujarã ñna, paia ɔjarã. Tire juarẽocõari, ado bajiro yiyujarã:

—Adi gãjoa mani vaja yise sũorine sãgũre sãaroana yaja. To bajiri Diore yirũcubũoriavi boarijaurire quẽnorãrã, vaja yiroti gãjoa sãriajũre sãbetiroti ñaroja —yiyujarã ñna.

⁷ To bajiro yituoĩacõari, “Riri soturi vearimasu sitare vaja yito mani. Ti sita ñaruaroja gajeroanare bajirearãre mani yujeroti sita”, yituoĩañujarã ña yuja. ⁸ To bajiri ti sita vaja yiruarã, “Jesúre síato mani” yirã, Judare ña ísiboare ráca ña vaja yire ñari, adirũmuri quẽne, Ri'i Vese vãme cuticõa ñaja. ⁹⁻¹⁰ To bajiro ña yijama, tirũmũju Diore gotirẽtobosarimasu Jerem'ias ñamasir'i ï ucamasiri-
arore bajirone bajiyuju. Ado bajiro ucamasiñuju ï: “ ‘Ado cõro vaja cutiami sígũ ñmũ’ yituoĩarã ñari, ïre ísir'ire treinta gãjoatiiri ña vaja yiboarere juacõari, riri soturi vearimasu sitare vaja yiruarãma ña, Israel ñamasir'i jãnerabatia. To bajiro ña yijama, Dios ï bojarore bajiro yirã yiruarãma”, yucamasiñuju Jerem'ias ñamasir'i.

Jesúre Pilato ï sēniĩare queti

(Mr 15.2-5; Lc 23.3-5; Jn 18.33-38)

¹¹ Ti sitana mũ ñamasugũ, romano masu ñañuju Pilato vãme cutigu. To bajiri ï tũju Jesúre ãmiasujarã ña. ïre ña ãmiejaro ñacõari, ado bajiro sēniĩañuju Pilato:

—¿Mũne ñati jud'io masa mũ? —Jesúre yiyuju Pilato.

To bajiro ï yisere ajicõari, ado bajiro ïre cūdiyuju Jesús:

—Mũ yirore bajirone bajaiaja yũ —ïre yiyuju.

¹² To bajiro Jesús ï yisere ajicõari, bucũrã, paia mũjarã quẽne, “Rojose yigũ ñaami Jesús” Pilatore ïre ña yi ocasãboajaquẽne, ñnare ñagõcudibesuju Jesús. ¹³ To bajiro Jesúre ña yi ocasãsere ajicõari, Jesúre tudisēniĩañuju Pilato:

—¿To bajiro mũre ña yisere ajibeati mũ? —Jesúre yiyuju Pilato.

¹⁴ To bajiro ïre ï yisēniĩaboajaquẽne, ïre cūdibet-icõañuju Jesús. ï cūdibetire ñacõari, no yimasibesuju Pilato, ïre bajiro bajigũre ñabetirũgũr'i ñari.

*“Jesúre s̄aroti ñaja”, ñna yire queti
(Mr 15.6-20; Lc 23.13-25; Jn 18.38-19.16)*

¹⁵ Tocârãca c̄ma, Pascua boserũmu jud'io masa ñna quẽnojama, s̄gũ, tubibe ecor'ire ñna burotigũre ñnare bubosarũgũñuju Pilato. ¹⁶ Tubiberiavijũ ñañuju s̄gũ, masa jediro ñna masigũ Barrabás vãme cutigũ. ¹⁷ To bajiri ñ yirũgũriarore bajiro yigũ, masa ñna rêjarore ñacõari, ado bajiro ñnare s̄niñañuju Pilato:

—¿Ñimũjuare yũ busere bojati mũa? ¿Jesús Barrabás vãme cutigũjuare bugutique yũ? Ñre yũ bubetijama, ¿“Rotimũorũgõrũcami” yigũ, Dios ñ cõar'i ñaami Jesús” masa ñna yigũjuare bugutique yũ? —ñnare yis̄niñañuju Pilato.

¹⁸ “Jesúre ñajũnisinirã ñari, yũre ñsima” yituoĩagũ, to bajiro yiyuju Pilato, Jesúre burũ.

¹⁹ Oca ñna ñagõquẽnorijũ ñ rujiro, ñ manajo ñre queti cõañuju: “Rojose ñre yibesa. Ñie rojose yigũ me ñagũmi. To bajiro ñ yiecoroto r̄joro gũiose cãjiriamũ yũ”, ñre yicõañuju, so manajũre.

²⁰ Bucurã, paia ñjarã quẽne ado bajiro tijũ rêjarãre masare, “Ado bajiro yiya”, ñnare yirotiyujarã ñna:

—“Barrabãjuare bucõari, Jesũjuare s̄arotiya mũ”, ñre yiya mũa —ñnare yirotiyujarã ñna.

²¹ Quẽna ado bajiro tudis̄niñañuju Pilato:

—¿Ñimũjuare yũ busere bojati mũa? —ñnare yis̄niñañuju.

To bajiro ñ yisere ajicõari, ado bajiro ñre cãdiyujarã ñna:

—Barrabãjuare mũ busere bojaja yũa —yiyujarã ñna, Pilatore.

²² To ñna yisere ajicõari, ado bajiro ñnare s̄niñañuju Pilato:

—To yijama, ¿no bajiro yiguti yu Jesúre, “ ‘Rotimorogōgōrcuja mu’ yigu, Dios í cōar'i ñaami” masa ña yigujarema? —ñare yisēñiñaju.

To í yirone, ña ñaro cōrone ado bajiro ñre avasãcūdiyujarã:

—¡Yucútēroju ñre jajušaroticōaña mu! —ñre yivasã cūdiyujarã ña.

²³ To ña yijare, ado bajiro ñare sēñiñaju Pilato:

—¿Ñie rojose í yire suori ñre šarotiguti yu? —ñare yiyuju Pilato.

To í yiboajaquēne, quēna butobusa tudivasãñujarã ña:

—¡Yucútēroju ñre jajušaroticōaña! —yivasãñujarã ña.

²⁴ To bajiro ña yijare, no yimasibetiboacu, ado bajiro tuoñaju Pilato: “No bajiro yicōari, ñre bumasibecuja yu. ña bojarore bajiro yu yibetijama, avasātujabeticōari, rojose yijacarãma ña”, yituoñaju. To bajiro tuoñacōari, oco juarotiyuju í. To yicōari, ado bajiro ñare gotiyuju:

—Mua ñaro rījoroju yu ñmorire coeioaja yu, “Ñni rojose yibecure šarucabeaja yuma” yigu. To bajiri mua masune mua šarotijama, quēnacōaroja. To bajiro mua yijama, muane suoye cutiruarãja mua —ñare yiyuju í.

²⁵ To í yisere ajicōari, masa ñajediro ñre cūdiyujarã:

—Yua masiaja. ¡Yua, yua rĩa quēne suoye cutiruarãja, ñre yua šarotijama! —ñre yicūdiyujarã ña.

²⁶ To bajiro ña yijare, Barrabáre bucōñaju Pilato. Jesújarema, í surarare ísiñaju, “Ñre bajecōari, yucútēroju ñre jajušato ña” yigu.

²⁷ To bajiri ña ya vijū Jesúre ñmiejayujarã surara mesa. ñre ñmiejacōari, ña jediro ñre gānibiarūgūñujarã. ²⁸ To yicōari, “Ujūre bajigu ñato” yirã, ado bajiro Jesúre yiyujarã: Jesús í sudi sãñasere vejecōari, ujarã ña sãñarito ũnore, sūarivujorore ñre sãñujarã. ²⁹ To yicōari, í rujoa joere jotabedo ña suariabedone ñre jeoyujarã. To yicōari,

riojojacatuaga ãmore, yucú, ɯjɯ ï ɯɔoricɯre ïre ïsiñujarã. To bajiro ïre yicõari, ï rñjorojɯa gɯsomuniari tuetucõari, ado bajiro ïre yiajatud'iyujarã:

—Jud'io masa ɯjɯre mure quēnarotiaja yɯa yuja — Jesúre yiyujarã ïna.

³⁰ To yirãne, gooco ïre eoreatuyujarã ïna. To yicõari, ï ɯɔoricɯre êmacõari, ï rɯjoare jayujarã ïna. ³¹ To bajiro ïre yigajanocõari, ɯjarã ïna sãñarito ùnore ïna sãriarore ïre veayujarã ïna quēna. To yicõari, ï sudijɯa ïre sãñujarã quēna. ïre sudi sãgajanocõari, yucútërojɯ jajusïaroana ïre ãmiasujarã.

Yucútërojɯ Jesúre ïna jajusïare queti

(Mr 15.21-32; Lc 23.26-43; Jn 19.17-27)

³² ïre ãmivanane, sïgã Cirene vãme ɯti sitagɯ, Simón vãme ɯtigɯre bocacama ïna. ïre bocacõari, “Jesús ï gaja vatijãire ïre gajabosaya”, ïre yi vacama ïna.

³³ To yi vanane, Gólgota vãme ɯti burojɯ ejacama ïna. “Rɯjoco Buro” yire ùni ñacajɯ “Gólgota” yire. ³⁴ Tojɯ ejacõari, ɯye ocore, sũese rãca vɯocõari Jesúre ïre iocama ïna. “ïre jñnise jñni ruyubeticõato” yirã, yiboacama. Tire idiãboa yicõacami Jesús.

³⁵ Yucútërojɯ Jesúre ïre jajutugajanocõari, “Ñimɯjɯa ï sudire ï ɯjaro ïarãsa mani” yirã, gũtarine reacũia ajeñacama. ³⁶ To yiajegajanocõari, ïre code rujicama ïna.

³⁷ Jesús ï tuyaritërojɯre ï rɯjoa vecare ucaturiajɯ tuyacajɯ. “Ado bajiro ï yise ɯɔorine jaju ecoami” yïñoriñjɯ ñacajɯ. Ado bajise goticajɯ: “Ãni ñaami Jesús, jud'io masa ɯjɯ”, yigoticajɯ ti.

³⁸ Jesúrãca jɯarã, jaju ecocama. Gajeyeũni juarudiri-masa ñacama ïna. Sïgũre ï riojojacatua, gãjire ï gãco-jacatua ïnare jajutucama ïna. ³⁹⁻⁴⁰ Masa rëtoana, ïna rɯjoarire yure, yure yicama, “Jaju ecor'ire ïre ïateaja” yirã. To yicõari, ado bajiro ïre ajatud'icama ïna:

—Ado bajiro yiboacaju mũ: “Diore yirũcũbuoriavire caguerocamasiaja yũ. To yicõari, idiarũmu tusatirũmũne buajeocõamasiaja”, yiboacaju mũ. To bajiri “Dios macũ ñaja yũ” mũ yisocabetijama, mũ yimasise rãca mũ masune yucútẽrojũre rujicoaya —ĩre yiajatud'icama ñna.

⁴¹ Вүсүрӓ, паиа ұjarӓ, Dios ı rotimasire gotimasiorimasa quẽne, to bajirone Jesũre yiajatud'i ñacama ñna. Ado bajiro yicama:

⁴² —Gãjerãrema catiogũ ñaboarine, ı masu rojose ı tãmuoserema yirẽtomasibeami —yiajatud'icama. —Israel ñamasir'i jãnerabatia ıjũ ñaami. To bajiri yucútẽrojũre rujicoadiato. To bajiro ı bajiro ıacõari, “İne ñaami”, yimasirũarãja —yiajatud'icama. ⁴³ —“Dios macũ ñaja yũ. Yũre ejarẽmorũcumı”, yirũgũmi. To bajiri ı macũne ı ñajama, ıre ıamaigũ ñari, ıre yirẽtobosato Dios —yiajatud'icama ñna.

⁴⁴ Јuarӓ Jesũrãca yucútẽrojũ jaju ecoriarã quẽne, to bajirone Jesũre yitud'icama.

Jesús ı usutadire queti

(Mr 15.33-41; Lc 23.44-49; Jn 19.28-30; He 10.20)

⁴⁵ Ɛmũrecaji ñarone, rẽtiacoacaju yuja. Idia hora rẽtiacaju. ⁴⁶ To cõro ti rẽtiatusatone, ado bajiro tutuaro avasãcami Jesús:

—El'i, El'i, ¿lema sabactani? —yivasãcami. “Dios, yũ jacũ, ¿no yigũ yũre cãmotadiati mũ?” yire ũni ñacaju ti, ı avasãcati.

⁴⁷ Sıgũri toju ñarã ı avasãsere ajicõari, ado bajiro yicama ñna:

—Diore gotirẽtobosarimasũ El'ias ñamasir'ire jigũ yami ı —yicama ñna.

⁴⁸ To bajiro Jesús ı yivasãrone, sıgũ, Jesús tu ũmae-jacõari, ıye oco jiarere ñiabiãcõari, yucũ gajaju siatucõari,

Jesús rise tujure ñumotuboacami. ⁴⁹ To bajiro ï yiboajaquêne, ado bajiro yicama gãjerãjũa:

—Yibesa mũ. Tone bajicõato. Rojose ï tãmuosere yirëtobosagũ El'ias ñamasir'i ï ejasere ïarãsa mani —yicama ñna.

⁵⁰ Tutuaro avasãtusa, usutadicoacami yuja.

⁵¹ Tirĩmarone Diore yirũcũbũoriavi yotoria gasero vorujjedicoasuju ti. “Dios ï ñarisõa vãme cõtĩ sõare sãjamasibeama masa” yirã, ñna yotoria gasero ñacajũ. To yicõari, sita sabecajũ. Gũta quêne caguevẽjacoacajũ.

⁵² To bajicõari, masare yujeriaviri quêne jãnacoasuja. To bajicõari jãjarã rijariarã Diore ajitirũnũriarã tudicaticoasuma. ⁵³ Tudicaticõari, ti virire budicoasuma. Budiacõari, Jesús ï tudicatiro bero, Jerusalénjũ Dios ï beseria maca ñamasuri macajure ñna vacudisere ñacama jãjarã masa.

⁵⁴ Jesús yucútẽrojũ ï tuyarore, codeñacama surara, ñna ẽjũ rãca. To bajiñarã, sita sabesere, gajeye gũiose bajisere ñacõari, bũto gũicama ñna. To bajiri ado bajiro yicama:

—Socabesumi. Dios macũne ñaboayumi ñni —yicama ñna.

⁵⁵ Galilea sitajũ Jesúre suyavadicana rõmiri jãjarã sõjũ ñarũgõcama. Ñna ñacama ïre ejarẽmorũgũcana. ⁵⁶ Ñna rãca ñacamo Mar'ia Magdalena. Gajeo Mar'ia vãme cõtigo quêne ñacamo. Sone ñacamo Santiago, to yicõari, José jaco. Zebedeo ñamasicacũ rĩa jaco quêne ñacamo.

Jesúre ñna yujere queti

(Mr 15.42-47; Lc 23.50-56; Jn 19.38-42)

⁵⁷ Rãioroto rĩjoro José vãme cõtigu, Arimatea macagũ Jesús rujurire ñagũ ejayuju. Gãjoa jaigũ ñacami. To bajicõari, Jesúre ajitirũnũrũgũcacũ ñacami. ⁵⁸ To ï bajiro bero, Jesús rujurire ñmirũ, Pilatore sãnigũ vasuju. Ñre ï sãnĩrore bajirone ïre cũdiyuju Pilato. ⁵⁹ To bajiro ï yir'i

ñari, Jesús rujurire rujiogũ vasuju. Ìre rujiocõari, sudijãiri botiquẽnarijãirine ìre gũmañuju. ⁶⁰ To yigajanocõari, masa yujeriavi gũtavi mame ì quẽnorotiriavijũ ì rujurire cũñuju. To yicõari, ti vi sojere gũtane tũnuo bibecũ, vacoasuju. ⁶¹ To bajiro ì yĩñaro ìañariarãjũne masa yujeriavi rĩjorojũa, Mar'ia Magdalena, gajeo Mar'ia quẽne, rujicõañujarã ìna.

Jesúre, ìna yujeriavire ìna codere queti

⁶² Gajerũmũ ñañuju ususãjariarũmũ. Tirũmũne paia ɸjarã, fariseo masa quẽne, Pilatore ñagõrã vasujarã ìna.

⁶³ Ì tũ ejacõari, ado bajiro ìre yiyujarã ìna:

—Yũa ɸjũ, ajijya. Socarimasũ ì yisocacatire masibɸjabũ yũa. “Ìdiarũmũ tũsatirũmũne quẽna tudicaturũcũja yũ”, yisocacami, ì sãacoroto rĩjoro. ⁶⁴ To bajiri ì rujurire ìna yujeriavi soje tũre surarare coderoticõañã, “Ì buerimasa ì rujurire ãmirudiroma” yigũ. Ì rujurire ìna ãmijama, “Rijar'i ñaboarine, quẽna tudicaticoami”, yisocarũarãma ìna. Ì rijaroto rĩjoro, “Ì rotimũorũgõrotire yigũ, Dios ì cõacacũ, jud'io masa ɸjũ ñaja yũ” ì yisocacati ti ñajare, quẽnabeaja. To bajiri, “Tudicaticoami” ìna yisocajama, quẽnabetimasucõarũaroja —Pilatore yiyujarã ìna.

⁶⁵ To ìna yisere ajicõari, ado bajiro cãdiyujũ Pilato:

—Mũare yũ ìsicanarene coderotiya mũa —ìnare yicãdiyujũ Pilato.

⁶⁶ To ì yisere ajicõari, Jesús rujurire ìna yujeriavire coderotiyujarã ìna. To yicõari, gũta sojere quẽnaro bibequẽnoñujarã ìna, “Ì rujurire ãmirã ìna jãnajama, ìa-masirãsa mani” yirã.

28

Jesús ì tudicature queti

(Mr 16.1-8; Lc 24.1-12; Jn 20.1-10)

¹ Ususājariarūmu ti jediro, quēna moasuroriarūmu ti busumujado, Mar'ia Magdalena, gajeo Mar'ia quēne, Jesús rujurire ĩna yujeriavire ĩarā vacama ĩna. ² To ĩna vatone, buto sita sabeyuju. To ti bajirone, sigū ángel rujiejayuju. Rujiejacōari, Jesúre ĩna yujeriavire gūtane ĩna bibeboari-are jãnañuju. To yicōari, tia joene rujiyuju. ³ Bũjo ĩ yabesere bajiro yaayuju ĩ. ĩ sudi quēne buto botiquēnañuju. ⁴ ĩre ĩacōari, gũirã nanañujarã ti vire coderimasa. Nanacōari, rijavējarãre bajiro bajireacũcoasujarã. ⁵ To ĩna bajirone, ángel ado bajiro rōmiajuare gotiyuju:

—Güibesa mua. Jesús yucútēroju ĩna jajusiar'ire mua macasere masiaja yu. ⁶ Maami adojure. ĩ goticatore bajirone tudicaticoami. ĩre ĩna yujerijure ĩarã vayá. ⁷ Tire ĩacōari, guaro ĩ buerimasare ado bajiro ĩnare gotiaya: “Quēna tudicaticoasumi Jesús. To yicōari, mani rĩjoro Galilea sitaju varocu ñañuju. Toju ĩre tudĩaruarãja mani”, ĩnare yigotiaya mua. Adire muare gotigu bajibu yu —ĩnare yiyuju ángel.

⁸ To ĩ yisere ajicōari, Jesús rujuri ĩna yujeboariav-ijũ budianane, gũituoĩaboarine, variquēnase rãca ũma-coayuma ĩna, Jesús buerimasare yuare gotirã vana. ⁹ ĩna ũmavadone ĩnare sēniĩacānamua ruyuyuju Jesús. “¿Nati mua?” ĩ yisere ajicōari, ĩre yirũcuborã, ĩ rĩjoroju muqueacōari, ĩ gũborire ñiañujarã ĩna. ¹⁰ To bajiro ĩre ĩna yirone, ado bajiro yiyuju ĩ:

—Güibesa mua. Yu yarã yu buecanare ado bajiro ĩnare gotiaya: “Galilea sitaju vajarõ. Toju ĩre ĩaruarãja mani”, ĩnare yiba —rōmiare ĩnare yiyuju Jesús.

“*Ado bajiro bajibu ti*”, surara ĩna yigotire queti

¹¹ Rōmia ĩna gotirã vato ũnone, surara quēne, Jesús rujurire ĩna yujeriavire codeboariarã sigũri, macaju tudicoasujarã ĩna. Tудiejacōari, paia ujarãre gotiyujarã,

ina ĩare n̄aro cõrone. ¹² Ti quetire ajicõari, bucurã rãca ñagõrã vasujarã paia ujarã. “To bajiro bajire ti ñajare, ado bajiro yiruarãja mani” yimasiruarã bajiyujarã ina. To bajiri, sigũre bajiro tuoĩacõari, Jesũre ina yujerivire codeboariarãre jairo gãjoa ĩsiñujarã ina. ¹³ To yicõari, ado bajiro ĩnare socarotiyujarã ina:

—“Ñami yua cãnitoye, ĩ ñaboar'i buerimasane Jesús ru-jurire ãmirudicoasuma ina”, yigotibatoya mua —masare yiyujarã bucurã, paia ujarã quẽne. ¹⁴ —Uju Pilato ti quetire ajicõari, muare ĩ jũnisinjama, muare ñagõ-bosaruarãja yua, “Rojose ĩnare yibesa” yirã. Yũare cudicõarucami —ĩnare yiyujarã.

¹⁵ To bajiro ina yijare, gãjoare boca juacõari, ĩnare ina rotiriarore bajirone socase queti goticudiyujarã ina, Jesũre ina yujerivire codeboariarã. To bajiri adirũmari quẽne, “Tudicatibesuju Jesús. ĩ ñaboar'i buerimasane, ĩ rujurire ãmirudiyujarã ina” yire quetire goticõa ñarũgũama jud'io masa.

“Masa jedirore yu ocare gotimasiodiruarãja mua”, ĩ buerãre Jesús ĩ yire queti

(Mr 16.14-18; Lc 24.36-49; Jn 20.19-23)

¹⁶ Jesús ĩ tudicatisere, rõmia ina gotisere ajicõari, Galilea sitaju vacaju yua, ĩ buerã, juaãmo cõro, gũbo coja jẽnituarirãcu ñarã. “Ti buro joeju yũre ĩaruarãja mua” yũare ĩ yicatoju vacaju yua. ¹⁷ Toju ejacõari, Jesũre ĩacaju yua. ĩre ĩacõari, ĩre rũcubucocaju yua. Sigũri, “ĩ me ñaami”, yituoĩacama ina, bajirãjuma. ¹⁸ To bajiro yua yirone, ado bajiro yũare yicami Jesús:

—Adi macarucurojũre, to yicõari, õ vecajũre quẽne, “Rotigu ñarucũja mu”, yũre yicũmi yu jacu, Dios. ¹⁹ To bajiri muare quẽne masa jedirore yu ocare muare goticudirotiaja, “Yũre ajitirũnũato” yigu. To yicõari, yũre

ajitirũnurãre ãacõari, yũ jacũ vãme, yũ vãme, to yicõari Esp'iritu Santo vãme rãca oco rãca ãnare bautizaba mũa.
²⁰ To yicõari, “Jediro yũ rotisere cudiato” yirã, ãnare gotimasioma. Yũre mũa ãbetiboajaquẽne, cojorũmũ ruyabeto mũa rãca ãnarũgũrucũja yũ, mũare ejarẽmogũ. To bajiro bajicõa ãnarũcũja yũ, adi macarũcũro ti jedirojũ —yũare yicami Jesús.

To cõrone ãaja.

Dios oca gotirituti

New Testament in Barasana-Eduria (CO:bsn:Barasana-Eduria)

copyright © 2010 Wycliffe Bible Translators, Inc.

Language: Barasana-Eduria

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Barasana-Eduria

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22
